

Ke Meupiya ne Tudtul Mekeatag ki Hisu Kristu ne Miguhud ni Lucas

¹ Diyà te ki Teofilo:

Merakel en se menge etew ne migeram mid-surat te guhud mekeatag te ned-ulaula ni Hisu kayi te kenami.

² Iyan dan insurat ke nengeguhud kandan dut te menge etew ne nekekita en iya kayi te ned-ulaula igenat te rudsuan wey iyan dan dema mibpesabut te Lalag te Eleteala.

³ Na Teofilo, langun ini ne ned-ulaula ne mid-susi ku up-upiani, tembù be netahù te itungan ku se edsurat ku sikuna kayi te ned-ulaula endei se kegkeatur din.

⁴ Idsurat ku ini su apey nu metueni en iya te benar ini langun se impenurù keykew.

Impesabut Ke Ked-anak Ki Juan ne Ebpembun-yag

⁵ Iyan ku egkepengguhud ne timpu te iyan pà edatù si Hirudis dut te pruvinsiya te Hudiya ne ruen etew ketà ne ed-ingaranan ki Zacarias. Si Zacarias ini ne senge etew ne terebpelengesa rut te kevuwaran te keep-epuan dan dengan ne ed-ingaranan ki Ebiha su ke kevuwaran te Ebiha se menge terebpelengesa te Eleteala. Iyan din esawa ne ed-ingaranan ki Elisabet ne kevuwaran te bansa te Arun ne terebpelengesa rema te Eleteala.

⁶ Ne ini se senge tiwelayan ne metidtu se hinawa ran diyà te etuvangan te Eleteala ne warà igkesawey kandan dut te kedtuman dan te langun ne suhù wey penduan te Eleteala.

⁷ Ugaid ne warà anak dan su kenà ed-anak si Elisabet su elin dan en nelukes.

⁸ Ne neuma en ke menge gewii te iyan ebpekepelengesa ne si Zacarias wey ke menge ruma rin ne kevuwaran ni Ebiha diyà te Nekebpuru ne Valey te Eleteala.

⁹ Na duen betasan dut te menge terebpepengesa te Eleteala ne engkey ki ngaran se egemew ne sikandin se edlusud diyà te Nekebpuru ne Valey te Eleteala su edtutung te rukut. Ne arà ne hewii ne ki Zacarias se migemew ne midlusud en sikandin diyà te Nekebpuru ne Valey te Eleteala su edtutung te rukut.

¹⁰ Ne gewii rin te edtutung te rukut kayi te lusud, ne riyà te luwal ebpengeningeni ke merakel ne etew.

¹¹ Kemulu pà ne ed-ulaula si Zacarias kayi ne ruen suluhuen te Eleteala ne mibpekita kandin, kayi nekeitindeg te rapit te egkekewanan dut te edtutungan te rukut.

¹² Nekita rà ni Zacarias ne netekawen sikandin ne neandek-andek nevenar.

¹³ Ugaid ne migkahi ke suluhuen te Eleteala te, “Kenà ka meandek, Zacarias, su nerineg te Eleteala ke pengeningeni nu ne ke esawa nu ne ebpekeanak te meama, ne iyan nu iingaran ne si Juan.

¹⁴ Egkehalew ka nevenar kandin, ne kenà ketà dà taman su kehelawan dema dut te ruma ne

etew ketà te ked-enaka kandin.

¹⁵ Su egkevaluy sikandin ne mepurù ne etew diyà te etuvangan te Eleteala. Kenà sikandin edinum te piya engkey ne ebpeketevereg ne edinumen. Ne misan igenat te kenà pà sikandin idanak ne edlumunan en sikandin dut te Kedeseenan ne Ebpetuntul te Menusiyà.

¹⁶ Ne kayi te kebpenurù din ne ebpekepelilived te merakel ne Hudiyanen riyà te Kerenan dan ne Eleteala ne andang ne ebpengeeningeniyàn dan.

¹⁷ Ini se anak nu si Juan,” ke se suluhuen te Eleteala, “ne edsuhuen te Eleteala ne ibpeuna te ebpeketuenan te mehaan ne ebpekeuma ke Kerenan. Ne ebehayan sikandin te baher wey edlumunan dut te Kedeseenan ne Ebpetuntul te Menusiyà iring ki Elias ke etew ne mibpelambas te Lalag te Eleteala rengan. Kayi ebpuun te kebpenurù ni Juan ne ebpemeked-ulitey ke hinawa rut te menge amey wey ke menge anak. Ne ke menge etew ne warà mebperumaruma te suhù te Eleteala ne ebpekedsendit ne arà pà ne ebpekeulit te metidtu ne itungan. Ne kayi te penurù din ne ebpekepenehana ke menge etew dut te kebpekeuma ni Hisus ke Kerenan.”

¹⁸ Mighahi si Zacarias diyà te suluhuen te Eleteala te, “Maan engkey ve se idtuus ku te benar ini se mighahi nu? Su siaken ne lukes en, ne lukes en dema ke esawa ku.”

¹⁹ Mighahi ke suluhuen te Eleteala maa te, “Siak imbe si Gabriel ke suluhuen te Eleteala ne layun diyà te etuvangan din. Sikandin iya se midsuhù kedì su ebpeketuenan keykew ini se meupiya ne egked-ulaula.

20 Ne warà ke ma mibpehimbenar dut te migkahi ku, Zacarias,” ke se suluhuen te Eleteala, “ugaid ne egkeuma ke enget ne hewii ne egketuman imbe iya. Na geina te warà ka mibpehimbenar, ne egkeemew ka taman te egked-ulaula ini se migkahi ku.”

21 Ne ini se menge etew ne mibpulung midtahad ki Zacarias diyà te luwal, ne neinuinaran su malù neuhet sikandin diyà te lusud te Nekebpuru ne Valey te Eleteala.

22 Guna su midlihawang en si Zacarias ne kenà en ebpekekahi riyà te menge etew su ebpenguyew-uyew rè be ne ketà ne neemew en sikandin. Ne netuenan dut te menge etew te ruen en impekita kandin te Eleteala diyà te lusud te valey te Eleteala.

23 Neipus ni Zacarias ke kandin ne hewii te egelevek diyà te Nekebpuru ne Valey te Eleteala ne mid-ulì en.

24 Warà meuhet ne mibpenehipuun en ke esawa ni Zacarias, ne nekedlelima ne vulan ne mid-ubpaubpà sikandin te valey.

25 “Ne ini pè be ne ingkeyru a te Eleteala su ebpekeanak ad,” ke sikandin. “Ne ebpekeengked en ke menge etew ne edtekudì kedì.”

Impesabut ke Ked-anak Ki Hisus

26 Guna su ikeenem en ne vulan te kehingeyan dut te esawa ni Zacarias ne midsuhù te Eleteala ke suluhuen din ne si Gabriel diyà te inged ne Nesarit lusud te Geliliya.

27 Iyan mibpeveyaan kandin ne riyà te senge etew ne raha ne nepesaran en se ed-esawaen te

kenakan ne ed-ingeranan ki Jose, ke kevuwaran dut te ratu dan dengan ne si David.

²⁸ Nekeuma ke suluhuen te Eleteala riyà te ki Maria ne migkahi en te, “Na kehalew ka, Maria! Bebegian ka ne etew su kayi en ke Eleteala te kenikew.”

²⁹ Guna su nerineg ni Maria ke lalag dut te suluhuen te Eleteala ne neliveg nevenar sikandin, ne mibpegpegitung din te engkey vuwa se meana rin.

³⁰ Ne migkahi ke suluhuen te Eleteala kandin te, “Kenà ka meandek, Maria, su midtuvaran ka te Eleteala.

³¹ Ebmehingey ka ne ed-anak ka te meama ne iyan nu iingeran ne si Hisus.

³² Ebmepuru sikandin ne iyan duma ne idumew kandin ne Anak en iya te Eleteala ne pinekemepuru te langun. Iyan ebpepuru kandin ne Eleteala,” ke se suluhuen, “su ibehay rin kandin ke edetuan dut te apu din dengan ne si David.

³³ Ne ini se anak nu ne edatu te langun ne menge Hudiyanen, ke menge kevuwaran ni Jacob. Uya, ini se kegkeratu din ne wara ketepusan din.”

³⁴ Migkahi si Maria riyà te suluhuen te, “Egkemenumenu be buwa ini? Su siaken ne matag nepasad se selengguni ne wara key pa mepakey ketà te meama.”

³⁵ Migkahi maa ke suluhuen te Eleteala te, “Iyan ma edalandalan keykew ke Kedesenan ne Ebpetuntul te Menusiyà, ne ke gehem te Eleteala ne ini en te keykew. Tembù be ini se igkeanak

nu ne berekat ne vatà ne iyan id-ingaran kandin ke Anak te Eleteala.

³⁶ Ne kenà ini rà se tudtul ku,” ke se suluhuen te Eleteala, “su arà se ayà nu si Elisabet ne kenà kun ed-anak ne ikeenem din en ne vulan te kehingeyan din misan lukes en sikandin.

³⁷ Su embiya Eleteala, ne egkeveelan din ke misan engkey en.”

³⁸ Nerineg dà ni Maria ne migkahi en te, “Berekat ne ed-ul-ulaan din en ini se migkahi nu kayi te kedì. Su siaken, ne Eleteala se ebayàbayà kedì.” Arà dà ne mid-ewean en dut te suluhuen te Eleteala si Maria.

Mibpendiyà si Maria Diyà te ki Elisabet

³⁹ Warà meuhet ne mibpenines si Maria ne mi-gaangaan migenat su ebpendiyà te senge inged diyà te buvungan lusud te Hudiya.

⁴⁰ Nekeuma si Maria riyà te valey en ni Zacarias ki Elisabet ne mibpenehetiat sikandin ki Elisabet.

⁴¹ Guna su nerineg ni Elisabet ke penehetiat ni Maria ne midwaleng ke vatà kayi te hetek din. Ne ke Kedesenan ne Ebpetuntul te Menusiyà se midlumun ki Elisabet.

⁴² Ne ruen impekahi rin ki Maria ne mibmerahing ke suwara rin te nekepemensag sikandin su kegkehalew rin se egkahi te, “Warà idsan nu ne meritan ne midtuvaran te Eleteala ne iring kayi! Ne engketà ded se kedtuvari dut te egkeanak nu!

⁴³ Maan buwa ke midekdekelà a te hinawa te Eleteala se iyan en ebpeengkayi te kedì ke iney rut te Kerenan ku?

44 Su nerineg ku rà sikew se ebpenehetiat ne midlehuwat te kegkehalew rin ini se kayi te hetek ku.

45 Tembù be midtuvaran ka, Maria,” ke si Elisabet, “su mibperetiyaya ka te egketuman iya ke impesabut kenikew dut te suluhuen te Eleteala.”

Ke Bayuk ni Maria te Edeyù te Eleteala

- 46 Migkahi si Maria te,
 “Mesarig se kedeyù ku rut te Kerenan ku,
 47 ne dekelà se kegkehalew ku
 dut te Eleteala ne ebpeliyu kedì;
 48 Su mibpemilì a nikandin ne edtuvaran din,
 misan engkayi te kevevaan a ne edsug-
 suhuen din.
 Igenat guntaani ne ini se kevuwaran,
 ne idtitinudtulà dan te siaken kun
 se midtuvaran te Eleteala
 dut te langun ne memeritan,
 49 su mekegeyip ke menge mid-ulaula
 dut te Eleteala kediey.
 Su Eleteala ne mekegegehem
 ne warà repeng din ke ngaran din.
 50 Igenat dut te pehaney ne kevuwaran
 taman te ketepusan ne kevuwaran,
 ne ibpekita rin ke kegkeyru rin
 dut te langun ne ebperumaruma kandin.
 51 Impekita rin ke gehem din dut te mid-ulaula
 rin,
 ne miburehey rin ke menge etew ne
 mepereyù
 su apey kenà dan en metuman ke intahù te
 itungan dan.

52 Ruen minge ratu ne metehel ne mibpekevava
din,
ne ke mepeembava ne minge etew ne
mibpekepuru din.

53 Ke minge etew ne layun en neirui,
ne mibehayan te Eleteala te kurang dan;
ugaid ke minge etew ne dewasa,
ne pineuli din te kuyaskuyas.

54-55 Wara melipati te Eleteala ke pasad din
dengan
dut te keep-epuan tew si Abraham
wey ke minge kevuwaran din.
Su midtevangan kiyu rin,
ini se minge sugshuen din
ne kevuwaran ni Israyil.
Egkeyruwan kiyu rin dema
te wara edtemanannya din,” ke si Maria,
“ini se minge kevuwaran ni Abraham ne
nepemili din.”

56 Neketetelu buwa ne vulan se ked-ubpa ni
Maria riyà te engki Elisabet ne arà pa ne mid-uli
sikandin.

Ke Kineanak Ki Juan Ke Ebpembunyag

57 Neuma ke hewii ne mid-anak si Elisabet ne
iyan din anak ne meama.

58 Guna su nerineg dut te minge etew riyà te
minge valey ne uvey ran wey ke minge suled
dan ini se keupiya te Eleteala ki Elisabet ne
nengehalew ran dema.

59 Neuma ke ikewalu ne hewii ne miburun dan
kayi te valey su edtumanen dan ini se betasan
dan te minge Hudiyanen te ed-etus. Iyan dan

perem id-ingaran kayi te vatà ne si Zacarias, idsangey red dut te amey rin,

⁶⁰ ugaid ne migkahi ke iney rin te, “Kenà egkepakey! Si Juan se ngaran din!”

⁶¹ Ne migkahi ran kayi te ki Elisabet te, “Ini se id-ingaran nu ne warà suled nu ne egkesangayan.”

⁶² Ne mid-uyawan dan ke amey rin ke engkey se kandin ne id-ingaran.

⁶³ Mid-uyew rema si Zacarias te ebpevehey sikandin te egkesuratan te ngaran, ne iyan din insurat se “Si Juan se ngaran din.” Guna su insurat din arà ne neinuinu nevenar ke menge etew.

⁶⁴ Arà dà iya ne nekelalag en si Zacarias ne nereyù din ke Eleteala.

⁶⁵ Langun dut te ruma rin ne neandek, ne nekeeneb en ke tudtul dan dut te langun ne menge etew ne mid-ubpà ketà te buvungan lusud te Hudiya.

⁶⁶ Langun te nekerineg ne neketahù te itungan dan ne mid-insà te, “Engkey buwa se ebuwatan kayi te batà ini?” Su mepayag nevenar se Eleteala se mibpengelintau kayi te vatà.

Ke Bayuk ni Zacarias

⁶⁷ Midlumunan dut te Kedesenan ne Ebpetuntul te Menusiyà si Zacarias ne ini se impelambas din ne lalag din, ke sikandin te,

⁶⁸ “Edeyù kiyu te Kerenan, ke Eleteala tew te menge kevuwaran ni Israyil. Su mibpengkayi sikandin te edtavang dut te sikitew ne menge etew rin,

ne ebehey kenitew te kebpekepeleyu kenitew.

⁶⁹ Ibpepengkayi rin en te keytew arà se mekegehém ne ebpelihaun keytew, ne kayi egketuntun te kevuwaran dut te edsugsuhuen din ne ratù tew rengan ne si David.

⁷⁰ Ini ve ke migkahi rin rengan impepevayà dut te menge etew ne ebpelambas te lalag din.

⁷¹ Su migkahi rin te ibpelihawang kiyu rut te menge kunterà tew wey riyà te edtingkungan te palad dut te menge etew ne egkeepes kenitew.

⁷² Migkahi rin dema te igkeyru rin ke menge keep-epuan tew, ne kenà din edlipatan ke pasad din kandan dengan.

⁷³ Mevaher ke pasad din dengan dut te keep-epuan tew ne si Abraham,

⁷⁴ su impasad din te ibpeliyu kiyu rut te palad te menge kunterà tew, su apey edtuman kiyu te kiyug din te warà kegkeandek,

⁷⁵ su apey egkelunsey se ked-erapa tew kandin wey metidtu kiyu riyà te etuvangan din taman te biviyag kiyu pà.”

Ne migkahi maa si Zacarias kayi te anak din te,

⁷⁶ “Ne sikew ini ne anak ku, iyan idtawag keykew ne ebpelambas te Lalag te Eleteala ne warà repeng din.

Su edsuhuen ka nikandin te ibpeuna dut te Kerenan tew, su ebpeketueanan te menge etew

te ebpenehana rut te kebpekeuma rin.

⁷⁷ Sikuna ke ebpesabut
te minge kevuwaran ni Israyil
te igkepeliyu dan
dut te kedusai kandan
embiya ebuyù dan te Eleteala
te kebpeseud te minge salà dan.

⁷⁸ Su ke Eleteala tew ne iiruwen wey melimù.
Ne ini se kebpepeliyu rin kenitew te kerusaan tew,
ne iring te kedsilà te andew
ne egkesilaan ke kerusireman.

⁷⁹ Ebpekereyahan te Eleteala ke kerusireman tew
su apey kenà kiyu en ed-elungen te kepepatey;
su apey langun tew ne melintad se keginggi-
nawa.”

⁸⁰ Ne nekeiseg-iseg en ke kerekelà te anak
en ni Zacarias ne mid-iseg en dema ke ketau
rin mekeatag te Eleteala. Guna su dekelà en
sikandin ne mibpendiyan en te tanà ne kenà
egkeubpaan te etew, ne ketà mid-ubpà taman te
neuma ke hewii te kebpenurù din te minge ke-
vuwaran ni Israyil mekeatag te Lalag te Eleteala.

2

Ke Kineanak ki Hisus (Mateo 1:18-25)

¹ Guna su iyan pà mepurù si Agustus rut te
inged ne Ruma ne ruen suhù din te langun te
minge etew ne ed-ubpà kayi te minge inged ne
egkekemalan din ne ebpesurat te ngaran dan.

² Ini pà ke neuna ne kebpesurat dan te ngaran
dan gewii te iyan midtendù ni Agustus ne gubine-
dur diyà te inged ne Siriya ne si Cirenio.

³ Ne langun ne minge etew ne mibpendiyà te uman inged ne mid-enakan kandan su ebpesurat te ngaran din.

⁴ Tembù be mibpendiyà si Jose kayi ebpuun te inged ne Nesarit lusud te Geliliya diyà te inged ne Bitlihim lusud te Hudiya su ini se inged ne Bitlihim ke mid-enakan dut te keep-epuan din ne datù dengan, si David.

⁵ Ne miduma ni Jose si Maria ini se raha ne nepenelenggunian din en su ebpesurat si Jose te ngaran din. Ne edrendayan en si Maria.

⁶ Guna su diyàn dan en te Bitlihim ne neuma en ke hewii te ked-anak din.

⁷ Ne iyan din anak ne meama ne penganey rin pà ini. Ne midsemputan din ini se vatà ne impeirehà din diyà te ebpekeenan te kudà su warà neirehaan dan diyà te valey ne ed-eranan su nepengkeg en te etew.

Mibpekitakita ke Menge Suluhuen te Eleteala te Menge Edtuganur te Menge Bilibili

⁸ Ne arà ne kerukileman ne ruen minge etew ne ebantey te minge bilibili ran diyà te ebpemetebtavan dan uvey te Bitlihim.

⁹ Ne netekew se ruen mibpekita kandan ne suluhuen te Kerenan riyà ebpuun te langit, ne mibpesilaan te Kerenan sikandan te raman din. Ne nengeandek dan nevenar.

¹⁰ Ne migkahi ke suluhuen kayi te kandan te, “Kenà kew meandek! Su midsuhù a ini te ebpepenudtulen keniyu te meupiya ne tudtul ne ebpekehalew te langun ne etew.

¹¹ Su ini ne kerukileman diyà te Bitlihim ke inged ni David rengan ne in-anak ke ebpeiyu keniyu dut te salà niyu. Su sikandin si Kristo ke Kerenan ne Impasad te Eleteala rengan ne Ebperetuen te langun.

¹² Ini se idtuus niyu te benar ini se migkahi ku keniyu te ebpekeuma kew riyà ne egkekita niyu ini se vatà ne midsemputan ne impeirehà riyà te ebpemekeenan te kudà.”

¹³ Ne seguguneey ne ruen mibpekita ne ruma rut te suluhuen ne medmerakel riyà ebpuun te langit ne mideyù dan ke Eleteala se egkahi te,

¹⁴ “Edeyù kiyu te Eleteala riyà te lesang te langit.

Ne kayi te ampew te dunya ne mebmelintad ke hinawa rut te menge etew ne ebpekesuhat te hinawa rin.”

¹⁵ Guna su mid-uli en diyà te langit ini se menge suluhuen ne mibpelelehahey ke menge ebantey te bilibili te, “Kuwa kew en su ebpendiyà kiyu te Bitlihim su apey tew egkekita ini se ned-ulaula ne mibpeketuanan te Kerenan keytew.”

¹⁶ Arà dà ne midahewrahew ran en mid-ipanew ne netuen dan en si Maria ki Jose ne nekita ran en ini se vatà ne impeirehà diyà te ebpemekeenan te kudà. Ne nekita ran dema si Maria wey si Jose ketà.

¹⁷ Guna su nekita en kayi te ebantey te bilibili ini se vatà ne impenu dtul dan en kandan ke migkahi rut te suluhuen mekeatag kayi te vatà.

¹⁸ Langun te nekerineg kayi te tudtul dut te ebantey te bilibili ne nengegeyip dan dut te nerineg dan.

19 Ne si Maria, ne kenà egkeawà te itungan din ini se tudtul dan su mibpegpegitung din upiani.

20 Ne ini se ebantey te bilibili, ne mid-ulì en. Ne wey ran mideyù te Eleteala rut te langun ne nerineg dan wey nekita ran su netuman en langun ke impenudtul kandan dut te suluhuen te Eleteala.

Mid-ingeranan ke Vatà ki Hisus

21 Guna su neume en ke ikewalu ne hewii ne mid-etusan dan en ini se vatà, su arà ke betasan te menge Hudiyanen, ne mid-ingeranan dan en ki Hisus. Su ini ke ngaran ne impenudtul ki Maria rut te suluhuen te Eleteala te misan warà pà sikandin mibpengeraring.

Intepeney si Hisus Dut te Lukes Din Diyà te Nekebpuru ne Valey te Eleteala

22 Neuma ke hewii ne edtumanen ni Jose ki Maria ini se betasan dan te ebehey te ibpelengesa riyà te Nekebpuru ne Valey te Eleteala riyà te Hirusalim su edumaan dan ke penduan ne intahak ni Moises rengan mekeatag te meritan ne behu pà ne mid-anak. Ne mibpeneheewit dan ke vatà diyà te Hirusalim su apey ran idtepeney te Eleteala.

23 Su edtumanen dan ke penduan ne impesurat te Eleteala rengan ne egkahi te, “Langun ne penganey ne meama ne idtepeney niyu te Eleteala.”

24 Ne ibehey ran dema ke ibpelengesa ne nekahi rut te penduan te Kerenan ne “deruwa ne timan ne limuken etawa deruwa ne timan ne melepatì.”

²⁵ Duen senge etew ne meama ne ed-ubpà ketà te Hirusalim ne ed-ingaranan ki Simeon. Metidtu se ulaula rin wey in-amin din ke hinawa rin te egelevek te Eleteala. Ne ebpemematì sikandin ke keenu ibpeliyu te Eleteala ke menge etew rin ne menge kevuwaran ni Israyil. Ne ke Kedesenan ne Ebpetuntul ne Menusiyà ne midlumun en ki Simeon.

²⁶ Ne daan en ne mibpeketuenan kandin dut te Kedesenan ne Ebpetuntul te Menusiyà te kenà pà ebpatay sikandin taman te kenà din mekita ke Mesiyas arà se Impasad te Eleteala ne Kerenan dengan ne Ebperetuen te langun.

²⁷ Ketà te hewii ne mibpeneheewit dut te lukes din si Hisus te edlusud kayi te Nekebpuru ne Valey te Eleteala su edtumanen ini se nekahi rut te penduan ne ketà en te lusud si Simeon su impelusud sikandin dut te Kedesenan ne Ebpetuntul te Menusiyà.

²⁸ Ne midsepipi ni Simeon ke vatà ne mideyù en te Eleteala se egkahi te,

²⁹ “Is Kerenan, midtuman nu en iya ke impasad nu kedì.

Ne misan keenu nu ebugkuta se niyawa ku ne egkepakey en,

su mibmelintad en se hinawa ku.

³⁰ Su nebentangan en iya kayi te mata ku ini se midtendù nu ne ebpeliyu kenami rut te keberedusaan dey.

³¹ Su mibpenehana nu sikandin su apey langun ne menge bansa ne ebpekekita.

³² Iring sikandin te rayag dut te menge etew ne kenà Hudiyannen

su apey ebmerayag ke tidtu ne ibayà dan te ebpendiyà te kenikew.

Uya, ini ve se vatà se ralan te kegkereyù dut te sikami ne menge kevuwaran ni Israyil ne nepemili nu.”

³³ Neselekawan ini se menge lukes dut te vatà kayi te migkahi ni Simeon mekeatag te anak dan.

³⁴ Impengeningeni ni Simeon te ebpeneuven dan te Èleteala, ne migkahi en sikandin kayi te ki Maria ke iney ni Hisus te, “Ini se batà ne daan en ne mibpemili te Eleteala ne tuus te Eleteala kayi te menge kevuwaran ni Israyil. Ke menge etew ne ed-engkenà kandin ne edusaan, ne ke menge etew ne edtelimà kandin ne ibpeliyu te Eleteala. Sikandin iya ke tuus ne riyà ebpuun te Eleteala kayi te sikandan, ugaid ne merakel se ed-engkenà kandin.

³⁵ Ne kayi te menge ulaula ran ne egkepeyahan ke intahù te itungan dan, ini se itungan dan ne in-eles dan dut te ruma ran. Ne sikuna, Maria,” ke si Simeon, “ne egkerupet se hinawa nu iring te nesuhat ka te meharang ne sundang.”

³⁶ Ne ruen dema meritan ne mibpelambas te Lalag te Eleteala ne ed-ingaranan ki Ana, anak ni Panuwil, ne kevuwaran ni Asir. Lukes en nevenar ini se meritan ne nekeesawa taman te pitu rà ne rahun

³⁷ ne nevalu en, ne nekedwalu nepulù en wey epat ne rahun se kegkevalu rin. Warà mid-awà sikandin kayi te Nekebpuru ne Valey te Eleteala. Merukilem meandew ne mideyù din ke Eleteala, ne ruen menge hewii ne kenà sikandin egkaan

su apéy rin meilut se kebpengeningeni rin te Eleteala.

³⁸ Nesoretaan dema sikandin te kinepeneheewit dut te vatà kayi te Nekebpuru ne Valey te Eleteala ne mid-uvey sikandin engki Maria ne mideyù ke Eleteala mekeatag ketà te vatà. Ne igenat ketà ne impesabut din en mekeatag kayi te vatà diyà te langun ne ebpenareng te Eleteala te kebpkepeliyu te minge kevuwaran ni Israyil.

Mid-ulì Dan Diyà te Inged ne Nesarit

³⁹ Guna su nepasad en ni Jose ki Maria te kedtuman dut te langun ne nekahi kayi te penduan te Kerenan ne mid-ulì dan en diyà te inged dan ne Nesarit, lusud te Geliliya.

⁴⁰ Ne mid-iseg en ini se vatà ne mekaherkaher se lawa rin ne metautau sikandin, ne dekelà se penaub te Eleteala kandin.

Ke Vatà ne si Hisus Diyà te Nekebpuru ne Valey te Eleteala

⁴¹ Uman rahun ne ebpendiyà ke lukes ni Hisus te Hirusalim su edtelavuk te Pista te Kedsehari te Suluhuen te Eleteala dut te minge apù dan dengan.

⁴² Guna su sepulù en wey deruwa ne rahun si Hisus, ne mibpendiyà dan en te Pista maan.

⁴³ Guna su neipus en ke minge hewii te pista ne migenat dan en se ed-ulì, ugaid ne mibpelintetahak si Hisus diyà te Hirusalim te warà metueni rut te minge lukes din.

⁴⁴ Iyan dan kunaan ke kayi red sikandin te minge ruma ran ne midlevundus dan en se ed-ipanew te neep-epunan. Ne arà pà ne

mibpemengà dan si Hisus kayi te menge suled dan wey menge ruma ran.

⁴⁵ Ugaid ne warà dan metuen, ne ketà ne midlived dan diyà te Hirusalim se ebpemengà.

⁴⁶ Ne iketelu rin ne andew ne arà pà ne netuen dan diyà te Nekebpuru ne Valey te Eleteala. Su riyà ebpemekibitiyara sikandin te menge meysterù te Hudiyanen se ebpemingeg te lalag dan wey ebpenginginaan din sikandan.

⁴⁷ Langun dan te ebpemingeg ki Hisus ne negeyip dut te ketau rin te edtavak te menge insà kandin.

⁴⁸ Nekita rà dut te menge lukes din ne neinuinu ran nevenar ne migkahi ke iney rin kayi te ki Hisus te, “Anak ku, maan ke mid-ulaula nu ini kenami? Neipeng-ipeng key te amey nu se ebpemengà kenikew.”

⁴⁹ Ne migkahi si Hisus kandan te, “Meambe ke mibpemengà kew pà kediey? Maa warà niyu metueni se kayi a mulà te valey te amey ku?”

⁵⁰ Ugaid ne warà dan mekesabut dut te meana kayi te migkahi rin.

⁵¹ Ne miduma en si Hisus kandan te ed-ulì diyà te Nesarit ne mibperumaruma sikandin kandan. Ne si Maria mulà ne intahù din langun ini te itungan din.

⁵² Ne nekeiseg en se kerekelà te lawa ni Hisus ne ke itungan din ne mid-iseg dema. Ne mid-iseg-iseg en se kebpekesuhat din te hinawa te Eleteala, ne engketà ded dema ke menge etew.

*Ke Kebpenurù ni Juan ke Ebpembunyag
(Mateo 3:1-12; Marcos 1:1-8; Juan 1:19-28)*

¹ Midsahadsahad en se menge rahun ne ini en ke ikesepulù en wey lelima ne rahun te kekgamal ni Tibiriyu rut te inged ne Ruma. Si Punsiyu Pilatu se midtendù din ne gubinedur dut te pruvinsiya ne Hudiya, si Hirudis se migkamal te pruvinsiya ne Geliliya, ne ke ari rin ne si Felipe se migkamal te menge pruvinsiya te Ituriya wey Terekunita, wey iyan migkamal te pruvinsiya te Ebeliniya ne si Lisanyas.

² Ne iyan menge mepurù dut te langun ne terebpelengesa te Eleteala rut te menge Hudiyanen ne si Anas wey Kayipas.

Si Juan be ini, ke anak ni Zacarias, ne riyà pà te tanà ne kenà egkeubpaan te etew ne diyan en meumai sikandin te lalag te Eleteala te ebperudsuen te helevek din.

³ Ketà ne migemew en si Juan ne mibayaan din ke langun ne menge inged uvey te wayig ne Hurdan. Ne mibpemesabut din ke menge etew se egkahi te, “Pemedsendit kew ne engkeri niyu ke meraat ne menge ulaula niyu, ne pemebunyag kew su apey ebpeseharen te Eleteala ke menge keberedusaan niyu.”

⁴ Ini se impenurù ni Juan ne netuman en ke impesurat ki Isayas ke mibpelambas te Lalag te Eleteala rengan se egkahi te,

“Duen etew riyà te tanà ne kenà egkeubpaan te etew

ne ebpenawag dut te menge etew
ne ed-uvey kandin, ke sikandin te,
‘Mehaan ebpekeuma ke Kerenan,

ihewani niyu ke ralan
 ne tidtuwa niyu ke ibayà din,
 ne iyan din meana ne tilaka niyu ke hinawa niyu
 su apey kew egkepenehana te kebpekeuma rin.

⁵ Langun te netempag ne edtembakan,
 ne langun ne ebpenuhartuhar ne ebpetahen.
 Ke dalan ne ebpenikùtikù ne ebpeketidtuwen
 ne ke mibuketur ne ralan ne edtilaken.

⁶ Ne ketà ne ibpekita te Eleteala te langun ne
 menusiya
 ke edsuhuen din ne ebpe liyu kandan.' "

⁷ Migkuludkulud ma se menge etew ne
 mibpengkayi te ki Juan su ebpemebunyag.
 Migkehiyan din sikandan te, "Iring kew te menge
 uled ne ebpelahuy dut te apuy! Mehaan en
 egkeuma ke kedusa te Eleteala keniyu. Engkey
 se midtarem keniyu te ebpekeliyu kew ketà ke
 ebpebunyag kew?"

⁸ Embiya benar ne mid-engkeran niyu ke
 meraat ne ulaula niyu, ne ipekita niyu kayi te
 ulaula niyu. Ne kenà kew egkahi te sikiyu ne
 kenà edusaan te Eleteala su kevuwaran kew ni
 Abraham. Su igkahi ku keniyu," ke si Juan,
 "misan ini se menge batu ne egkepebaluy te
 Eleteala ne etew ne tuney ne kevuwaran ni
 Abraham ne igkesambì keniyu.

⁹ Ne sikiyu ne iring te menge kayu ne kenà
 ebahas te meupiya, tembù be ebpilayen. Ne iring
 te nekekayew en ke adsa su ebpemilayen en ne
 edtimbag diyà te apuy."

¹⁰ Mid-insà ke menge etew kandin te, "Engkey
 en be se ed-ul-ulaan dey su apey key mekeliyu
 keniyen te egkehiyen nu?"

11 Ne migkahi si Juan te, “Ini se ul-ulaa nu, ke etew ne deruwa se velegkas din ne mebehey te etew ne warà velegkas din. Engketà ded maa ke egkekaan, ke etew ne ruen egkekaan din ne mebehey dut te etew ne warà kandin.”

12 Duen menge ebpevayad te buwis ne mibpengkayi te ki Juan su ebpebunyag. Ke sikandan te, “Meyterù, engkey en be se kenami ne ed-ul-ulaan?”

13 Ne migkahi si Juan te, “Embiya ebpevayad kew te buwis, ne kenà niyu ed-umani ke ibpevayad niyu.”

14 Ne ruen dema menge sundaru ne mid-insà kandin, ke sikandan te, “Nemenu sikami? Engkey se kenami ne ed-ul-ulaan?”

Ne migkahi si Juan te, “Engkeri niyu ini se kebpenguwa te pirak te kebpemehes niyu wey ini se kebpenguwa te pirak te etew ne edtevuan niyu. Kenà kew ebpeuman te sukey niyu kayi te kedlimbung niyu.”

15 Gewii rut te menge etew ne ebpevineg ki Juan ne mid-ilut se kebpemareng dan su iyan dan pegitungan ne si Juan ini ke Impasad te Eleteala dengan ne Ebperetuen te langun ne ed-ingeranan te Mesiyas.

16 Tembù migkahi si Juan diyà te kandan te, “Duen ebpeketundug kediey ne mepurù pà kedì su misan ke telumpà din ne kenà a edait ne ed-ekar. Wayig se ibunyag ku keniyu, ne sikandin ke migkahi ku ne ebpeketundug kedì ne ebunyag dema keniyu. Ke menge ebperetiyaya ne ebunyahan din te Kedesenan ne Ebpetuntul

te Menusiyà, ne ke kenà ebperetiyaya ne iyan din ibunyag ne apuy.

¹⁷ Geina te ibpesivey rin ke minge etew ne ebperetiyaya rut te minge etew ne kenà ebperetiyaya, ne iring sikandin te etew ne ruen teluung din su ed-ukap ne ibpelayap din ke ukap rut te rimahas. Ke rimahas ne idtahù din diyà te patil, ne ke ukap ne ebinsulan din te apuy ne kenà egkeevukan.”

¹⁸ Gewii te ibpesabut ni Juan te minge etew ini se Meupiya ne Tudtul te Eleteala ne inlehetlehet din kandan te mebpenehana ran ketà te migkahi rin ne ebpekeuma.

¹⁹ Ugaid ne si Hirudis ke egkamal kayi te inged ne Geliliya ne mibpengegkehiyan ni Juan su mid-ahew ni Hirudis ke ipag din ne si Hirudiyas ke esawa te ari rin ne si Felipe. Ne kenà arà dà se meraat ne mid-ulaula ni Hirudis ne impengahikahi ni Juan kandin su merakel pà lavew se meraat ne mid-ulaula rin.

²⁰ Huna su nerineg ini ni Hirudis, ne midrun-tuwan din pà lavew ke meraat ne ulaula rin su impevilanggù din si Juan.

*Ke Kebunyag ki Hisus
(Mateo 3:13-17; Marcos 1:9-11)*

²¹ Guna su langun dut te etew ne nebunyehan en ni Juan ne arà pà ne mibpengkayai si Jesus te ki Juan su ebpebunyag kandin. Ne ketà ne mibpengeningeni si Hisus te Eleteala, ne gewii rin te ebpengeningeni ne iring te nevukaan ke langit

²² ne midudsuk ke Kedesenan ne Ebpetuntul te Menusiyà kayi te ki Hisus ne midragid te melepati. Ne ruen suwara ne riyà ebpuun te langit ne migkahi te, “Sikew ke anak ku ne igkelimù ku nevenar, ne nekesuhat ka nevenar te hinawa ku.”

*Ke Keep-epuan ni Hisus
(Mateo 1:1-17)*

²³ Guna su menge tetelu en nepulù se rahun ni Hisus ne midrudsù te helevek din ne mibpeveelan kandin te Eleteala. Iyan itungan te menge etew ne tuney ne anak sikandin ni Jose.

Si Jose ini ne anak ni Heli,

²⁴ si Heli ne anak ni Matat,
si Matat ne anak ni Levi,
si Levi ne anak ni Milki,
ne si Milki ne anak ni Hani,
si Hani ne anak ni Jose,

²⁵ si Jose ne anak ni Matatiyas,
si Matatiyas ne anak ni Amos,
si Amos ne anak ni Nahum,
si Nahum ne anak ni Isli,
si Isli ne anak ni Nagey,

²⁶ si Nagey ne anak ni Maat,
ne si Maat ne anak ni Matatiyas,
si Matatiyas ne anak ni Simi,
si Simi ne anak ni Jose,
si Jose ne anak ni Huda,

²⁷ si Huda ne anak ni Huwana,
si Huwana ne anak ni Risa,
si Risa ne anak ni Surubabil,
si Surubabil ne anak ni Selatil,
si Selatil ne anak ni Niri,

28 si Niri ne anak ni Milki,
si Milki ne anak ni Adi,
si Adi ne anak ni Kusam,
si Kusam ne anak ni Ilmudam,
si Ilmudam ne anak ni Iyir,
29 si Iyir ne anak ni Josue,
si Josue ne anak ni Eliezer,
si Eliezer ne anak ni Hurim,
si Hurim ne anak ni Matat,
si Matat ne anak ni Levi,
30 si Levi ne anak ni Simeon,
si Simeon ne anak ni Huda,
si Huda ne anak ni Jose,
si Jose ne anak ni Hunan,
si Hunan ne anak ni Iliyakim,
31 si Iliyakim ne anak ni Miliya,
si Miliya ne anak ni Meinan,
si Meinan ne anak ni Matata,
si Matata ne anak ni Natan,
si Natan ne anak ni David,
32 si David ne anak ni Isai,
si Isai ne anak ni Obid,
si Obid ne anak ni Buus,
si Buus ne anak ni Salmun,
si Salmun ne anak ni Naasun,
33 si Naasun ne anak ni Aminadab,
si Aminadab ne anak ni Admin,
si Admin ne anak ni Arni,
si Arni ne anak ni Isrum,
si Isrum ne anak ni Piris,
si Piris ne anak ni Huda,
34 si Huda ne anak ni Hakub,
si Hakub ne anak ni Isaac,
si Isaac ne anak ni Abraham,
si Abraham ne anak ni Tiri,

si Tiri ne anak ni Nakur,
³⁵ si Nakur ne anak ni Serug,
 si Serug ne anak ni Ragaw,
 si Ragaw ne anak ni Peleg,
 si Peleg ne anak ni Ibir,
 si Ibir ne anak ni Sala,
³⁶ si Sala ne anak ni Kainan,
 si Kainan ne anak ni Erpaksad,
 si Erpaksad ne anak ni Sim,
 si Sim ne anak ni Noe,
 si Noe ne anak ni Lamic,
³⁷ si Lamic ne anak ni Matusalin,
 si Matusalin ne anak ni Enok,
 si Enok ne anak ni Harid,
 si Harid ne anak ni Mehelelil,
 si Mehelelil ne anak ni Kainan,
³⁸ si Kainan ne anak ni Inus,
 si Inus ne anak ni Sit,
 si Sit ne anak ni Adan,
 si Adan ne anak te Eleteala.

4

Ke Kinepenggeram ki Hisus (Mateo 4:1-11; Marcos 1:12-13)

¹ Guna su nebunyehan en si Hisus diyà te wayig te Hurdan, ne mid-awà dutun ne midlumunan nevenar dut te Kedesenan ne Ebpetuntul te Menusiyà ne mid-ewit en sikandin diyà te tanà ne kenà egkeubpaan te menge etew.

² Ne ketà ne lusud te neked-epat nepulù ne hewii ne mibpenggeraman en si Hisus ni Setanas ke datù te pekaid. Ne ini ne menge hewii ne warà bulug mekekaan sikandin ne ketà ne nevitil nevenar si Hisus.

³ Ne migkehiyan ni Setanas ke datù te pekaid si Hisus te, “Embiya sikuna en ke Anak te Eleteala ne pebeluya nu ini se batu ne pan.”

⁴ Ne migkahi si Hisus te, “Iyan insurat ne Lalag te Eleteala ne egkahi te, ‘Kenà egkeenen dà se igkeuyag te etew.’ ”

⁵ Ne ketà ne mid-ewit ni Setanas si Hisus te edtegekereg ne seperek mata ne impekita rin ki Hisus ke langun ne inged kayi te ampew te dunya.

⁶ “Ini se kebayaàbaya kayi te langun ne inged ini ne ibehey ku keykew,” ke se datù te pekaid, “wey langun ini ne kekewesai, su langun imbe kayi ne imbehey kedì ne igkevehey ku te piya engkey ne egkesuatan ku.

⁷ Langun din ini ne kenikew en embiya ed-arap ka kedì.”

⁸ Ne migkahi si Hisus te, “Ruen impesurat ne Lalag te Eleteala ne egkahi te, ‘Iyan niyu rà erapa ne Kerenan ne Eleteala niyu, ne sikandin dà se ebperumdumaan niyu.’ ”

⁹ Ne ketà maa ne mid-ewit dut te datù te pekaid si Hisus diyà te inged ne Hirusalim dutun te migketikangan dut te Nekebpuru ne Valey te Eleteala ne migkahi sikandin te, “Embiya benar ne sikew ke Anak te Eleteala ne umpak ka ruen.

¹⁰ Su ruen impesurat ne Lalag te Eleteala ne egkahi te,

‘Edsuhù ke Eleteala te minge suluhuen din ne ebpetugenuren keykew.’

¹¹ Ne ruen dema ketà ne egkahi te,

‘Edsepirawen ka nikandan su apey kenà egkerudruri

ke minge paa nu te batu.' ”

¹² Ne migkahi si Hisus te, “Ugaid ne ruen dema Lalag ne impesurat te Eleteala ne egkahi te, ‘Kenà kew baal te ralan ne ibpenggeram niyu te gehem dut te Kerenan ne Eleteala niyu.’ ”

¹³ Guna su netuenan dut te datù te pekaid te kenà din egkepenggeraman si Hisus ne mid-ewaan din pà.

*Midrudsù si Hisus te Helevék Din
(Mateo 4:12-17; Marcos 1:14-15)*

¹⁴ Mid-uli en si Hisus diyà te Geliliya ne ke gehem te Kedesenan ne Ebpetuntul te Menusiyà ne ini en te kandin. Ne nekeeneb en dut te langun ne nekelingut ne inged ke tudtul mekeatag ki Hisus.

¹⁵ Mibpenurù sikandin diyà te minge valey ne ebppedgian te minge Hudiyanen ne nekereyù kandin ke langun ne minge etew.

*Warà Mibperetiyyaya te Penurù ni Hisus Diyà
te Inged Din ne Nesarit*

(Mateo 13:53-58; Marcos 6:1-6)

¹⁶ Ne arà pà ne midlaus si Hisus diyà te Nesarit, ke inged ini ne kayi en mibukelid sikandin. Neuma se Hewii ne Id-imeley ne mibpendiyà sikandin te valey ne ebppedgian te Hudiyanen te penduan dan su ini se kandin ne ulaula. Guna su nevrurun dan en ne mid-itindeg en si Hisus su ebasa te Lalag te Eleteala.

¹⁷ Induwal dan en kandin ke insurat ni Isayas, senge etew ne mibpelambas te Lalag te Eleteala rengan. Ne mibekar ni Hisus ini se insurat ketà te egkahi te,

18 “Ke Kedesenan ne Ebpetuntul te Menusiya
ne riyà ebpuun te Kerenan ne Eleteala
ne midlumun en kediey,
ne mibpemilì a te Kerenan ne Eleteala
su apey ku ibpesabut
dut te menge etew ne ayuayu
ke Meupiya ne Tudtul.
Ne mibpeveyaan din kedì
apey ku mepenudtuli te egkevelukasan
ke menge etew ne nevakù ni Setanas;
ne ebpengeulian ke menge pisek
su apey ran ebpekekita;
ne ebpelihawang dut te menge edtekutaken.

19 Midsuhù a rin dema su apey ku mepenudtul
te ini en ke timpu te kebpeliyu te Kerenan ne
Eleteala
te kandin ne menge etew.”

20 Ne midlulun ni Hisus ke ebesaan ne in-
ulì din diyà te mibehey kandin ne mibpinuu
sikandin se ebpenurù kandan. Ne langun ne
menge etew ketà ne rutun dà mepuhuy ke mata
ran te kandin su ebpemineg.

21 Ne migkahi sikandin kayi te kandan te, “Ini
se nekahi rut te impesurat te Eleteala ne mibasa
ku ne netuman en gunteani te ini ini en iya ne
nerineg niyu.”

22 Langun dut te nevurun ketà ne nevenaran
dut te kebpenerù din, ne negeyip dan dut te
keupiya te kedlalag din, ke sikandan te, “Maa,
kenà anak ni Jose ayan?”

23 Migkahi si Hisus te, “Ruen beseenan tew
ne igkesuati niyu ves te egkahi kayi te kedì ini
se egkahi te, ‘Embiya ebpemawì ka ne etew, ne

bawii nu ke lawa nu.' Ne seveka maa buwa ne egkekahi niyu te, 'Ruen nerineg dey ne mid-ulaula nu riyà te inged ne Kapirnawum, ne kun imbe ul-ulaa nu rema kayi te keykew ne inged.'

²⁴ Ugaid," ke si Hisus, "ini se igkahi ku keniyu, warà etew ne ebpelambas te Lalag te Eleteala ne ebpeminehen te menge etew diyà te kandin ne inged.

²⁵ Benar ini se egkehiyen ku keniyu, iring ini se ed-ul-ulaan niyu guntaani rut te timpu rengan ne biviyag pà si Elias ke mibpelambas te Lalag te Eleteala. Su nekedtetelu ne rahun wey enem ne vulan ne warà uran, ne nesuhat te bitil ke langun ne inged din, ne merakel se menge ruma tew ne Hudiyanen ne nevalu ne meritan ne ebpengerehenan ketà te bitil.

²⁶ Ugaid ne warà ma suhua te Eleteala si Elias te ebpetevangan te senge etew kandan, nasì ne impependiyà si Elias te senge etew ne valu ne ed-ubpà te Scripta, lusud te Sidun.

²⁷ Ne ruen pà maa," ke si Hisus, "gewii rema ni Eliseo te mibpelambas te Lalag te Eleteala ne merakel se menge Hudiyanen ne mibpendaru te kevuwa ne muna te it-it. Ugaid ne warà seveka kandan ne mibpevawian te Eleteala ki Eliseo, nasì ne impependiyà si Eliseo te senge etew ne kenà Hudiyanen ne si Naaman lusud te inged ne Siriya."

²⁸ Nerineg dut te menge etew ne nevrurun ketà se migkahi ni Hisus te edtavang ke Eleteala te kenà Hudiyanen, ne neepes-epes dan nevenar.

²⁹ Mid-itindeg dan ne migeweran dan si Hisus ne midtuyuk dan se ebpependiyà te puntur te

tuhar su ketà metahù ke inged dan, ne idtimbang dan perem si Hisus diyà te dempilas.

³⁰ Ugaid ne mibpeniyuksiyuk si Hisus diyà te kandan ne midlevundus en se ed-ipanew.

*Midsegseg ni Hisus ke Vusew ne Midsuuk te Meama
(Marcos 1:21-28)*

³¹ Ne midlaus si Hisus diyà te Kapir nawum, inged ne lusud te Geliliya. Ne neuma ke Hewii ne Id-imeley ne mibpenurù din ke menge etew.

³² Nerineg dan ke kebpenurù din, ne neinuinu ran nevenar su ruen gehem te kebpenurù din.

³³ Ketà te valey ne ebppedgian dan te penduan dan ne ruen senge etew ne midsuukan te vusew. Nekita rin dà si Hisus ne migkuleyì te,

³⁴ “Hey Hisus ne riyà ebpuun te Nesarit, engkey se kememeniyà nu kayi te sikami ne vusew? Maa, edereetan key nikuna? Egkekilala ku sikuna su sikuna ke Berekat ne Anak te Eleteala!”

³⁵ Ne pineengked en ni Hisus ke vusew se egkahi te, “Engked ka rà, ne awà ka kenian te meama ayan!” Ne intimbag pà dut te vusew ini se meama kayi te etuvangan te menge etew, ne mid-awà sikandin ugaid ne warà din mekeiri ini se meama.

³⁶ Ne rekelà se kinekegeyip dut te langun ne menge etew ketà ne mibpein-inseey ran te, “Engkey ve vuwa ini? Su utew rekelà se gehem din te ebpeawà te menge vusew, ne ebpeining dan kandin.”

³⁷ Arà dà ne nekeeneb en ke tudtul te mid-
ulaula ni Hisus diyà te langun ne nekelingut ne
inged.

*Neulian ni Hisus ke Mibpenderaru ne Etew
(Mateo 8:14-17; Marcos 1:29-34)*

³⁸ Guna su mid-awà si Hisus kayi te valey ne
ebpengedian te menge Hudiyanen te penduan
dan, ne mibpendiyà te valey ni Simon. Seretà
din ketà ne edetengen ke enuhang ni Simon ne
meritan, ne mibuyù dan ki Hisus te bawii rin.

³⁹ Mid-uvèy si Hisus dut te meritan ne pineawà
din ke rateng. Arà dà ne neawà en ke rateng
din ne mid-engew sikandin ne mid-ilutù en te
ibpekaan kandan.

⁴⁰ Guna su ebpengirum-irum en ne langun ne
menge etew ne ruen дума ran ne ebpenderaru
te misan engkey en ne daru ne mibpeneheewit
dan kayi te ki Hisus. Ne midampen din ke uman
senge etew ne neulian en.

⁴¹ Ne misan ke menge vusew ne impeawà din
dut te menge etew ne edteverehen dan. Ne
embiya ebpeewaen en ini se vusew ne egkuleyì
dan te, "Sikuna ke Anak te Eleteala!"

Ugaid ne pineengked ni Hisus sikandan su
kenà din idluhut ne edlalag dan su netuenan
dan te sikandin ke Impasad te Eleteala rengan
ne Ebperetuen te langun.

⁴² Guna su egkeriwaswas en ne mid-awà si
Hisus ketà te inged ne mibpendiyà sikandin
te sibsideyan. Mibpemengà sikandin dut te
menge etew ne guna su netuen dan sikandin
ne imbangan dan perem su apey kenà mekeawà
diyà te kandan.

⁴³ Ugaid ne migkahi si Hisus kandan te, “Kenà egkepakey ne kenà ku ibpendiyà te menge etew diyà te ruma ne inged su ibpesabut ku rema kandan ini se Meupiya ne Tudtul mekeatag dut te Impasad te Eleteala ne Ebperetuen te langun su ini ke insuhù kediey te Eleteala.”

⁴⁴ Ketà ne midlevundus en mebpenurù si Hisus diyà te menge valey ne ebpengedian te Hudiyanen diyà te lusud te Hudiya.

5

Duen Menge Meama ne Mibpemili ni Hisus ne Edumdumaan Din

(Mateo 4:18-22; Marcos 1:16-20)

¹ Senge hewii ne riyà si Hisus te beyvey te ranew ne ed-ingaranan te Ginisarit, ne merakel se etew ne egkeasek su ed-uvey ran su ebpemineg dan te Lalag te Eleteala ne ibpenurù din.

² Nekekita si Hisus te deruwa ne avang ne inampil diyà te gebgevasan su mid-ewaan pà te menge kemuney su ebpenggasgas te biyala ran.

³ Mid-erà si Hisus diyà te seveka ne avang ne avang ni Simon, ne migkehiyan din si Simon te, “Ibpetulud pà arà se avang din te malù ebpekeriyù dut te beyvey.” Ketà ne mibpinuu si Hisus se ebpenurù dut te merakel ne etew.

⁴ Nekeipus si Hisus se ebpenurù ne migkehiyan din si Simon te, “Purai niyu en be ini se avang nu riyà te kalud ne pemiya kew en su apey kew ebpekeutel.”

⁵ Migkahi si Simon te, “Nepewpewaan key en se ebpemiya ne warà key en iya mekeutel,

ugaid embiya arà se kahi nu ne ebpemiyala key maa.”

⁶ In-antug dan ke biyala ran ne nevenbenaran dan te serà ne neutel dan su reisek samà ne egkereetan ke biyala ran.

⁷ Ne nekekapey ran dut te minge ruma ran diyà te senge evangan su ebpeamung dan. Nekeuma ran ne wey ran intahù kayi te deruwa ne avang ini se serà ne neutel dan ne reisek dà ne egkeered dan en su elin nepenùpenù.

⁸ Nekita rà ni Simon Pedro ini se ned-ulaula ne nekepenimbuel sikandin diyà te etuvangan ni Hisus se egkahi te, “Kenà ka ed-uvey kedi, Kerenan, su beredusa a ne etew.”

⁹ Iyan din kinekahi ketà ne negeyipgeyip nevenar sikandin abpeg ke minge ruma rin dut te neutel dan.

¹⁰ Ne neinuinu rema ini se minge ruma ni Simon te ebpemiyala ne en si Santiago wey si Juan, ke minge anak ni Sibidyu.

Ne migkehiyan ni Hisus si Simon te, “Kenà ka meandek! Engkayi kew en ne дума kew kediey su serà se ebpemiyalaan niyu guntaani, ugaid ne ebpenuruen ku pà sikiyu te iyan niyu mulà egkeutel ne minge etew ne eduma kedi.”

¹¹ Ne in-ampil dan ke minge avang dan diyà te gebgevasan ne mid-ewaan dan en ini langun su miduma ran ki Hisus.

Neulian ni Hisus ke Senge Etew ne Kevuwaen ne Muna pà te It-it

(Mateo 8:1-4; Marcos 1:40-45)

¹² Senge hewii ne riyà si Hisus te inged ne ruen meama ne nelumbus ke lawa rin te kevuwa ne

muna pà te it-it. Nekita rin si Hisus ne midnunut-nunut en se ed-uvey kandin ne mibpemuyù en se egkahi te, “Mama, embiya perem egkiyug ke rà ne egkeulian nu ini se meredsik ne sakit ku.”

¹³ Arà dà ne midampen ni Hisus ke meama se egkahi te, “Uya, egkiyug a, meulii ka!” Arà dà se nekahi rin ne neawà en ke sakit dut te meama su neulian en.

¹⁴ Ne mid-il-ilutan en ni Hisus te egkahi dut te meama te, “Kenà nu ve imbe kegkehiya ini te misan endei en, ugaid ne riyà ka tilandeng te terebpelengesa ne ibpekita nu kandin te neulian ke en. Ne ivehey nu ve kandin ke ibpelengesa te Eleteala ne insuhù dengan ni Moises dut te menge etew ne neulian te sakit dan ne kevuwa su apey metueni te langun te neulian ke en.”

¹⁵ Ugaid ne nasì en ne nekeeneb ke tudtul mekeatag te mid-ulaula ni Hisus, ne migkulud-kulud se menge etew ne mibpengkayi te kandin su ebpemineg te penurù din wey ebpemewawì te menge raru ran.

¹⁶ Ugaid ne mid-ewaan din ke merakel ne menge etew su mibpendiyà sikandin te tanà ne warà etew rin ne ketà mibpengeningeni.

Neulian ni Hisus ke Meama ne Minatey se Tevi ne Lawa Rin

(Mateo 9:1-8; Marcos 2:1-12)

¹⁷ Senge hewii ne ebpenurù si Hisus ne ruen menge Peresiyu wey menge meyerù te penduan te Hudiyänen ne midtelavuk ketà. Riyà dan ebpuun te uman inged lusud te Geliliya, ne uman inged lusud te Hudiya, wey diyà dema ebpuun te

inged ne Hirusalem. Ne ruen gehem te Eleteala te kebpemawì te raru ne riyà te ki Hisus.

¹⁸ Ne ruen nekeuma ne minge etew ne ed-ewit te meama ne ed-id-irehà dà diyà te duyanà ne minatey se tevì ne lawa rin. Edlusud perem ini se minge etew ne edyayung su apey ran igkerenà diyà te sineruwan ni Hisus.

¹⁹ Ugaid ne geina te merakel ne etew ne warà egkepeveyaan dan diyà te kandin. Ketà be ne mibatun dan ne midlekatan dan ke atep ne midtuntun dan ini se meama diyà te luuk te minge etew diyà te sineruwan ni Hisus.

²⁰ Guna su netuenan ni Hisus te rekelà ke sarig dan kandin ne migkehiyan din ke ederaru te, “Mama, nepesehad en ke keberedusaan nu.”

²¹ Guna su nerineg dut te minge meyerù te penduan te Hudiyannen wey ke minge Peresiyu ne ebpinuu ketà ne kehingginawa ran te, “Èngkey uvag etawa ini se edsumpalit te Eleteala? Warà etew ne ebpekepesahad te salà embiya kenà ke Eleteala!”

²² Ugaid ne netuenan ni Hisus ke netahù te itungan dan ne migkehiyan din sikandan te, “Meambe ke netahù te itungan niyu se iring kenian?”

²³ Endei rapit se melemu,” ke si Hisus, “te egkahi riyà te minatey se lawa rin te, ‘Ke minge salà nu ne nepesehad en’ etawa ve egkahi te, ‘Enew ke en ne luluna nu ke ikam nu ne ipanew ke en’?”

²⁴ Guntaani ne ibpekita ku keniyu,” ke si Hisus, “te ruen gehem dut te Impeanak te Menusiyà te ebpesahad te salà kayi te ampew te dunya.” Ne

migkehiyan din en ke meama ne minatey se tevi ne lawa rin te, “Mama, enew ke en ne luluna nu ke ikam nu ne uli ke en.”

²⁵ Arà dà iya ne mid-enew en ke meama ne midlulun din ke ikam din ne mid-uli en se edeyù te Eleteala dut te keupiya rin kandin.

²⁶ Langun dan ne netemenengan dan kayi te nekita ran. Ne mideyù dan te Eleteala se egkahi te, “Mekegeyip iya nevenar ini se nekita tew guntean!”

*Mibpemili ni Hisus si Levi
(Mateo 9:9-13; Marcos 2:13-17)*

²⁷ Guna su neipus ini ne mid-ipanew en si Hisus ne nekita rin ini se senge etew ne meama ne ebpevyad te buwis ne ed-ingeranan ki Levi ne ebpinuu riyà te upisinà din. Ne migkehiyan ni Hisus sikandin te, “Duma ka kedì.”

²⁸ Arà dà ne mid-itindeg si Levi ne mid-ewaan din ke langun su miduma ki Hisus.

²⁹ Ne senge hewii ne mibair si Levi te kevu-runan diyà te baley rin su ed-inggaten din si Hisus. Merakel se midtelavuk, ne menge ruma ni Levi ne ebpevyad te buwis wey merakel pà ne etew rema se mibpengan ne ruma ran.

³⁰ Guna su nekita rut te menge Peresiyu wey ruma ne menge sakup dan ne menge meyterù te penduan ne dutun te uvey te valey ne nevruran te ini se menge etew ne ebpemeked-erungut ki Hisus ne netegtehaad ne mibpendiyà dan te menge edumdumaan ni Hisus se ebpemivig te, “Meambe ke edseveka kew se egkaan kayi te

menge etew ne ebpevayad te buwis wey ini se menge etew ne mekesesalà?”

³¹ Migkahi si Hisus te, “Ke menge etew ne warà daru ran ne kenà dan ebpegungeyà te terebawì, ugaid ne ke menge etew rà ne duen daru ran.

³² Iring din ded be rema kayi te ini se menge etew su kenà iyan ku kinepengkayì se iyan ku ebpeuveyen ne ke menge metidtu kun se ulaula ran, ugaid ne apey ebpekedsendit ke menge etew ne meraat se ulaula ran.”

Ke Insà Mekeatag te Menge Edumdumaan ni Hisus ne Edlimpas te Egkaan

(Mateo 9:14-17; Marcos 2:18-22)

³³ Duen menge etew ne mibpengkayì te ki Hisus ne migkahi te, “Duen hewii dut te menge edumdumaan ni Juan ne edlimpas dan te egkaan su apey kenà dan egkevangan dut te kebpenge-ningeni ran. Ne iring din ded dema ke menge edumdumaan te menge Peresiyu. Ugaid ne keykew ne menge edumdumaan ne kenà edlimpas se egkaan wey ed-inum.”

³⁴ Ne midsempità si Hisus te, “Embiya ruen egkewingan, maa edlimpas be te egkaan ke menge etew ne mid-inggat te ini pà ke ibpenge-sawa te kandan? Kenà en iya!

³⁵ Ugaid ne ruen hewii ne egkeuma ne egkeawà ke ibpengesawa diyà te kandan, ne ketà pà sikandan edlimpas te egkaan.”

³⁶ Ne ketà maa ne insempità ni Hisus te kenà egkepakey ne ebpegembiten ke behu ne penurù din wey ke raan ne betasan te keep-epuan dan, ke sikandin te, “Warà etew ne ebisey te behu pà

ne belegkas su idapi te belegkas ne redit en. Su embiya ini se ed-ul-ulaan din ne midereetan din ke behu ne belegkas, ne ini se dapi ne behu pà ne kenà edait dut te redit en ne velegkas.

³⁷ Ne iring din ded dema, " ke si Hisus, "ke behu pà ne tebà su kenà egkepakey ne riyà idtahù ini te raan en ne edtehuan ne lundis te kambing. Su embiya ini se ed-ul-ulaan din ne edsevu ke tebà ne ebetu ke raan ne lundis ne midtehuan, ne edturayas ke tebà ne egkereetan dema ke midtehuan ne lundis.

³⁸ Tembù be iyan be kemeyidan ne ke behu pà ne tebà ne idtahù te edtehuan ne behu pà ne mibeelan.

³⁹ Ne warà etew, " ke si Hisus, "ne nekeinum en te raan en ne tebà ne egkiyug ne ed-inum pà te behu ne tebà su egkahi sikandin te, 'Ke raan en se meupiya ne teba.' "

6

Ke Insà Mekeatag te Hewii ne Id-imeley (Mateo 12:1-8; Marcos 2:23-28)

¹ Senge hewii ne Sepetu, ke Hewii ne Id-imeley, ne midtarà si Hisus wey ke menge edumdumaan din diyà te pareyanan. Ne gewii ran te edtarà ne ebpengurib ke menge edumdumaan ni Hisus te parey ne idsungit dan.

² Ne ruen ketà menge Peresiyu ne migkahi te, "Meambe ke ed-ul-ulaan niyu ini se ebpekesurang te Penduan tew ne egkahi te warà egelevek te hewii ne id-imeley?"

³ Ne migkahi si Hisus te, "Maa, warà niyu mevasa ke impesurat te Eleteala mekeatag te

mid-ulaula ni David, ke datù tew rengan? Su ruen hewii ne sikandin wey ini se menge sundaru rin ne nengevital dan.

⁴ Ne midlusud si David diyà te insivey ne Valey te Eleteala ne migkuwa rin ke egkeenen ne indenà diyà te Eleteala ne migkaan sikandin ne mibehayan din ke menge ruma rin. Ugaid ne kayi te penduan tew ne kenà arà egkekaan te piya engkey ne etew su ke menge terebpelengesa rà te Eleteala.”

⁵ Ne migkahi pà maa si Hisus te, “Ke Impeanak te Menusiyà ke ebayàbayà te egkahi te engkey se edait ne ed-ul-ulaan dut te Hewii ne Id-imeley.”

Ke Meama ne Nekeyengkeng se Belad Din

(Mateo 12:9-14; Marcos 3:1-6)

⁶ Senge Hewii maa ne Id-imeley ne mibpendiyà si Hisus te valey ne ebppedgian te menge Hudiyenen ne mibpenurù. Ne ruen ketà senge etew ne meama ne nekeyengkeng se kewanan ne velad din.

⁷ Duen dema ketà menge Peresiyu wey menge meysterù te penduan ne ebpenipat ki Hisus embiya egkeulian din ini se etew te arà ne hewii ne id-imeley su ebpemengaan dan ke engkey se kegkesuhat dan ki Hisus te kevenar.

⁸ Ugaid ne netuenan en ni Hisus ke netahù te itungan dan ne migkehiyan din en ke meama ne nekeyengkeng se velad din te, “Mama, itindeg ka kayi te uvey ku.” Ne mid-itindeg en ke meama ne mid-uvey en ki Hisus.

⁹ Ne migkahi en si Hisus dut te menge etew ne nevurun ketà te, “Duen id-insà ku keniyu: Engkey ma se nekahi te penduan tew ne idtuhut

ne ed-ul-ulaan tew te hewii ne id-imeley? Maa, edtavangan tew ke menge ruma tew etawa ebpemekeiran tew sikandan? Maa, edsumpatan tew ke umur te menge ruma tew etawa ed-imetayan tew?”

¹⁰ Ne insihid din ke mata rin dut te langun ne menge etew ne migkehiyan din ke meama ne nekeyengkeng se velad din te, “Mama, ketenga nu ayan se velad nu.” Ne ketà ne migketeng dut te meama ke velad din, ne neulian en.

¹¹ Ketà ne neregret te langet dan ke menge Peresiyu wey ke menge meyerù te penduan ne mibpein-inseey ran en ke engkey se ed-ul-ulaan dan ki Hisus.

Mibpemilì ni Hisus Ke Sepulù wey Deruwa ne Edumdumaan Din
(Mateo 10:1-4; Marcos 3:13-19)

¹² Nengepiraan ketà ne midtekereg si Hisus diyà te buvungan su ebpengeningeni, ne nepew-pewaan se kebpengeningeni rin te Eleteala.

¹³ Nepawà ne miburun din ke langun ne menge etew ne edurumaruma kandin ne mibpemilì sikandin te sepulù wey deruwa ne edumdumaan din ne mid-ingeranan din te Apustulis.

¹⁴ Iyan dan ngaran ini se nepemilì din ne si Simon (ke ed-ingaranan dema ki Pedro) wey ke ari rin ne si Andres, si Santiago wey si Juan, si Felipe wey si Bartolome,

¹⁵ si Mateo wey si Tomas, si Santiago ne anak ni Alfeo, wey si Simon (ne ed-ingaranan dema te Patriat ne iyan din meana ne diralem se lengesa rin dut te inged din),

¹⁶ si Hudas ne anak ni Santiago wey si Hudas Iskeriyuti ne ed-ulug ki Hisus diyà te munge kunterà din.

*Neulian ni Hisus Ke Munge Ebpenderaru
(Mateo 4:23-25)*

¹⁷ Ne midtupang si Hisus wey ke munge nepemili din ne mid-engked dan ketà te malù mepatag. Ne ketà ne ruen nevrurun ne merakel ne etew ne edurumaruma kandin wey munge etew ne riyà ebpuun te langun ne munge inged lusud te Hudiya, ne riyà ebpuun dema te Hirusalim, wey riyà ebpuun te munge inged ne Tiru wey Sidun diyà te beyvey te rahat.

¹⁸ Mibpengkayi ran su ebpeming te kebpenurù ni Hisus wey ebpevawì dema te munge raru ran. Duen kayi te munge etew ini midtevereg te vusew ne neulian ni Hisus.

¹⁹ Ne langun ne munge etew ne migeram midsinagkew ki Hisus su ruen gehem din ne ketà ebpuun te kandin ne ebpekeuli te munge raru dut te langun dan.

*Ke Benar ne Kehelawan
(Mateo 5:1-12)*

²⁰ Ne midtengtangan ni Hisus ke munge edumdumaan din ne migkahi en te,
“Dayirayi kew ne munge ayuayu,
su sikiyu ke edetuan te Eleteala.

²¹ Dayirayi kew ne munge egkevital guntaan,
su ebpeke vulungan kew te Eleteala keuremà.
Dayirayi kew ne munge egkemutu guntaan,
su egkehalewhalew kew keuremà.

22 Dayirayi kew ke egkeepesan kew te munge etew ne kenà kew nikandan edsehipaan, ne ebpenempelaen kew, wey egkahi ran te mereatey kew su kayi egenat dut te keduma niyu ke Impeanak te Menusiyà.”

23 “Su iring kayi ke imped-ulaula te keep-epuan dan dut te munge etew ne mibpelambas te Lalag te Eleteala rengan. Egkehalew kew ke ini se egketemanan niyu ne id-idangdang kew su dekelà se lalew ne ebpenerengen niyu diyà te langit.

24 Ugaid ne mekeruanduan kew ne munge kew wasa guntaan, su nepehinlelawan niyu ke meupiya ne egketemanan niyu kayi.

25 Mekeruanduan kew ne ebpengevolung guntaan, su ruen timpu ne egkevital kew keuremà. Mekeruanduan kew ne nengehalew guntaan, su ruen timpu ne egkemutu kew wey ebpekesinehew kew keuremà.

26 Mekeruanduan kew ke edeyuen dut te langun ne munge ruma niyu, su ini se mid-ulaula te keep-epuan dan dengan, su mibpendeyù dan ke mibèbeelan dà ne mibpelambas te Lalag te Eleteala.”

Ke Penurù ni Hisus Mekeatag te Kedlimù Ta te Menge Kunterà Ta

(Mateo 5:38-48; 7:12a)

27 Ne migkahi pà maa si Hisus te, “Iyan ku igkahi keniyu, langun niyu ne edtaan te telinga

niyu, ne limui niyu ke minge kunterà niyu, ne upiani niyu ke hinawa niyu rut te egkengeepes keniyu.

²⁸ Ipengeningeni niyu te ebpeneuven te Eleteala ke minge etew ne ebpenrawak keniyu, ne ke minge etew ne ed-ayuaya keniyu ne ipengeningeni niyu sikandan.

²⁹ Embiya ruen etew ne edtabpì te naping niyu ne kenà kew bangen ke edtebpien din ke divaluy. Embiya ruen etew ne ed-ahew te kumbalà niyu ne kenà kew bangen ke egkuan din ke belagkas niyu ne kemisita.

³⁰ Embiya ruen etew ne ebuyù keniyu ne behayi niyu, ne embiya ruen etew ne egkuwa te keglehan niyu ne kenà niyu en ewia.

³¹ Ne misan engkey ne egkiyuhan niyu ne ibped-ulaula te minge etew keniyu, ne iring ketà dema se ul-ulaa niyu riyà te kandan.

³² “Embiya iyan niyu rà igkelimù ke minge etew ne egkelimù keniyu, ne meambe ke ebpenareng kew te kebpenaub te Eleteala keniyu? Su misan ke minge beredusa ne igkelimù dan dema ke minge etew ne egkelimù kandan.

³³ Ne embiya iyan niyu rà ed-upianan ke minge etew ne ed-upiya keniyu, ne meambe ke ebpenareng kew te kebpenaub te Eleteala keniyu? Su misan ke minge beredusa ne ed-upiya ran dema rut te minge etew ne ed-upiya kandan.

³⁴ Ne embiya iyan niyu rà ebpeutangen ke minge etew ne kenà duwaruwa ne ebpekevayad, ne meambe ke ebpenareng kew te kebpenaub

te Eleteala? Su misan ke munge beredusa ne ebpeutang dema rut te munge beredusa embiya kenà duwaruwa ne ebpekevayad.

³⁵ Ugaid ne sikiyu, iyan ku igkahi keniyu ne limui niyu ke munge kunterà niyu ne upiani niyu ke ed-ul-ulaan niyu kandan. Embiya ebpeutang kew ne kenà niyu pegitunga te kebpevayad ne ketà ne rekela se idlalew keniyu. Su embiya ini se ed-ul-ulaan niyu, ne egkekita kayi te keniyu te sikiyu ne munge anak en te Eleteala ke mepmepurù te langun. Su melimù ke Eleteala misan diyà te munge etew ne warà te hinawa ran ke tavang din wey ke munge etew ne meraat se ulaula ran.

³⁶ Tembù be keyru kew te ruma ne etew iring dut te kegkeyru te Amey niyu riyà te langit kayi te langun niyu.”

*Ke Penurù ni Hisus Mekeatag te Kedsawey ta
(Mateo 7:1-5)*

³⁷ Ne migkahi pà maa si Hisus te, “Kenà kew edsawey te ruma ne etew, ne kenà kew edsewayan te Eleteala. Kenà niyu imesara te egkahi te nevenaran ke ruma ne etew ne kenà ed-imasad ke Eleteala te egkahi te nevenaran kew. Pesehara niyu ke salà te ruma ne etew ne ebpeseharen te Eleteala ke salà niyu.

³⁸ Behayi niyu ke ruma ne munge etew ne ebehayan kew rema te Eleteala. Ne iyan din ibehay keniyu ne ed-ip-ipenuen din ne ed-eseseken din ne arà pà ne eberundtuwan din ke ibusbus ketà te edtehuan niyu. Su ke kerekela

te ibehey niyu te ruma ne etew ne iyan ded kerekela te ibehey te Eleteala keniyu.”

³⁹ Ne mibpenempita si Hisus te, “Embiya ruen etew ne pisek, ne kena egkepakey ne edtuyuk te etew ne pisek ded dema. Su embiya elin dan pisek ne ebpeked-unung dan se egkeulug diyà te lepak.

⁴⁰ Ne wara etew ne ebpepenuru pa ne iyan en mepuru dut te ebpenuru kandin, ugaid ne embiya netamat din en ke langun ne impenuru kandin ne ebpekeiring en dut te mibpenuru kandin.”

⁴¹ Ne ruen pa maa migkahi ni Hisus, ke sikandin te, “Meambe ke edturikan nu ke sala te ruma nu ne iring te pesek, ugaid ne wara ma te hinawa nu te ruen sala nu ne iring te gedgeran kerekela din?

⁴² Engkey se kedtika nu te egkahi riyà te ruma nu te id-awa nu ke pesek din, ugaid ne ruen ma nekepeseke kenikew ne iring te gedgeran kerekela din ne kena nu egketuasan? Engkey en ayan ne kedtaruru! Unai nu pa te ed-awa ke nekepeseke kenikew ne iring te gedgaran ne an pa ne ebpekekita ke en ne ebpengawa te pesek te ruma nu.”

Ke Ulaula te Menge Etew ne Ebpekeiring te Bahas te Kayu

(Mateo 7:16-20; 12:33-35)

⁴³ Duen pa maa migkahi ni Hisus, ke sikandin te, “Ke kayu ne meupiya se kegueyhuey rin, ne kena ebahas te meraatey. Ne iring ded maa ke kayu ne ruen sakit din, ne kena ebahas te meupiya.

⁴⁴ Su piya engkey ne kayu ne kayi nu egketueni te bahas din. Su kenà ebahas ke sepinit te paras, ne kenà ebahas ke merevuaya te igira.

⁴⁵ Ne engketà ded dema se menge etew,” ke si Hisus, “su ke etew ne meupiya se ulaula rin, ne meupiya rema se kedlalag din su meupiya se intahù te hinawa rin. Ugaid ke etew ne mereatey se ulaula rin, ne mereatey rema se kedlalag din su iyan din intahù te hinawa rin ne mereatey. Su piya engkey se intahù te etew te hinawa rin ne ini se egemew te bèbà din.”

*Ke Deruwa ne Etew ne Ebevaley
(Mateo 7:24-27)*

⁴⁶ Ne ruen pà lavew migkahi ni Hisus, ke sikandin te, “Meambe ke layun a niyu ed-ingerani te ‘Kerenan’, ugaid ne kenà kew ma eduma rut te igkahi ku keniyu?”

⁴⁷ Idtarem ku keniyu ke engkey se egkeiringan dut te menge etew ne ed-uvey kedì ne ebpemineg te lalag ku ne ebperumdumaan dan.

⁴⁸ Embiya idsempita ta ne iring sikandin te etew ne riyà mebevaley te mevaher. Pehaney ne migkekalut sikandin te meralem ne midtehuan din te rekelà ne batu ne arà pà ne imbunsud din ke pelaus. Nepasad ini se valey ne midalem ke wayig ne nerumpak te wayig ini se valey, ugaid ne warà mekugal ke valey su midtegtehamaan ma.

⁴⁹ Ugaid ne ke etew,” ke si Hisus, “ne ebpemineg kedì ne kenà din ebperumdumaan ke lalag ku ne iring sikandin te etew ne riyà mebevaley te ebpengesal-esalen dà diyà te pantad. Nepasad

ini se valey ne nerumpak te dalem, ne arà dà ne nerundus en ne newahey en.”

7

Neulian ni Hisus ke Edsugsuhuen dut te Senge Etew ne Mepurù

(Mateo 8:5-13)

¹ Nekeipus si Hisus se ebpenurù te menge etew ne mibpendiyà sikandin te inged ne Kapir-nawum.

² Duen ketà te inged kepitan ne kenà Hudiyanen ne egkamal te menge sundaru ne ruen edsugsuhuen din ne meama ne egkepesangan su iyan deruwa se kebpatay. Ne dekelà te hinawa te kepitan ini se edsugsuhuen din.

³ Guna su nerineg dut te kepitan se kebpemawì ni Hisus te daru ne midsuhù sikandin te menge pekilukesen ne Hudiyanen su ebpeengayen ki Hisus su apey meulii ini se edsugsuhuen din.

⁴ Nekeuma ran kayi te ki Hisus ne midsebenar dan mibpemuyù kandin se egkahi te, “Metidtevangi arà se kepitan ne dait ne edtevangen nu sikandin.

⁵ Ne kenà deisek dà ke hinawa rin kayi te langun tew ne menge Hudiyanen, su sikandin se mibpeitindeg ketà te valey ne ebpengedian tew.”

⁶ Ne miduma en si Hisus kandan.

Iyan dan kebpeingguma riyà te valey te kepitan ne impesinuhung en dut te kepitan te menge ruma rin ne ini se impekahi rin dut te midsinuhung ki Hisus, “Mama,” ke sikandin, “misan kenà ke en edlaus diyà te valey ku su kenà a dait ne ebpemenayakan nu.

⁷ Tembù be warà a medsinuhung keykew su kenà a rema edait. Dekelà se gehem nu ne misan igkahi nu te, 'Meulii sikandin,' ne egkeulian ini se edsugsuhuen ku.

⁸ Nesebutan ku ini su siaken ne ruen mepurù ku ne meperumaruma a kandin. Ne ruen menge sundaru ne egkemalan ku ne meperumaruma ran kediey. Su egkahi e rà te, 'Diyà kew,' ne iring dan te ebelesiken. Ne engketà ded ke egkahi a te, 'Kayi kew,' ne seperek mata ne kayi ran en. Ne embiya edsuhuen ku ini se edsugsuhuen ku te, 'Ul-ulaa nu ini,' ne arà en iya rema se ed-ulaan din. Iring de be kayi misan edlelehan nu rà ne egkeulian ini se sugsuhen ku."

⁹ Nerineg ni Hisus ini, ne neinuinu nevenar sikandin. Ne mibengkiring sikandin dut te merakel ne etew ne ed-eguyut kandin ne migkahi en te, "Igakahi ku ini te warà pà mekeuma te etew ne iring kayi kerekelà se sarig din kediey misan kayi te langun ne kevuwaran ni Israyil!"

¹⁰ Mid-ulì en ini se impesinuhung ki Hisus, ne guna su nekeuma ran diyà te valey te kepitane ne neulian en ini se edsugsuhuen.

Mibanew ni Hisus ke Anak ne Meama Dut te Valu ne Meritan

¹¹ Nengepiraan be maa ketà ne mibpendiyà si Hisus te inged ne ed-ingaranan te Nain. Ne denda se menge etew ne miduma kandin abpeg ke menge edumdumaan din.

¹² Guna su ebpelelinguma ran ketà te belvelakan te inged ne nekesinuhung dan te merakel ne etew ne ebelanting te minatey. Ini se

ebelentingen ne minatey ne budtung ne anak ne meama te meritan ne valu, ne merakel se menge etew riyà ebpuun te inged ne miduma kayi te valu te edleveng.

¹³ Nekita ni Hisus ke iney rut te minatey ne neyru nevenar sikandin ne migkahi en te, “Kenà ka edsinehew, Ayà.”

¹⁴ Ne mid-uvey en si Hisus ne migeweran din ke lungun ne mid-itindeg ke menge meama ne ebelanting. Ne migkehiyan ni Hisus ke minatey te, “Mama, enew ka!”

¹⁵ Arà dà ne mid-enew en ke minatey ne midlalag en. Ne migkahi en si Hisus kayi te iney rin te, “Ini en, Ayà, ke anak nu.”

¹⁶ Langun dan te nekekita ne netemenengan, ne nekereyù dan te Eleteala se egkahi te, “Ini pè be ne neumaan ki te metmetehel ne ebpelambas te Lalag te Eleteala. Benar, impekita te Eleteala ke kedtavang din te ebpeiyu dut te menge etew ne mibpemilì din.”

¹⁷ Nekeeneb en ini se mid-ulaula ni Hisus kayi te lusud te Hudiya wey riyà dema te nekelingut ne inged.

*Ke Menge Midsuhù ni Juan Diyà te ki Hisus
(Mateo 11:2-19)*

¹⁸ Guna su nerineg dut te menge edumdumaan ni Juan ke Ebpembunyag ini se langun ne mid-ulaula ni Hisus ne imperineg dan ki Juan diyà te bilengguan. Ne midtawag si Juan te deruwa rut te edumdumaan din,

¹⁹ ne midsuhù din diyà te ki Hisus te ebpeinsà kandin te, “Menu, sikuna ke impesabut ni Juan

ne ibpepengkayi te Eleteala etawa ruen duma pà ne egkepenareng dey?”

20 Nekeuma ran ne migkahi ran te, “Iyan dey lakew te mibpengkayi ne midsuhù key ni Juan ke Ebpembunyag su ibpeinsà kenikew ke embiya sikuna en iya ke impesabut din ne ibpepengkayi te Eleteala etawa ruen ruma pà ne egkepenareng dey?”

21 Ne arà dema ne hewii ne ruen merakel ne etew ne neulian ni Hisus dut te menge daru ran wey menge sakit. Mibpenegseg din ke menge vusew ne edamung-amung kandan, ne impeulit din ke kebpekekita rut te menge pisek.

22 Ne migkahi si Hisus diyà te menge suhù ni Juan te, “Uli kew en diyà te ki Juan ne penudtula niyu kandin ini se nekita niyu ne mid-ulaula ku wey ini se nerineg niyu ne migkahi ku. Iyan niyu peketueni kandin ne kayi ebpuun te kediey ne nekeulit en se kebpekekita rut te menge pisek, nekeipanew en ke menge pungkù, neulian en ke menge kevuwaen, nekerineg en ke menge bengel, neuyag en ke menge minatey wey impesabut ku ke Meupiya ne Tudtul diyà te menge ayuayu.

23 Ne peketueni niyu kandin,” ke si Hisus, “te dayirayi nevenar ke etew ne kenà eduwaruwa kediey.”

24 Guna su mid-ulì en ke menge suhù ni Juan ne midlalag en si Hisus mekeatag ki Juan diyà te denda ne menge etew ne nevrurun, ke sikandin te, “Ketà te kinependiyà niyu te ki Juan diyà te tanà ne kenà egkeubpaan te menge etew, ne engkey se mibpenareng niyu ne egkekita niyu?”

Maa, ebpnareng kew te ebpekekita kew te etew ne iring te karan ne edsemsemeren te keramag?

²⁵ Engkey ve iya, etew ne mibevelegkas te nepenù te rayandayan? Kenà buwa su ke etew ne mibevelegkas te iring ketà ne meupiya nevenar se egketemanan din ne riyà niyu rà egkekita te turuhan te menge ratù.

²⁶ Engkey ve iyan se mid-intengan niyu? Engkey, etew ne ebpelambas te Lalag te Eleteala? Arà imbe! Ugaid ne igkahi ku keniyu te arà se nekita niyu ne labi pà dut te etew ne ebpelambas te Lalag te Eleteala.

²⁷ Su si Juan ini ke impeuna kediey ne nekahi te Eleteala rut te impesurat ne Lalag din rengan ne egkahi te,

‘Duen edsuhuen ku ne ibpeuna ku keykew

te kebpekepenehana rut te menge etew te kebpekeuma nu.’ ”

²⁸ Ne migkahi pà maa si Hisus te, “Tentenuri niyu ini, warà pà etew ne in-anak kayi te ampew te dunya ne ebpekerepeng ki Juan ke Ebpembunyag. Ugaid ne misan ke kevevaan en ne etew dut te langun ne Edetuan te Eleteala diyà te langit ne labi pà ki Juan.”

²⁹ Ini se migkahi ni Hisus ne nerineg en dut te langun ne etew ketà misan ke menge ebpevayad te buwis ne egkehiyen ne mekebeberedusa. Ne mibpehimbenar dan te metidtu ke menge petiralan te Eleteala ne mibpebunyag dan ki Juan.

³⁰ Ugaid ke menge Peresiyu wey ke menge meysterù te penduan te Hudiyanen ne mid-

engkenà dan dut te ibpetuman te Eleteala kandan, ne warà dan mebbebunyag ki Juan.

³¹ Ne migkahi pà maa si Hisus te, “Ini se menge etew te huntaanì en, engkey se ebpeiringan ku?”

³² Iring dan en iya te menge vatà ne ebpemimpinuu riyà te kevrunan. Ed-umew ini se senge puntuk diyà te menge ruma ran te,

‘Midlebpad key, ugaid ne warà kew medsayew! Mibminudar key, ugaid ne warà kew medsine-hew!’

³³ Iring din ded dema ke kebpekeuma ni Juan ke Ebpembunyag, su nekita niyu te edlimpas te kegkaan si Juan ne kenà dema ed-inum te piya engkey ne ebpeketevereg ne iyan niyu migkahi se, ‘Midsuukan sikandin te vusew!’

³⁴ Ne mibpengkayi ke Impeanak te Menusiyà ne nekita niyu te migkaan sikandin wey mid-inum ne iyan niyu maa migkahi se, “Tengtengi niyu ma ayan se midelungan te bitil! Ne metehel ne ed-inum! Ne teleduma kayi te ebpevayad te buwis wey misan ke menge etew ne kenè en birang.’

³⁵ Ugaid,” ke si Hisus, “ketà te menge ulaula te menge etew ne tidtu ne mibperetiyaya te Eleteala ne nekeheram te limù din ne egkekita te utew metau ke Eleteala te langun ne petiralan din.”

Diyà si Hisus te Baley ni Simon, senge Etew ne Peresiyu

³⁶ Duen senge etew ne Peresiyu ne mid-ingat ki Hisus diyà te valey rin su riyà din ebpekeena. Ne miduma si Hisus kandin ne nekeuma ran ne mibpeer-erungutey ran en se egkaan.

³⁷ Ketà te inged ne ruen senge etew ne meritan ne warà keeleran din. Nerineg din se riyà egkaan si Hisus te valey te Peresiyu ne mibpendiyà sikandin se ed-ewit te pelanaan ne mibeelan te elibastru ne midtehuan te periyemut ne mepurù nevenar.

³⁸ Ne mid-uvey ki Hisus dapit te paa rin se edsinehew ne nengeulug se luwà din kayi te paa ni Hisus. Ketà ne mibpunasan din en te bulvul din, ne mid-erekan din, ne mibusbusan din en kayi te lana ne meemut nevenar.

³⁹ Nekita kayi te Peresiyu ne mid-inggat ki Hisus, ne ke hingginawa rin te, “Embiya benar ne ebpelambas te Lalag te Eleteala si Hisus ne egketuenan din ke engkey ini se meritan ne edsapu kandin wey ini se warà keeleran din!”

⁴⁰ Ketà ne migkahi en si Hisus kandin te, “Simon, duen igkahi ku kenikew.”

“Ew, engkey?” ke si Simon. “Kehiya nu en.”

⁴¹ Ne mibpenempità si Hisus kandin, ke sikandin te, “Duen deruwa ne etew ne nekeutang diyà te etew ne ebpemeutang te kureta ne lelima nehatus se mid-utang dut te senge etew, ne mid-utang ke seveka te lelima nepulù ne pirak.

⁴² Ne guna su kenè en ebpekevayad ini se deruwa ne mid-utang ne migkahi ke mid-utangan dan te, ‘Beleharen en ke utang niyu.’ Ne mid-insà si Hisus ki Simon te, ‘Endei rapat kandan ini te deruwa se egkelimù nevenar ketà te meama ne mibpeutang kandan?’ ”

⁴³ Ke si Simon te, “Arà buwa se dekelà se utang din ne warà din en peveyari.”

Ke si Hisus te, “Arà iya!”

44 Midsineruwan ni Hisus ke meritan ne migkehiyan din si Simon te, “Iring ded be imbe kayi te meritan ini. Su mibpemenayik a kayi te valey nu ne warà a nu behayi te ibpepenlùlù te paa ku misan ini ke betasan tew. Ugaid ne sikandin mulà ne midlùluan din te luwà din ke paa ku ne mibpunasan din te bulvul din.

45 Warà a nu en iya gelhelawa te ked-arek dut te kebpepemenayik ku te valey nu misan ini ke betasan tew. Ugaid ne ini mulà se meritan ne mibpulungpulung en mid-arek te paa ku igenat te kebpekeuma ku.

46 Warà nu petehisi ke ulu ku te lana misan ini ke betasan tew te kebpeed-edatey. Ugaid ne sikandin mulà ne mibusbusan din ke menge paa ku te belielehà ne periyemut.

47 Tembù migkahi ku ini,” ke si Hisus, “su misan dekdekelà se salà din ne mibpesahad en te Eleteala su dekdekelà se limù ne impekita rin kediey. Ugaid ke etew ne reisek se keberedusaan din ne mibpesahad te Eleteala, ne reisek dema se limù ne ibpekita rin.”

48 Ne migkahi en si Hisus ketà te meritan te, “Mibpesahad en te Eleteala ke keberedusaan nu.”

49 Ne ruen netahù te hinawa rut te menge etew ne migkaan ketà ki Hisus, ke hingginawaran te, “Engkey ini ne etew se ebpekepesehad te keberedusaan te etew?”

50 Ne migkahi pà maa si Hisus ketà te meritan te, “Nekeliyu ke en te kedusa te Eleteala te salà nu su kenà duwaruwa ke kedsarig nu te Eleteala.

Na, uli ke en, ne menu ma ke edumaan ka te Eleteala!”

8

Ke Menge Meritan ne Midtuganur ki Hisus

¹ Nengepiraan ne hewii ketà ne mibpendiyà si Hisus te ruma ne menge inged, dekelà wey deisek, ne mibpesebutan din dut te menge etew ketà ke Meupiya ne Tudtul mekeatag te Kedetui te Eleteala te menge etew. Ne miduma kandin ke sepulù wey deruwa ne edumdumaan din.

² Duen dema ketà menge meritan ne miduma kandan ne nengeulian te menge daru ran, ne ruma kandan ne pehaney ne mid-em-emungan te vusew ugaid ne midsegseg ni Hisus. Senge etew kandan ne si Maria (ne mid-ingaranan dema ki Magdalena) ne mibpenegsehan ni Hisus te pitu ne vusew.

³ Ne ruen dema ketà si Juana ke esawa ni Kusa, ne midserihan ni Hirudis ke mepurù dan diyà te turuhan din. Si Susana rema wey merakel pà ne meritan ne miduma engki Hisus su edtuganur kandan te egenat te pentiyari ran.

Ke Etew ne Midsawed te Beni (Mateo 13:1-9; Marcos 4:1-9)

⁴ Iring ma te edtevir se menge etew ne mibpengkayi te ki Hisus ne kayi egenat te ebalàbalà ne menge inged. Guna su merakel se nevirun ketà ne mibpenempità si Hisus kandan se egkahi te,

⁵ “Ruen etew ne mibpendiyà te pengengewiran din su edsawed te benì. Ne ketà te kinesawed

din ne ruen benì ne nengeulug diyà te kilid te ralan ne nengehiekan te etew ne midtuktuk en te menge pepenuk.

⁶ Duen ruma ne insawed din ne riyà nengeulug te kebetuwan. Midtuvù ini ugaid ne mehaan dà ne neebmas su edsahad dà ke wayig.

⁷ Duen dema insawed din ne riyà nengeulug te sepinitan. Ne midtuvù ini ugaid ne migkubmusan en dut te sepinit.

⁸ Duen ded dema insawed din ne riyà nengeulug te meupiya ne tanà ne midtuvù ini ne nekevahas te meupiya su mibpengupiya nevenar se bahas din.”

Ne migkahi pà maa si Hisus te, “Itaan niyu ve ke telinga niyu kayi te nerineg niyu.”

Midseysey ni Hisus ke Atag dut te Menge Sempità

(Mateo 13:10-17; Marcos 4:10-12)

⁹ Ne mid-insà ke menge edumdumaan din te, “Engkey se meana rin ini se sempità ne imperineg nu kenami?”

¹⁰ Ne migkahi si Hisus kandan te, “Sikiyu en imbe se ebpesebuten te Eleteala rut te warà din pà impayag te piya engkey ne etew mekeatag dut te kedatù din te menge etew. Ugaid ke ruma ne menge etew ne ibpepevayà te sempità su apey, misan edtengteng dan, ne kenà dan ebpekekita; ne misan egkerineg dan, ne kenà dan egkesebutan ke meana rin.”

Mibpesebutan ni Hisus ke Meana dut te Sempità Mekeatag te Etew ne Midsawed te Benì

(Mateo 13:18-23; Marcos 4:13-20)

¹¹ Ne migkahi pà maa si Hisus dut te edumdu-maan din te, “Ini se meana rin arà se sempita ku: Ke benì ne insawed dut te etew ne arà ke Lalag te Eleteala.

¹² Ke ralan ne neuluhan te benì ne arà ke menge etew ne nekerineg te Lalag te Eleteala, ugaid ne midegdehawen ni Setanas ke datù te pekaid te ed-ahew ke lalag su apey kenà dan mekeperetiyaya ne kenà dan egkepeliyu.

¹³ Ne ke kebetuwan ne neuluhan te benì ne arà ke menge etew ne nekerineg te Lalag te Eleteala ne ingkehalew ran te ebpeming ne mibperetiyaya ran, ugaid ne mehaan dà se kineperetiyaya ran su warà mekedalid te hinawa ran. Ne wey ran penggerami ni Setanas dut te peretiyaya ran ne midlekà dan en.

¹⁴ Ne ke sepinitan ne neuluhan te benì ne arà ke menge etew ne nekerineg te Lalag te Eleteala, ugaid ne gewii ran te ebpetindalan ne merakel se egkubmus dut te lalag ne nerineg dan iring te kemutuwan dan te ked-ubpà-ubpà, ne kekgelilingey ran dut te menge kearen dan, wey ke pegungayà te kebpata te nanam, ne warà dan en mekeuma te kebehas dan.

¹⁵ Ne ke meupiya ne tanà ne neuluhan te benì, ne arà ke menge etew ne nekerineg te Lalag te Eleteala ne midtelimà dan ne warà dan midsanggal se ebperetiyaya. Ne mibpenemtem-anan dan te edtuman taman te nekeuma ran te kebehas.”

*Ke Sempità ni Hisus Mekeatag te Sulù ne Mibpelengkevan
(Marcos 4:21-25)*

16 Ne migkahi en maa si Hisus te sempità kandan te, “Warà etew ne midtemtem te sulù ne ebpelengkevan din etawa ibperalung din. Ugaid ne riyà din ibpeluukluuk te saag su apey egkerayahan ke etew ne edlusud.

17 “Iring din ded dema,” ke si Hisus, “langun te netelevan guntaani ne ebpekepehawahawa red dut te akir din ne hewii. Ne langun ne impegelesà ne egkepayahan ded.

18 Itaan niyu ve ke telinge niyu,” ke si Hisus. “Su ke etew ne idtahù din te hinawa ke ibpesabut kandin te Eleteala, ne ed-umanan pà te Eleteala ini se kebpekesabut din. Ugaid ke etew ne kenà din idtahù te hinawa ke ibpesabut kandin te Eleteala, ne egkeawà arà se reisek ne kunaan din ne nesebutan din en.”

Ke Impetimbang ni Hisus te Iney Rin wey Menge Suled Din

(Mateo 12:46-50; Marcos 3:31-35)

19 Nekeuma en ke iney ni Hisus wey ke menge ari rin ne meama, ugaid ne warà dan mekeuvey ki Hisus su neterektek te etew sikandin.

20 Ne ruen migkahi ki Hisus te, “Ke iney nu wey ke menge ari nu ne riyà te lihewangan su ebpekibalak dan keykew.”

21 Ugaid ne migkahi si Hisus dut te menge etew ketà te, “Iyan ku iney wey menge ari ne ke menge etew ne ebpemingeg te Lalag te Eleteala wey ebperumdumaan dan.”

Impeengked ni Hisus ke Keramag Diyà te Ranew

(Mateo 8:23-27; Marcos 4:35-41)

²² Senge hewii ketà ne migkehiyan ni Hisus ke edumdumaan din te, “Kuwa kiyu en su ed-apet kiyu riyà te ripag te ranew.” Arà dà ne mid-untud dan te avang ne mibpuridtas dan en.

²³ Guna su ed-avang-avang dan en ne mid-saharan si Hisus te turug. Ne midtekewtekw en se mevandes ne keramag kayi te ranew ne nesimbuan en te wayig ke avang dan, ne reisek samà ne egkeherà dan en.

²⁴ Mid-uvey ran si Hisus ne mibpukew ran en se egkahi te, “Meyterù, egkeherà ki en!”

Ne mid-enuw si Hisus ne pineengked din en ke keramag wey ke dekelà ne baleg. Arà dà ne mid-eneng-eneng en ke keramag wey baleg ne seguguneey ne midlengen ke ranew.

²⁵ Ne migkehiyan din en ke menge edumdu-maan din te, “Meambe ke nengeandek-andek kew? Maa kenà kew ves edsarig kediey?”

Ne neandek-andek dan ne neinuinu ran su mibpein-inseey ran te, “Engkey ini ne etew? Su misan ke keramag wey menge baleg ne ebperumaruma rut te lalag din!”

Neulian ni Hisus ke Meama ne Midsuukan te Menge Vusew

(Mateo 8:28-34; Marcos 5:1-20)

²⁶ Ne nekerunggù en ensi Hisus dut te telipag te pruvinsiya te Geliliya, diyà te sakup te inged te menge Gerisiyanu.

²⁷ Guna su migaun en si Hisus ketà te avang ne midsinuhung en sikandin te senge etew ne

midsuukan te vusew ne andang ne mehinged ketà te Gerisiyanu. Ugaid ne neuhet en ne warà mid-ulì sikandin te ubpaan din su kayi en mid-ubpà te minge surung ne penlelevengan ne warà en seseberen din.

²⁸ Nekita rin dà si hisus ne midrawak en ne midlumpeng diyà te sineruwan ni Hisus ne mibensag en se egkahi te, “Sikuna ini si Hisus ke Anak te Eleteala ne warà repenge din. Engkey ma se kememeniyà nu kediey? Isapà nu te etuvangan te Eleteala te kenà a nu pemekeiri!”

²⁹ Ini se mibuyù din su migkehiyan ni Hisus arà se vusew te ibpeawà diyà te meama. Su kenà kepipira rà ewita arà se meama dut te vusew ne ebpemekaid kandin. Ne misan ebekuen ke paa rin wey ke velad din te kedina ne ebentayan te minge etew ne ebpengevidtew rin ded ne ed-ewiten en maa sikandin dut te vusew diyà te tanà ne kenà egkeubpaan te etew.

³⁰ Ne migkehiyan en ni Hisus sikandin te, “Engkey ma se ngaran nu?”

Ne midtavak te, “Iyan ku ngaran ne si Selasà.” Tembù nekahi rin ini su medmerakel ne vusew se midsuuk kandin.

³¹ Ne mibpemuyù dan ki Hisus te kenà dan ibpeawà ni Hisus se ibpependiyà te egkembusan ne warà edtemanana te keralem din.

³² Ne ruen ketà te uvey medmerakel ne bavuy ne ebpemenumal diyà te kelendihan, ne mibpemuyù ke minge vusew ki Hisus te dutun dan ibpepeawuk te minge bavuy ne midtuhutan dema ni Hisus.

³³ Ketà dà ne mid-ewaan dan en ke meama ne mibpengasuk dan en dut te minge bavuy,

ne mibpemelelahuy en ke minge bavuy se ed-umpak diyà te dempilas ne nengelened dan en diyà te ranew.

³⁴ Guna su nekita ini rut te minge etew ne edtuganur ketà te minge bavuy ne mibpemelelahuy ran en su impemenudtul dan ini diyà te inged dan wey ke nekeerivey ne pengengewiran.

³⁵ Nerineg ini rut te minge etew, ne mibayaan dan en su midsusi ran. Nekeuma ran ketà te ki Hisus ne nekita ran en ke meama ne midsuukan te merakel ne vusew pehaney ne riyà mibpinuu te rengdengaan ni Hisus, ne mibevelegkas en ne nekeulit en ke itungan din. Ketà ne nengeandek dan nevenar.

³⁶ Ne ini se minge etew ne nekekita rut te mid-ulaula ni Hisus ne impenuudtul dan en dut te ruma pà ne etew ke ned-ulaula rut te meama ne midsuukan te minge vusew.

³⁷ Ne langun ne mehinged ketà te Gerisiyanu ne mibpemuyù ki Hisus te menu med-awà sikandin su neandek dan nevenar. Arà dà ne midlived en si Hisus diyà te avang din su ed-awà en.

³⁸ Ne mibuyù ini se meama ne neulian en diyà te ki Hisus te, "Egkiyug a ne ebpekiduma kenikew."

Ugaid ne warà imperuma ni Hisus su impeuli din se egkahi te,

³⁹ "Uli ke en diyà te keniyu ne ipenuudtul nu ini se meupiya ne mid-ulaula te Eleteala kenikew." Arà dà ne mid-uli en ini se meama ne mibpemenudtul en diyà te langun ne mehinged ini se meupiya ne mid-ulaula ni Hisus kandin.

*Neulian ni Hisus ke anak ni Jairo wey ke Meritan ne Mid-amì dà te Belegkas ni Hisus
(Mateo 9:18-26; Marcos 5:21-43)*

⁴⁰ Nekeampil be maa si Hisus kayi te mibpuunan din ne migalewhalew kandin ke merakel ne menge etew ne nevurun ketà su daan dan en ne edtahad kandin.

⁴¹ Duen ketà meama ne ed-ingaranan ki Jairo, senge etew ne egkeunutan diyà te valey ne ebpedgian te menge Hudiyanen te penduan dan. Mid-uvvey sikandin ki Hisus ne midlumpeng diyà te etuvangan din se ebpemuyù ki Hisus te ebperuma riyà te valey rin.

⁴² Su ruen budtung ne anak din ne sepulù buwa wey deruwa se rahun din ne edaru ne edtiviltivil te kepatey.

Miduma si Hisus kandin ne gewii ran te edipanew ne egkeasek kayi te ki Hisus ke merakel ne etew.

⁴³ Ne ruen ketà meritan ne nerasey nevenar su nekedsepulù en wey deruwa ne rahun se kebpemundasa rin te lengesa ne kenà egkeengked. Misan mibpevewian din en te merakel ne terevawì ne warà dan megaga.

⁴⁴ Mibpenelektelek en sikandin diyà te uriyan ni Hisus ne mid-amì din dà ke belegkas ni Hisus ne netibpek en ke kebpemundasa rin.

⁴⁵ Ne migkahi si Hisus te, “Engkey ma se mid-amì kediey?”

Guna su mibparew ran langun ne migkahi si Pedro te, “Engkey se kegketueni nu, Meyterù, te merakel ne etew ne ebpekelpit kenikew?”

⁴⁶ Ne migkahi si Hisus te, “Duen iya mid-amì kediey su neheram ku ke gehem ku te kebpemawì ne midlihawang kediey.”

⁴⁷ Guna su nerineg kayi te meritan ne mid-amì ki Hisus te netuenan din, ne inlayanglayang ma sikandin te kerker. Ne mid-uvey rin si Hisus ne midlumpeng en diyà te sineruwan din ne intarem din en ketà te merakel ne etew ke maan ke mid-amì sikandin ki Hisus wey arà dà ne neulian en ke daru rin.

⁴⁸ Ketà ne migkahi si Hisus kandin te, “Bayi, neulian ke en su sabap dut te kinesarig nu kediey. Ulì ke en be ne barasbaras ka dut te keresayan nu.”

⁴⁹ Ne gewii te ebpekidlalag pà si Hisus dut te meritan ne ruen en nekeuma ne ibpetundug ki Jairo, ne migkahi te, “Ke anak nu ne nekerudtanà en. Kenà ta en ebpengenen si Hisus.”

⁵⁰ Guna su nerineg ini ni Hisus ne migkehiyan din si Jairo te, “Kenà ka kelagew kayi te anak nu, ugaid ne sarig ke rà kediey ne egkeuyag ded sikandin.”

⁵¹ Guna su nekeuma ran diyà te valey ni Jairo ne iyan din dà impelusud ne si Pedro, wey ke teleari si Santiago ki Juan, wey ke menge lukes dut te vatà.

⁵² Ne langun ne menge etew ketà te valey ne ebpeninehew wey ebpemenderawit dut te vatà. Ne migkahi si Hisus kandan te, “Kenà kew pè ma edsinehew. Warà minatey ayan se vatà su nekelipereng dà.”

⁵³ Nerineg den dà ke migkahi ni Hisus ne mid-engitan den dà sikandin su netuenan dan te

minatey en ke vatà.

⁵⁴ Mid-uvey rin ke vatà ne migeweran din ke velad din ne migkahì te, “Payi, enew ke en.”

⁵⁵ Arà dà ne nekesunggud ke hinawa rin ne mid-enew en. Ne migkehiyan ni Hisus ke menge lukes din te pekeena ran ke anak dan.

⁵⁶ Ne nengegeyip nevenar ke menge lukes dut te vatà, ugaid ne mibenduan dan ni Hisus te kenà ibpepenudtul ini se ned-ulaula te misan entei en.

9

Impeipanew ni Hisus ke Sepulù wey Deruwa ne Edumdumaan Din (Mateo 10:5-15; Marcos 6:7-13)

¹ Miburun ni Hisus ke sepulù wey deruwa ne edumdumaan din ne mibeheyen din sikandan te gehem te ebpekeulì te menge daru wey ebpeke-segseg dan te menge vusew ne ebpenuuk dut te menge etew.

² Ne impeipanew rin sikandan su ebpesabut te menge etew mekeatag te kedadù te Èleteala kandan wey apey ran mekevawì dema te misan engkey en ne daru.

³ Ne intelaan din kandan te, “Kayi te ked-ipanew niyu ne kenà kew ed-ewit te misan engkey en, kenà kew ewit te tuked, kemuyut, lutù, kureta etawa belegkas te idsambì niyu.

⁴ Ne endei se valey ne ruen edtelimà keniyu ne ketà kew rà rateng taman te ked-awà niyu ketà te inged.

⁵ Ugaid ne embiya ruen menge etew ne warà edtelimà keniyu, ne levundus kew ne pendeg-daha niyu ke lipupuk diyà te paa niyu gewii te

ed-awà kew ketà te inged dan. Su tuus ini te baag kandan ne kenè en be kilid keniyu ketà te hewii ne kedtimbang te Eleteala kandan,” ke si Hisus.

⁶ Ne mid-ipanew en ke menge edumdumaan ne mid-eneb dan te menge inged se ebpesabut te Meupiya ne Tudtul mekeatag te Eleteala wey mibpemawì dan dema te menge etew diyà te langun ne menge inged.

Ke Guhud Mekeatag te Kinepatey ni Juan ke Ebpemunyag

(Mateo 14:1-12; Marcos 6:14-29)

⁷ Nekeeneb en ini se tudtul mekeatag te ed-ul-ulaan ni Hisus taman te nekeuma en diyà te ki Hirudis, ke egkeunutan dan diyà te Geliliya. Guna su nerineg ni Hirudis ne neliveg sikandin su ruen menge etew ne migkahi te nevanew red si Juan ke Ebpemunyag.

⁸ Ruen duma ne migkahi te si Elias ini ke mibpelambas te Lalag te Eleteala rengan ne neuyag ded. Duen ruma pà maa ne migkahi te sikandin ini ne senge etew rut te menge mibpelambas te Lalag te Eleteala rengan ne neuyag maa.

⁹ Ugaid ne iyan migkahi ni Hirudis te, “Embiya si Juan, ne impepungel ku en ke ulu rin. Ugaid ne engkey ve etawa ini se egkehiyen dan?” Ketà ne mibpemengà ni Hirudis se ralan te kegkekita rin ki Hisus.

Pinekaan ni Hisus ke Lelima nengivu ne Etew

(Mateo 14:13-21; Marcos 6:30-44; Juan 6:1-14)

¹⁰ Guna su mibpengulì ke sepulù wey deruwa ne edumdumaan ni Hisus ne mibpenudtul dan

kandin ke langun ne mid-ulaula ran. Ne pineruma rin ke edumdumaan din te sikandan dà diyà te inged ne ed-ingaranan te Betsaida.

¹¹ Nerineg kayi te merakel ne etew ne nevrurun se mid-ipanew en si Hisus ne midtelukun dan. Nekeuma ran ne migalàhalà dan ni Hisus ne mibpesebutan din kandan mekeatag te kedatù te Eleteala kandan, wey mibpemawian din ke menge etew ketà ne ruen daru rin.

¹² Guna su meapun en nevenar ne mid-uvey en ki Hisus ke sepulù wey deruwa ne edumdumaan din se egkahi te, “Meapun en ini ne warà dè be menge etew kayi te inged ini. Iyan tumù ne ibpeipanew nu en ini se merakel ne etew su apey ran ebpekependiyà te endei se ruen menge valey rin ne ebpekekuwa ran te egkekaan wey egkeirehaan dan.”

¹³ Ugaid ne migkahi si Hisus te, “Sikiyu se ebpekaan kandan.”

Ne migkahi ran te, “Ini se keytew ne lelima rà ne timan ne pan wey deruwa rà ne timan ne serà. Etawa ebpepemasaeen key nu te ibpekaan kayi te denda ne etew?”

¹⁴ (Su ketà ne ruen menge lelima nengivu ne meama liyu pà ke meritan batà.)

Ne migkahi si Hisus dut te sepulù wey deruwa ne edumdumaan din te, “Pemepinuuwa niyu sikandan te idsenge puntuk te igkarang se menge lelima nepulù.”

¹⁵ Ne ketà ne impepinuu ran en ke langun ne menge etew.

¹⁶ Ne migkuwa ni Hisus ke lelima ne timan ne pan wey ke deruwa ne timan ne serà ne midlingakà sikandin diyà te langit ne impeselamat din te Eleteala. Ne mibpenevìtevi din ne imbehey rin en dut te menge edumdumaan din su ibpetukid dut te merakel ne etew.

¹⁷ Migkaan dan langun ne nengevulung dan. Guna su nekeipus dan se egkaan ne mibpunpun dut te sepulù wey deruwa ne edumdumaan din ke nengesamà, ne iyan din nepunpunan ne sepulù wey deruwa ne binevey se nengepenù.

Ke In-insà ni Hisus dut te Edumdumaan Din ke Engkey Sikandin

(Mateo 16:13-19; Marcos 8:27-29)

¹⁸ Senge hewii maa ne mibpengeningeni si Hisus te sebseveka rin ne riyà te uvey rin ke menge edumdumaan din. Ne mid-insaan din sikandan te, “Engkey a kun ma riyà te pegitungan te menge etew?”

¹⁹ Ne midtavak dan te, “Ruen egkahi te sikuna si Juan ke Ebpemunyag, ne ruen дума ne egkahi te sikuna si Elias ke mibpelambas te Lalag te Eleteala rengan, ne ruen pà ruma ne egkahi te sikuna ke seveka ne mibpelambas te Lalag te Eleteala rengan ne nevanew maa.”

²⁰ “Ne menu sikiyu?” ke si Hisus. “Engkey e ma diyà te pegitungan niyu?”

Ne midtavak si Pedro te, “Sikuna si Kristu ke midtendù te Eleteala ne ebperetuen dut te menge etew.”

²¹ Ne migkehiyan ni Hisus tegtehami sikandan te kenà dan ibpenudtul ini te misan entei ne etew.

*Migkahi en ni Hisus ke Kebpatey Rin
(Mateo 16:20-28; Marcos 8:30-9:1)*

²² Ne migkahi maa si Hisus dut te minge edumdumaan din te, “Ke Impeanak te Menusiyà ne edresayen nevenar. Su ebpeheweran din dut te minge egkeunutan te Hudiyanen, ke minge mepurù te terebpelengesa wey ke minge meysterù te penduan. Ed-imetayan sikandin ugaid ne ketà te iketelu ne hewii ne egkevanew red.”

²³ Ne migkahi pà maa si Hisus kandan langun te, “Embiya ruen etew ne egkiyug ne eduma kediey ne iyan iya se pekelipti rin ke kandin ne kiyug, ne tianga rin ke kandin ne pinebelavag ne kayu ne ed-ingaranan te krus ne iyan din meana ne tumana rin ke minge suhù ku misan ibpatey rin pà se keduma rin kediey.

²⁴ Su ke etew ne egkenuhun te umur din ne ebpatey lavew, ugaid ke etew ne iyan din ibpatey se keduma rin kediey te kebpemesabut dut te Meupiya ne Tudtul, ne ruen umur ne ibehey kandin ne warà edtemanann din.

²⁵ Su misan duen etew ne ebpekeangkun te langun kayi te ampew te dunya, ne warà lalew rin embiya egkerasey ke himukud din diyà te apuy ne rakà.

²⁶ Embiya ruen etew ne igkeyeyai a rin wey ini se ibpenurù ku kayi te ini ne timpu ne merakel ne minge etew ne mekesesalà wey edsumpalit te Eleteala, ne igkeyeyai rema sikandin dut te Impeanak te Menusiyà ketà te kedlived din kayi te ampew te dunya. Su ketà ne hewii ne ruen raman din ne riyà ebpuun te Amey rin ne

Eleteala, ne edumaan din dema rut te munge berekat ne suluhuen diyà te langit.

²⁷ Tentenuri niyu ini, ruen ruma tew kayi ne kenà pà ebpatay taman ketà te hewii ne egkekita ran ke Kedetui te Eleteala rut te munge etew.”

*Midsalin Nevenar ni Hisus Ke Paras Din
(Mateo 17:1-8; Marcos 9:2-8)*

²⁸ Guna su nekedsenge pedian en igenat te kinekahi ni Hisus ketà, ne pineruma rin en ensi Pedro, si Juan, wey si Santiago te edtekereg diyà te buvungan su ebpengeningeni.

²⁹ Gewii ni Hisus te ebpengeningeni ne nesalin ke paras dut te buked din. Ne mibpeneringsing ke velegkas din te keputi su warà misan engkey ne kayi te dunya ne ebpekemeputi iring kayi.

³⁰ Netekew ran en dema nekita se deruwa ne etew ne ebpekidlalag ki Hisus, si Moises wey si Elias, ke munge mibpelambas te Lalag te Eleteala rengan.

³¹ Ne mibpengandlag ke kesihey ran dema ne iyan dan edlelahen ki Hisus ne mehaan din en edtumana ke suhù kandin te Eleteala te ebpebpatay diyà te inged ne Hirusalim.

³² Ugaid ne si Pedro wey ke munge ruma rin ne nekelipereng dan, ne guna su nekehimerat dan en ne nekita ran ke kesihey ni Hisus wey ke deruwa ne etew ne uvey rin.

³³ Ne gewii te ed-awà ke deruwa ne etew riyà te ki Hisus ne migkahi si Pedro te, “Meyterù, meupiya su kayi ki! Edsesabung key te tetelu, seveka keykew, seveka ki Moises, wey seveka rema ki Elias.” (Ugaid ne matag be migkahi

si Pedro te iring ketà ne warà din metueni ke engkey se egkehiyen din.)

³⁴ Ketà te edlalag pà si Pedro ne ruen sehulapun ne nekelikuvung kandan ne neandek dan te nesukub dan en te sehulapun.

³⁵ Ne ruen suwara ne ketà ebpuun te sehulapun ne migkahi te, “Ini ke Anak ku ne mibpemili ku. Pemineha niyu ke edlelahen din.”

³⁶ Neipus ke suwara ne iyan den dà nekita ne si Hisus. Ketà te arà ne hewii te kebpekeruma pà ni Hisus kandan ne warà dan kegkehiya ini se nekita ran te misan senge etew rà.

Neulian ni Hisus ke Vatà ne Midsuukan te Busew

(Mateo 17:14-18; Marcos 9:14-27)

³⁷ Ne midtundug ketà ne hewii ne midtupang dan ketà te buvungan ne merakel se menge etew ne mid-alew ki Hisus.

³⁸ Duen senge etew ne meama ketà te menge etew ne nevrurun ne midtawag ki Hisus se egkahi te, “Meyterù, menu ke intengi nu pà ini se anak ku ne meama su budtung dà ini.

³⁹ Ne ruen busew ne edsuuk kandin ne embiya egkeumaan sikandin ne edtekew ne egkuleyì ne egkehurivid ke lawa rin taman te eburvuraen ke bèbà din. Merasirasi edsuuk ke vusew kandin ne egkekeiran en sikandin.

⁴⁰ Ne mibpemuyù ku rut te edumdumaan nu te ibpesegeg ini se vusew, ugaid ne warà dan ma megaga.”

⁴¹ Migkahi si Hisus te, “Sikiyu ne menge etew guntaan, warà kebperetiyaya niyu te Eleteala wey menge suer kew!” ke sikandin. “Neuhet en

se kebpekiduma ku keniyu, ne engkey pà taman se kebperetiyaya niyu? Wey engkey pà taman se keuhet din se kedtigkeri ku keniyu?” Ne migkahi si Hisus dut te amey te vatà te, “Ipengkayi nu ke anak nu.”

⁴² Ne gewii te ed-ewiten dan ke batà kayi te ki Hisus ne midsuuk en maa ke vusew kandin ne nepiley sikandin ne nehurivid en ke lawa rin. Ugaid ne midsegseg ni Hisus ke vusew, ne neulian din ke vatà, ne in-ulì din diyà te amey rin.

⁴³ Ne negeyip ke langun ne menge etew ketà dut te mid-ulaula ni Hisus su nekita ran ke gehem te Eleteala.

*Migkahi pà maa ni Hisus ke Kebpatey Rin
(Mateo 17:22-23; Marcos 9:20-32)*

Kemuluwan pà ne egkegeyip ke langun ne menge etew rut te mid-ulaula ni Hisus ne migkahi si Hisus diyà te edumdumaan din te,

⁴⁴ “Itaan niyu ke telinga niyu kayi te ini se egkehiyen ku keniyu, ebpuliren ke Impeanak te Menusiyà dut te menge kunterà din.”

⁴⁵ Ugaid ne warà dan mesebuti ke meana rut te migkahi ni Hisus kandan, ne neandek dan te ed-insà.

*Mibpein-inseey Ke Menge Edumdumaan ni Hisus ke Engkey Kandan Se Mepurù
(Mateo 18:1-5; Marcos 9:33-37)*

⁴⁶ Ne mibpelelewlewaney ke menge edumdu-
maan ni Hisus ke engkey kandan se mepurù.

⁴⁷ Ugaid ne netuenan ni Hisus ke menge pegitungan dan, ne ketà ne migkuwa rin se vatà ne impeitindeg din diyà te uvey rin.

⁴⁸ Ne migkahi en te, “Misan engkey ne etew se edtelimà te vatà iring kayi su atag te keduma rin kediey, ne midtelimà dema sikandin kediey. Ne misan engkey ne etew ne edtelimà kediey, ne kenà siak dà se midtelimà din su misan ke Amey ku ne Eleteala ne midsuhù kediey ne midtelimà din dema. Su misan engkey en keniyu se kevevaan su sabap te egkesuhùsuhù te menge ruma rin, ne sikandin ke tidtu ne mepurù keniyu.”

Ke Etew ne Kenà Egkunterà Kenitew ne Ruma Tew

(Marcos 9:38-40)

⁴⁹ Ne migkahi si Juan ki Hisus te, “Meyterù, duen etew ne neuma rey ne ebpenegseg te vusew te ibpepevayà dut te gehem te ngaran nu, ne midawey rey sikandin su kenà tew ma ruma.”

⁵⁰ Ugaid ne migkahi si Hisus kandin te, “Kenà niyu sikandin edewaya su warà etew ne ebpekevaal te mekegeyip te ibpepevayà te ngaran ku ne melemu ne edlalag te mereatey mekeatag kediey. Su ke etew ne kenà ebpekidkunterà keytew ne ruma tew.”

Warà Telimaa si Hisus diyà te Seveka ne Inged Lusud te Semeriya

⁵¹ Guna su egkereniyen en ke hewii te kebpekeawà ni Hisus kayi te ampew te dunya su ed-uli en diyà te langit ne mibpedtihel din ke hinawa rin te ebpendiyà te inged ne Hirusalim ne ketà ne migenat dan en.

⁵² Duen menge etew ne pineuna rin su ebpe-mengà te egkeretengan dan ne migenat dan en.

Mibpendiyà dan te seveka ne inged lusud te Semeriya su ebpenehana te kebpekeuma en ni Hisus.

⁵³ Ugaid ne ke mehinged ketà ne warà midtelimà ki Hisus su netuenan dan se riyà edsinaru sikandin te inged ne Hirusalim.

⁵⁴ Guna su nekita ini rut te edumdumaan ne si Santiago wey si Juan se warà bes edtelimà kandan ne migkehiyan dan si Hisus te, “Menu, egkiyug ka, Meyterù, ne ebuyù key te apuy riyà te langit ne ibpetanà kandan su apey langun dan ne egkeherà?”

⁵⁵ Ugaid ne midlilingey si Hisus kandan ne midawey rin,

⁵⁶ ne midlevundus dan en diyà te ruma ne inged.

Ke Menge Etew Ne Deisek dà ne Ebpekerumaen ki Hisus

(Mateo 8:19-22)

⁵⁷ Gewii ran te ed-ipanew ne ruen etew ne migkahi ki Hisus te, “Eduma a kenikew misan ebpependei ka.”

⁵⁸ Ne migkahi si Hisus kandin te, “Ke menge laku ne ruen takub ne ed-ul-ulian dan, ke menge pepenuk ne ruen kandan ne salag, ugaid ne ke Impeanak te Menusiyà ne misan endei ad memekeirehà su warà ubpaan din.”

⁵⁹ Ne migkahi maa si Hisus diyà te senge etew te, “Duma ka kediey.”

Ugaid ne migkahi ini se meama te, “Ed-uli e pà ne embiya egkepupusan en te ebpeneytayan ke amey ku ne arà pà ne eduma a kenikew, su siaken ded se edleveng kandin.”

⁶⁰ Ne migkahi si Hisus te, “Iyan nu pelevenga rut te minatey ke menge ruma nu ne kenà ebperetiyaya kediey, ugaid ne iyan ku ibpehelevek kenikew ne ebpesabut dut te Meupiya ne Tudtul mekeatag te Kedatù te Eleteala te menge etew.”

⁶¹ Ne ruen pà maa senge etew ne migkahi te, “Mama, eduma a kenikew, ugaid ne ebpemehetew e pà diyà te bevelayan ku.”

⁶² Ne migkahi si Hisus te, “Embiya ruen etew ne edadu ne ebpulung edlilingey, ne kenà meupiya arà. Ne iring din ded dema,” ke si Hisus, “ke etew ne eduma kediey, embiya ebpulung edlilingey dut te netehak din ne kenà sikandin edait ne egelevek dut te menge etew ne edetuan te Eleteala.”

10

Mibpemili si Hisus te Pitu Nepulù wey Deruwa ne Etew ne Impeipanew Rin

¹ Guna su neipus arà ne ruen pitu nepulù ne ruma pà ne menge meama ne mibpemilì te Kerenan ne impeipanew rin ini te igeheruwa riyà te langun ne menge inged ne mehaan din ebayai.

² Ne migkehiyan din sikandan te, “Medmarkel se menge etew ne warà pà meketelimà dut te Meupiya ne Tudtul mekeatag te Eleteala. Iring sikandan te melutuen ne pareyanan. Meluag nevenar ini se pareyanan, ugaid ne warà utew ruma rut te ebpengehani. Pemuyù kew riyà te Eleteala ke kemuney rut te pareyanan te

medsuhù pà sikandin te ruma ne ed-ehani diyà te pareyanan din.

³ Na, genat kew en, ugaid uram kew su edsuhuen ku sikiyu riyà te menge etew ne ebpekekaid, ne iring kew te nati te bilibili ne ebpekeseruk diyà te senge ingeren en ne mewalew ne asu.

⁴ Kenà kew ewit te kureta, kempiru, etawa telumpà ne idsambì. Ne kenà kew edlanganlangan te ebpekibpengasak dut te langun ne menge etew ne egkeuma niyu riyà te ralan.

⁵ “Ne piya engkey ki baley se egkepemenayakan niyu ne penehetiat kew se egkahi te, ‘Menu ma ebpeneuven te Eleteala ke langun ne ed-ubpà kayi te valey ini!’

⁶ Embiya ruen ketà te valey ebperetiyaya wey egalàhalà keniyu ne dekelà se penaub te Eleteala kandan. Ugaid ne embiya kenà kew ran egelhelaan ne kenà edlaus kandan ke kebpenaub te Eleteala.

⁷ Ubpà kew ketà te valey ne ruen migalàhalà keniyu taman te egkeuma ke ked-awà niyu ketà te inged dan. Kenà kew ed-arat-arat te ked-ubpà niyu. Ne telimaa niyu misan engkey se idsaru ran wey ibpeinum dan keniyu su mehelalew ran en keniyu. Su ke etew ne egelevek ne dait ne edsukayan.

⁸ “Piya endei ne inged se egkeumaan niyu ne ruen egalàhalà keniyu, ne telimaa niyu misan engkey se idsaru ran keniyu.

⁹ Pemawii niyu ke menge ebpenderaru ketà te inged. Ne kehiya niyu rut te menge etew ketà te

inged te mehaan en ke hewii te Kedatù te Eleteala kandan.

¹⁰ Ugaid ne embiya ebpekeuma kew riyà te inged ne warà egalàhalà keniyu, ne pendiyà kew te ralan ne kahi kew riyà te minge etew te,

¹¹ ‘Mibpemunas dey en ini se lipupuk te inged niyu ne mideket te paa rey su tuus ini te kenà en kilid kenami ketà te hewii ne kedtimbang te Eleteala keniyu. Ugaid ne iyan niyu tentenuri ne mehaan en ke gewii te Kedatù te Eleteala dut te minge etew.’

¹² Ugaid ne idtarem ku keniyu,” ke si Hisus, “muna pà ke kedusai te Eleteala kandan ketà te hewii ne kedtimbang din te menusiya dut te kinerusa rin te minge mehinged riyà te Sudum.”

Ke minge Etew ne Warà Mebperetiyaya ne Mekeandek-andek se Egketemanan Dan (Mateo 11:20-24)

¹³ Ne migkahi maa si Hisus te, “Sikiyu ne minge etew riyà te inged ne Kurasin, mekeandek-andek se egketemanan niyu! Ne sikiyu te inged ne Bitsaida, mekeandek-andek dema se egketemanan niyu! Su embiya ke minge etew rà diyà te minge inged ne Tiru wey Sudum se nekekita kayi te mekegeyip ne mid-ulaula ku riyà te keniyu ne neuhet dà ne mid-ewaan dan en ke meraat ne ulaula ran ne mibevelegkas dan en te sakù ne mid-evuwan dan ke ulu ran su tuus te nekedsendit dan.

¹⁴ Ketà te hewii ne kedtimbang te Eleteala te menusiya ne iyan pà dekelà ke kedusa te Eleteala keniyu rut te mehinged te Tiru wey Sidun.

15 Ne sikiyu rema ne menge etew diyà te inged ne Kapirnawum,” ke si Hisus, “egkesuat kew perem ne ebpekesugkur diyà te langit, ugaid ne ibpetimbag kew riyà te apuy ne rakà.”

16 Ne migkehiyan ni Hisus ke pitu nepulù ne ebpeipenawen din te, “Ke menge etew ne ebpemingeg te ibpenurù niyu ne iring te iyan a ran ebpemingehen. Ne engkey se kenà edtelimà keniyu ne iring te iyan a rin warà telimaa. Ne engkey se kenà edtelimà kediey ne iyan din warà telimaa ke Eleteala ne midsuhù kediey.”

Ke Kineulì Dut te Pitu nepulù wey Deruwa

17 Guna su mid-uli ke pitu nepulù wey deruwa ne midsuhù ni Hisus, ne nengesuatsuat dan nevenar! Migkahi ran diyà te ki Hisus te, “Kerenan, misan ke vusew ne mibperumaruma te lalag dey ke ibpeawà dey te ibpepevayà te ngaran nu.”

18 Ne migkahi si Hisus kandan te, “Nekita ku si Setanas ke datù te pekaid ne neulug diyà ebpuun te langit ne iring te kilat se kegkeulug din.

19 Tentenuri niyu te mibehayan ku en sikiyu te gehem su apey misan ebpekeheiek kew te uled etawa awa ne kenà kew egkevisaan. Kenà kew egketalew rut te kevaher te datù te pekaid, ne warè en ebpekekaid keniyu.

20 Ugaid ne kenà iyan niyu igkehalew se ebperumaruma ke vusew keniyu,” ke se Hisus, “ugaid ne iyan niyu ikehalew ne impesurat en te Eleteala ke menge ngaran niyu riyà te langit.”

Pinehalew si Hisus dut te Kedesenan ne Ebpetuntul te Menusiyà

(Mateo 11:25-27; 13:16-17)

²¹ Ketà ne hewii ne mibpehalew si Hisus dut te kedlumun te Kedesenan ne Ebpetuntul te menusiyà ne mideyù din ke Eleteala se egkahi te, “Ew Amà, sikuna ke Kerenan diyà te langit wey kayi rema te ampew te dunya. Dekelà se kebpselamat ku kenikew su impayag nu ke ketau nu rut te minge etew ne warà egketùtuenan dan, ne in-eles nu ini se ketau nu rut te minge etew ne dekelà se netuenan dan. Uya, dekelà se kedeyù ku keykew, Amà, te ini se mid-ulaula nu su ini ke kiyug nu.”

²² Ne migkahi maa si Hisus dut te minge etew te, “Ke Amey ku se mibpesarig kediey te langun taman. Warà netau kedì te Anak a te Eleteala liyu rà te Amey ku ne Eleteala. Ne warà netau te Amey ku ne Eleteala liyu rà te siaken ne Anak din wey ke minge etew ne egkiyuhan ku te ebpayag mekeatag dut te Amey ku.”

²³ Ne midsinaru si Hisus dut te minge edumdumaan din te sikandan dà se midlelehan din te, “Dayirayi kew su nekita niyu ini se ibpehelevelk te Eleteala kedì.

²⁴ Su benar ini se egkehiyen ku keniyu te kenà pira rà se ebpelambas te Lalag te Eleteala wey ke minge mepurù dengan ne egkesuat perem ne ed-inteng kayi te nengekita niyu te gunteani en, ugaid ne warà dan en mekita. Ne egkesuat dan perem ne ebpeming kayi te nengerineg niyu te gunteani en, ugaid ne warà dan en mekerineg.”

Ke Sempità ni Hisus Mekeatag te Meupiya ne Etew ne Riyà Ebpuun te Inged ne Semeriya

25 Ne senge hewii maa ne ruen senge etew ne meyterù te penduan se mibpengkayi te ki Hisus su edseligkat perem te munge insà din. Ke sikandin te, “Meyterù, engkey se ed-ul-ulaan ku su apey a mevehayi te umur ne warà edtemanan din?”

26 Ne migkahi si Hisus te, “Engkey se impesurat ne penduan te Eleteala ne intelaan ni Moises? Engkey se egkesebutan nu rut te kebasa nu ketà?”

27 Ne migkahi ke meama te, “ ‘Iamin nu ke hinawa nu te edlimù te Kerenan ne Eleteala nu, ne iamin nu ke baher nu wey itungan nu te ed-ulaula ke engkey se ebpekesuhat te hinawa rin’ wey ‘Ikelimù nu ke ruma nu iring te kegkelimù nu te hinawa nu.’ ”

28 Ne migkahi si Hisus te, “Benar ini se migkahi nu. Ul-ulaa nu ve ini ne egkevehayan ka te umur ne warà edtemanan din.”

29 Ugaid ne kenà egkiyug ini se meyterù te penduan ne egkepilayan te pengasak ne ketà ne mid-insà en maa te, “Engkey se ruma ku?”

30 Ne midtavak si Hisus te impepevayà te sempità, ke sikandin te, “Duen senge etew ne Hudiyänen ne riyà ebpuun te Hirusalim ne ebpetupang kayi te inged ne Hiriku. Kayi te ralan ne ruen neuma rin ne munge tulisan ne midruug kandin ne pinegkedew ran sikandin ne wey ran ewai ne igelimbeka rè be se hinawa rin.

³¹ Guna su mid-ewaan en dut te menge tulisan ne ruen senge etew ne Hudiyanen ne terebpe-lengesa te Eleteala ne mibpevayà ketà te ralan. Ugaid ne nekita rin dà ini se etew ne nekeid-irehà dutun te ralan, ne mid-elihu rin ne midlevundus en se ed-ipanew.

³² Ne engketà ded maa se senge etew ne mibpevayà ketà te ralan ne Hudiyanen ded dema, ne kevuwaran ni Levi ne iyan din helevék ne ed-amung dut te menge terebpe-lengesa diyà te Nekebpuru ne Valey te Eletealà. Nekeuma ne nekita rin ded dema ini se etew ne nekeid-irehà dutun te ralan, ne mid-elihu rin ded dema ne midlevundus en se ed-ipanew.

³³ Warà dà meuhet ne ruen en maa senge etew ne nekeuma ne mibpevayà ketà te ralan ne kenà Hudiyanen su mehinged te Semeriya. Nekita rin dà ini se meama ne nekeid-irehà ketà te ralan ne midaat se nanam din.

³⁴ Mid-uvey rin en ne mibawian din ke menge palì te lana wey vinu ne mibagkes din. Nepasad din te ebawì ne midsepuwat din diyà te kudà din ne mibpeneheewit din diyà te valey ne ed-eranan ne rutun din maa tugenura.

³⁵ Nepawà ne mibehey sikandin te kureta rut te kemuney te valey se egkahi te, ‘Tugenura nu pè be kedì ini se meama. Embiya ruen pà igkegastu nu kandin ne id-ulì ku rà kenikew ketà te kedlived ku.’ ”

³⁶ Ne migkahi si Hisus ketà te meyterù te penduan te, “Endei rapit kayi te tetelu ne meama se meupiya ne ruma ketà te meama ne midruug te tulisan?”

³⁷ Ne migkahi ke meysterù te, “Arà se neyru kandin se meupiya ne ruma rin.”

Ne migkahi si Hisus te, “Ini ve se iringi nu.”

Mibpenumbaley si Hisus diyà te engki Marta wey Maria

³⁸ Gewii te edlevundus en ensi Hisus te ked-ipanew ran ne nekeuma ran ketà te senge inged. Ne ruen ketà meritan ne ed-ingaranan ki Marta ne mibpepemenayik kandan diyà te baley rin.

³⁹ Duen ari rin ne ed-ingaranan ki Maria. Ne mibpinpinuu si Maria ini riyà te uvey ni Hisus su ebpepinuu te penurù din.

⁴⁰ Ne si Marta ne warà kebpinuu rin su sikandin dè be se ed-elugan te kegkaan dan. Ne ketà ne mid-uvey rin si Hisus se egkahi te, “Menu warà nu metuusi, Mama, te ebpedterayen e rà kenihan te ari ku se egelevek kayi te avu? Kehiyi nu pà si Maria te ebpeemungen kedì.”

⁴¹ Ugaid ne migkahi si Hisus te, “Sikuna, Marta, merakel utew se igkeuru nu ne kenà beripantag.

⁴² Ugaid ne seveka rà se beripantag. Ne iyan nepemili ni Maria ini se meupiya ne kenà egkeawà kayi te kandin.”

11

Mibpenurù si Hisus Mekeatag te Kebpengeningeni

(Mateo 6:9-13; 7:7-11)

¹ Senge hewii ne mibpengeningeni si Hisus ketà te andang ne ebpengeningeniyan din. Nekeipus sikandin se ebpengeningeni ne migkahi ini se senge etew ne edumdumaan

din te, “Mama, penurua key te ebpengeningeni iring ki Juan te mibpenurù din ke minge edumdumaan din.”

² Ne migkahi si Hisus kandan te, “Kayi te kebpengeningeni niyu ne iringa niyu kayi, ‘Ah, Amà, berekat ne edati te menusiya ke ngaran nu.

Ne berekat ne edatù ka rut te langun ne menusiya.

³ Behayi key te sesangen ne egkekaan dey te uman andew.

⁴ Ne pesehara nu ke salà dey, su ebpesaharen dey rema ke langun ne nekedsalà kenami. Ne ipekeriyù key nikuna dut te minge mevaher ne penggeram.’ ”

⁵ Ne migkahi maa si Hisus dut te edumdumaan din te, “Upama ke ruen senge etew keniyu se ebpendiyà te sepakat din te metaneb ne kerukileman se egkahi te, ‘E, Mama, pesembaya e pà nikuna te egkekaan,

⁶ su ruen meheliyug ku ne riyà ebpuun te meriyù ne mid-aran kayi te kenami ne warà idsaru ku kandin.’

⁷ “Ne ketà ne edtavak sikandin diyà te lusud te valey te, ‘Ebpekelipereng ad mulà ini. Mibpin-tuan ku en ini se gumawan ku wey nekelipereng en ini se minge anak ku kayi te ulid ku. Kenà ad ebpekeenew te ebehey keykew.’

⁸ Idtarem ku keniyu,” ke si Hisus, “te misan sepakat ka rin ne kenà ed-enew sikandin se

ebehey keykew. Ugaid ne embiya kenà ka ed-engked se ebuyù, ne ebpekeenew red sikandin se ebehey keykew te ebuyuen nu.

⁹ “Tembù be,” ke si Hisus, “ibpesabut ku ini keniyu, pemuyù kew riyà te Eleteala ne ebehayan kew rin. Pemengà kew ne ruen arà egketuen niyu. Penehetiat kew ne ebpuwasan kew rin.

¹⁰ Su langun ne ebpembuyù diyà te Eleteala ne ebehayan, ne sika ebpemengà ne ebpeketuen, ne sika ebpenehetiat ne ebpuwasan te Eleteala kandin.

¹¹ “Menu sikiyu ne minge lukes,” ke si Hisus, “embiya ebuyuan ka te anak nu te serà, maa uled se ibehey nu?”

¹² Etawa ebuyuan ka rin te etelug, maa awa se ibehey nu?

¹³ Sikiyu ne menusiya ne kenà metidtu ne metau kew ne ebehey te meupiya riyà te anak niyu, na iyan pè be ke Amey niyu ne Eleteala riyà te langit kenà mebehey keykew te kedlumun dut te Kedesenan ne Ebpetuntul te Menusiya embiya ebpembuyù kew riyà te kandin.”

Iyan Kunaan te Minge Etew ne Riyà Ebpuun te Unuten te Vusew ini se Gehem ni Hisus (Mateo 12:22-30; Marcos 3:20-27)

¹⁴ Ruen hewii ne midsegseg ni Hisus ke vusew ne mibpemekaid te etew te kegkeemew rin. Guna su neawà en ke vusew ne arà dà ne nekelalag en ke meama, ne negeyip nevenar ke minge etew ne nevurun ketà.

15 Ugaid ne ruen migkahi te, “Si Belsibul, ke unuten te minge vusew se mibehey kandin te gehem te kebpenegseg te minge vusew.”

16 Ne ruen pà ruma ne ebpenggeram ki Hisus ne mibuyuan dan si Hisus te mebpekita kandan te mekegeyip su apey ran egketueni ke riyà ebpuun si Hisus te Eleteala.

17 Ugaid ne netueanan ni Hisus ke netahù te itungan dan ne migkahi en te, “Upama ke ruen datù te inged ne ed-uneey ebpevuneey ke minge sakup din, ne egketunggad arà se inged din. Ne iring din ded dema ke ruen telteleanak ne ed-uneey egkewaha, ne warà ebpengkusan din ke kenà egkevurahey.

18 Iring din ded be ketà ke midetuan ni Setanas ke unuten te minge vusew, embiya ed-uneey ebpevuneey ke sakup din ne kenà meuhet se kedatù din su egketunggad arà se edetuan din. Migkahi niyu te iyan ku kebpenegseg te vusew ne mibehayan a ni Belsibul ke unuten te minge vusew te gehem din.

19 Embiya benar ne iyan ku ibpenegseg te vusew ke gehem ni Belisbul, ne endei ve ebpuun ke gehem dut te edumaruma keniyu te ebpenegseg te vusew? Sikandan be ayan se ebpekekahi te warà mekesuhat ke egkehiyen niyu.

20 Ugaid ne iyan benar ne riyà ebpuun te Eleteala ini se gehem ku te ebpenegseg te vusew. Ne kayi ve ne egketueanan niyu te neuma en ke hewii te Kedatù te Eleteala keniyu.”

Midsempità si Hisus su Ibpekita Rin te Dekelà

Pà ke Gehem te Eleteala Rut te ki Setanas ke Datù te Pekaid

²¹ Migkahi si Hisus te, “Upama ke ruen mevaher ne etew ne ruen metarem din ne ebentayan en ke valey rin, ne warà etew ne ebpekelusud te valey rin su ebpenakew te kearen din.

²² Ugaid ne embiya ruen mevaher pà ne etew ne edsulung ne ebpeketalew kandin wey egkeahew en ke metarem ne edserihan dut te etew ketà te valey, ne langun dut te netavan din ne egkepengumun-umun din en dut te menge ruma rin.”

²³ Ne migkahi maa si Hisus te, “Ke etew ne kenà ku ruma ne kunterà ku, ne ke etew ne kenà ed-amung kediey te eburun kayi te menge etew ne ebpemburahey.”

Ke Kedlived te Busew dut te Etew ne Mid-suukan Din

(Mateo 12:43-45)

²⁴ Ne migkahi pà maa si Hisus te, “Embiya ruen busew ne edsuuk te etew ne ed-awà en, ne riyà ebpevayà te memara ne tanà su ebpemengà te ubpaan din. Ne embiya warà egketuen din ne iyan egketahù te hinawa rin se, ‘Edliveran ku red ke mid-ubpaan ku.’

²⁵ Nekeuma ini se vusew, ne nekita rin te metilak en wey nekeulit en ke langun ketà te lusud.

²⁶ Ne midlihawang pà sikandin ne med-ewit te pitu ne vusew ne tuwas pà kandin keraat, ne langun dan ne ketà dà mid-ubpà. Ne ini se egketemanan ketà te etew ne muna pà se kepasang din dut te neuna.”

Ke Lalag ni Hisus Mekeatag te Tidtu ne Kehelawan

²⁷ Nekeipus si Hisus se edlalag kayi, ne ruen meritan ketà te nevrurun ne merahing se kinekahi rin te, “Dekelà se kehelawan dut te meritan ne mid-anak wey mibpesusu keykew.”

²⁸ Ugaid ne iyan migkahi ni Hisus se, “Iyan pè be dekelà se kehelawan dut te etew ne ebpemineg te Lalag te Eleteala wey ebperumdumaan din.”

Ke Menge Etew ne Layun Ebuyù te tuus Ke Riyà Ebpuun te Eleteala Si Hisus

(Mateo 12:38-42)

²⁹ Gewii te egkeasek en ke merakel ne etew riyà te ki Hisus ne migkehiyan din sikandan te, “Sikiyu ne menge etew te guntaani en, mereatey nevenar se menge ulaula niyu ne warà kebperetiyaya niyu te Eleteala! Iyan niyù ebpemengaan se mekegeyip ne tuus te gehem ku. Ugaid ne warà en ma tuus ne ibpekita keniyu liyu rà ketà te netemanan ni Jonas ne mibpelambas te Lalag te Eleteala rengan.

³⁰ Su iring te nekeuma si Jonas diyà te inged ne Ninivi rengan ne impekita rin dut te menge etew ketà ke tuus te kedusa te Eleteala, ne iring din ded dema te sikandin ne Impeanak te Menusiyà ke tuus kayi te keniyu ne menge etew te guntaani en.

³¹ Ketà te akir din ne hewii te kedtimbang te Eleteala te menusiyà,” ke si Hisus, “duen Bai rengan ne riyà ebpuun te inged ne Siba ne ed-itindeg ne ed-isuhat te kewagib dut te sikiyu ne menge etew guntaan. Su mibpengkayi sikandin

se riyà ebpuun te divaluy te pehiliran su apey mekerineg dà ki Salomon ke Ratù dengan ne metmetau. Ne ruen en guntaan seveka ne mepurù pà ki Salomon ne ini en te keniyu, ugaid ne kenà niyu edtelimaan ke penurù din.

³² Uya, ketà te akir din ne hewii ne kedtimbang te Eleteala te menusiya,” ke si Hisus, “ne ed-itindeg ini se menge etew ne riyà ebpuun te Niniva rengan su ed-isuhat keniyu te kewagib. Su sikandan mulà ne nerineg dan dà ke Lalag te Eleteala ne impesabut ni Jonas kandan ne nekedsendit dan ne mid-ewaan dan en ke meraat ne mid-ulaula ran. Ne guntaan ne ruen mepurù pà ki Jonas ne kayi te keniyu, ugaid ne kenà niyu edtelimaan ke penurù din ne kenà kew ebpedsendit te meraat ne ulaula niyu.”

*Ke Sempità ni Hisus Mekeatag te Engkey se Ebpekerayag te Lawa ta
(Mateo 5:15; 6:22-23)*

³³ Ne migkahi maa si Hisus te sempità kandan te, “Warà etew ne edtemtem te sulù ne ebpe-lengkevan din etawa ibperalung din. Ugaid ne riyà din ibpeluukluuk te saag su apey egkerayahan ke langun.

³⁴ Ke mata te etew ne iring te sulù dut te lawa rin su embiya merayag se kedtengteng din ne iyan din meana ne metidtu se ulaula rin, ne iring te egkerayahan ke langun ne lawa rin. Ugaid ne embiya edsehulepunen se kedtengteng din ne iyan din meana ne mereatey se ulaula rin, ne iring te egkerusireman ke langun ne lawa rin.

³⁵ Tembù be uram kew ke ini se egkehiyen nu ne kerayag te lawa nu ne kesusireman bes.

³⁶ Su embiya egkerayahan ke langun ne lawa nu ne warà misan deisek dà ne kesusireman, ne medmerayag nevenar ke lawa nu iring te egketeyawan ka te sulù.”

Mid-insà Ke Menge Peresiyu ki Hisus ke Meambe ke Kenà Eduma Ke Menge Edumdumaan Din Dut te Betasan te Keep-epuan Dan ne Hudiyanen Mekeatag te Kebpenlùlù

(Mateo 23:1-36; Marcos 12:38-40)

³⁷ Nekeipus en si Hisus se edlalag ne ruen senge etew ne Peresiyu ne mid-inggat kandin te egkaan diyà te valey rin. Ne miduma en rema si Hisus ne mibpinuu en se egkaan.

³⁸ Nekita dut te menge Peresiyu te warà midlùlù si Hisus te warà pà sikandin mekekaan ne neinuinu ran nevenar.

³⁹ Ne migkahi si Hisus kandan te, “Sikiyu ne menge Peresiyu, iring kew te menge basu wey pelatu ne migkulisungan su apey melinis kew kayi te egkekita, ugaid ne kayi te diralem niyu ne meredsik su nepenù te kegkeeram-am wey kereatey!

⁴⁰ Menge warà eperu niyu!” ke si Hisus. “Maa, warà niyu metueni te kenà iyan dà midlimbag te Eleteala ke egkekita kayi te lihewangan su misan ini se kayi te lusud ne kenà egkekita ne midlimbag din ded dema.

⁴¹ Ugaid ne umuni niyu ke menge ayuayu dut te intahù niyu te menge basu wey pelatu niyu ne

ebmelinis kew te kenà kayi rà te lihewangan su kayi rema te lusud te hinawa niyu.

⁴² “Iyan kew rà mekeyruwiru ne minge Pere-siyu!” ke si Hisus. “Su ebehey kew te Eleteala te kandin ne umun ne ikesepulù dut te pinemula niyu ne peninù iring te tandlad wey bawing, ugaid ne warà te hinawa niyu ke egkiyuhan te Eleteala ne ketidtu te ulaula niyu riyà te minge ruma niyu wey ke kedlimù niyu te Eleteala. Benar ne ebehey kew te Eleteala te kandin ne umun ugaid ne warà niyu ma iya tumana ke didis en dut te penurù te Penduan.

⁴³ “Iyan kew rà mekeyruwiru ne minge Pere-siyu!” ke si Hisus. “Su riyà te baley ne ebpenge-dian te penduan te Hudiyanen ne ebpemilì kew te ebpinuuwan te sineruwan, ne embiya riyà kew te pedian ne iyan niyu igkesuat ne ed-edatan kew.

⁴⁴ “Iyan kew rà mekeyruwiru! Su iyan niyu egkeupamaan ne leveng ne warà kudal din ne egiekan te etew te warà dan metuusi ne ebpekereraat kandan su ebpekehuru ran dut te meraat ne ulaula niyu.”

⁴⁵ Duen senge etew ketà ne meyterù te penduan ne migkahi ki Hisus te, “Meyterù, arà se lalag nu ne nesuhat key red dema.”

⁴⁶ Ne migkahi si Hisus kandin te, “Ne sikiyu rema ne minge meyterù te penduan, mekeyruwiru kew rema! Ebpekevehatan niyu ke minge etew te minge penduan ne kenà dan en egkegaga ne edtuman, ugaid ne sikiyu ne warà misan deisek dà ne idtavang niyu kandan te edtuman ketà.

⁴⁷ “Iyan kew rà mekeyruwiru! Su mideyreanan niyu ke minge leveng dut te mibpelambas te Lalag te Eleteala rengan, ugaid ne keniyu ma ne keep-epuan ke mid-imatey kandan.

⁴⁸ Ini se mid-ulaula niyu ne tuus te seveka kew red dut te ulaula te keep-epuan niyu rengan. Su sikandan ke mid-imatey dut te minge mibpelambas te Lalag te Eleteala rengan ne sikiyu ke midayandayan dut te leveng dan.

⁴⁹ Ne geina te metmetau ke Eleteala ne ruen migkahi rin dengan mekeatag ini, ke sikandin te, ‘Edsuhù a te minge etew diyà te kandan te ebpelembasen ku te Lalag ku wey kedserihan ku te ebpemenudtul mekeatag kediey, ne ruen duma ne ed-imeteyan dan ne ruen duma ne ebpendreseyan dan.’

⁵⁰ Tembù be sikiyu ne minge etew guntaan ne igkeragkes kew te Eleteala te kedusa rin dut te kineimatey ran dengan te minge etew ne mibpelambas te Lalag din, igenat te rudsuan te kelibutan.

⁵¹ Edusaan kew te Eleteala dut te kineimatey dengan te langun ne minge etew ne mibpelambas te lalag din igenat dut te kineimatey ki Abel taman en dut te kineimatey ki Zacarias ke mid-imeteyan diyà te elet te edenaan te ibpelengesa te Eleteala wey ke mibpeheletan diyà te Nekebpuru ne Valey te Eleteala. Uya, benar ini se egkehiyen ku,” ke si Hisus, “sikiyu se minge etew guntaan, igkeragkes kew te Eleteala te kedusa rin dut te kinepengimatey ran dengan.

⁵² “Iyan kew rà mekeyruwiru ne minge

meysterù te penduan! Su ed-elangan niyu ke menge etew su apey ran kenà mekesabut te benar ne ralan dan diyà te Eleteala. Sikiyu ne kenà kew edlusud dut te benar ne ibayà diyà te Eleteala, ne ed-alang kew pà maa rut te etew ne egkesuat ne edlusud ketà.”

⁵³ Guna su mid-awà si Hisus ketà te valey te Peresiyu, ne midligpitan en sikandin dut te menge Peresiyu wey ke menge meysterù te penduan, ne merakel se in-insà dan ki Hisus,

⁵⁴ su ebpemengaan dan se kegkesaut dan ki Hisus su apey ruen idwagib dan kandin.

12

Ke Meraat ne Ulaula Dut te Menge Peresiyu ne Impeiring ni Hisus te Ibpelevag te Pan (Mateo 10:26-27)

¹ Keta ne hewii ne denda ne menge etew se ne-vurun su ebpemekedtekutakey ran en. Ne rutun ne migkahi si Hisus, ugaid ne iyan din edlelehan ke menge edumdumaan din, ke sikandin te, “Ingati niyu te kenà kew egkepeneheewit rut te menge ulaula te menge Peresiyu su ibpekitakita ran dà ke ulaula ran diyà te etuvangan te menge etew su iring ini rut te ibpelevag te pan ne ed-eneb.

² Langun te netelevan guntaani, ne ebpekepehawahawa red keuremà. Ne langun ne impegelesà, ne egkepayahan ded.

³ Langun ne impeleglelahey niyu te merusirem ne igkepayag ded te meandew.

Ne misan engkey se impevutbutehey niyu te sikiyu rà ne egkevukayat ded diyà te kerekelan te etew.”

*Engkey se Dait ne Igkeendeki?
(Mateo 10:28-31)*

⁴ “Menge suled ku,” ke si Hisus, “iyan ku igkahi keniyu ne kenà kew meandek dut te menge etew ne iyan dà egkepatey se lawa niyu, ugaid ne warà en ubpu te ed-ul-ulaan dan su kenà dan egkepatey ke himukud niyu.

⁵ Ugaid, ne idtarem ku keniyu ke engkey se ikeandek niyu. Iyan niyu ikeandek ne Eleteala su kenà lawa niyu rà se egkepatey rin su ruen gehem din te kebpekeantug te himukud niyu riyà te apuy ne rakà. Uya, iyan niyu iya ikeandek sikandin.”

⁶ Migkahi pa maa si Hisus te, “Ruen deisek ne pepenuk ne egkepemasa te lelima ne timan ne deruwa rà ne tumbaha. Ne misan iring ketà se kevavà te elehà din, ne warà seveka rà kandan ne egkelipatan te Eleteala.

⁷ Ne iyan kew pè be melipati te Eleteala su misan ke edtiweruwan te bulvul niyu ne nevirang din en. Engketà be ne kenà kew meandek su iyan kew pà belielehà diyà te kandin dut te merakel ne pepenuk.”

*Ke Imbaag ni Hisus Mekeatag Dut te Menge
Etew ne Ebpawew Kandin
(Mateo 10:32-33; 12:32; 10:19-20)*

⁸ “Ne ruen idtarem ku keniyu,” ke si Hisus, “piya engkey en ne etew se ebpayag diyà te

menge etew se ebpesakup kediey ne iyan ibpayag dut te Impeanak te Menusiyà diyà te suluhuen te Eleteala diyà te langit ne ed-engkunen sikandin ne kandin ne sakup.

⁹ Ugaid,” ke si Hisus, “piya engkey ne etew se ebparew diyà te menge etew te sakup ku sikandin, ne kenà rema ed-engkunen ne sakup dut te Impeanak te Menusiyà diyà te menge suluhuen te Eleteala diyà te langit.

¹⁰ “Ne misan engkey en ne etew se edlalag te meraat mekeatag te Impeanak te Menusiyà, ne egkepesahad pà te Eleteala. Ugaid,” ke si Hisus, “piya engkey ne etew ne edlalag te meraat mekeatag te Kedesenan ne Ebpetuntul te menusiyà ne kenè en egkepesehad te Eleteala.

¹¹ “Ne embiya ibpemenayik kew nikandan te kukuman diyà te menge valey ne ebpengedian te penduan dan etawa ibpelaus ke pà diyà te menge gubinedur wey egkeunutan dan ne kenà kew meuru ke ebmemenuwen niyu se kedlalag niyu te kedtindeg te hinawa niyu wey engkey se ralan te kegkahi niyu.

¹² Su iyan ebpenurù keniyu gewii niyu ketà ne ke Kedesenan ne Ebpetuntul te Menusiyà su ebpeketahù te hinawa niyu ke engkey se ibpekahi rin.”

Ke Sempità ni Hisus Mekeatag te Kewasa ne Etew ugaid ne Diyà te Etuvangan te Eleteala ne Kurang nevenar

¹³ Duen senge etew ne meama ketà te nevrurun se migkahi diyà te ki Hisus te, “Meyterù, kehiyi

nu ke kakey ku te ebpeumunan a dut te aren ne intavun te amey rey.”

¹⁴ Migkahi si Hisus te, “Ey, Mama, warà kewagib ku te egkukum keniyu, ne warà kewagib ku te ebaad ketà te aren ne intavun te amey nu.”

¹⁵ Ne midlalag en si Hisus ketà te merakel ne etew te, “Uram kew wey inteng kew te ulaula niyu te warà kegkeeram-am niyu. Su ke tidtu ne puunan te kegkeuyag te etew ne kenà diyà te kearen ne egeweran din.”

¹⁶ Ne intarem en ni Hisus ini se impepevayà te sempita: “Duen senge etew ne kewasa nevenar ne ruen tanà din ne egkepekeyan te keuyahan.

¹⁷ Ne kehingginawa kayi te etew te, ‘Engkey se ed-ul-ulaan ku kayi te langun ne egkepakey ku? Su kenà egkeamin kayi te balungbalung ne warè en edtehuan.

¹⁸ A, ini ves,’ ke sikandin, ‘edrundusen ku pà ini se minge balungbalung ne ebelayan ku te rekelà pà su apey ruen egketehuan ku te langun ne egkeehani ku wey ruma pà ne kearen ku.

¹⁹ Ne arà pè be imbe ne egkehiyen ku te: Bebegian a ne meama! Su neketahù a te rekelà ne keuyahan taman te pipira pà ne rahun. Ne ketà ne edsinendangan a se egkaan, ed-inum, wey ebpatà dà imbe te nanam.’

²⁰ “Ugaid ne migkehiyan sikandin te Eleteala te ‘Merupangdupang ka nevenar! Ini rà ne kerukileman ne kayi rà taman se ked-ubpàubpà nu kayi te ampew te dunya. Ne engkey ve vuwa se kemuney keniyen te kearen ne intahù nu?’ ”

²¹ Ne migkahi pà maa si Hisus te, “Ini ve imbe ke egketemanan dut te piya entei ne etew ne ed-

umanan din te edtehuan te kearen din, ugaid ne warà te hinawa rin ke egkiyuhan te Eleteala.”

Ke Kebpenurù ni Hisus Mekeatag te Kedsarig te Eleteala

(Mateo 6:25-34)

²² Ne migkahi en si Hisus diyà te minge edumdumaan din te, “Ini imbe ke igkahi ku keniyu, kenà kew meuru te egkekaan ne igkeuyag niyu etawa ke engkey se ibelegkas te lawa niyu.

²³ Su ke hinawa niyu ne imbehey keniyu te Eleteala ne belielehà pà te egkekaan, ne ke lawa niyu rema ne imbehey keniyu te Eleteala ne belielehà pà te velegkas.

²⁴ Keniyan niyu rè ma te minge uwak, warà kebpemula ran ne warà ked-ehani ran, ne warà edtehuan dan te egkekaan dan, ugaid ne Eleteala se ebpesavud kandan! Ne iyan kew pè be se belielehà kew pà dut te minge pepenuk!

²⁵ Misan engkey en se kegkenuhun te etew te umur din, ne kenà din egkesumpatan te misan deisek dà te ralan te kegkeuru rin.

²⁶ Embiya kenà niyu egkegaga ini se reisek dà, ne maa engkey ve se pantag din se kegkeuru niyu te ruma pà?

²⁷ “Keniyan niyu rè ma te kevukaran ke engkey se kedtuvù dan. Kenà dan egelevék ne kenà dan ed-avel. Ne misan iring ketà ne igkahi ku keniyu te misan ke kewasa ne datù dengan ne si Salomon ne ke keupiya te velegkas din ne warà dà mekesusuluwan dut te keupiya te seveka keniyan ne kevukaran.

²⁸ Embiya Eleteala se ebpebparas te kevukaran te sagbet iring ketà misan mehaan dà se kedtuvù dan su egkekita niyu guntaan ne keremà ne nehangu en ne egkevinsulan en, ne iyan kew pè be kenà mevehayi te igkevevelegkas niyu. Sikiyu ne deisek se kedsarig niyu!

²⁹ Ketà be ne kenà kew meuru, ne kenà iyan niyu rà idtahù te hinawa niyu ke engkey se egkekaan wey egkeinum niyu.

³⁰ Su ini imbe ke layun intahù te hinawa rut te menge etew ne warà mebperetiyaya rut te benar ne Eleteala. Ugaid ne sikiyu ne kenà kew meuru su netueanan dut te Amey niyu ne Eleteala te engkey se kurang niyu.

³¹ Ne iyan niyu ipeuna te hinawa niyu ke kiyug te Eleteala wey ke kedadù din keniyu, ne arà pà ne ebhayan kew te Eleteala te langun te kurang niyu.”

*Ke Penurù ni Hisus Mekeatag te Edtehuan Tew
te Kekewesai tew Riyà te Langit
(Mateo 6:19-21)*

³² “Sikiyu ini se menge edumdumaan ku,” ke si Hisus, “kenà kew meandek, su misan deisek kew rà ne ke Amey niyu riyà te langit ne egkiyug ne egkeratù kew dut te menge etew ne Edetuan din.

³³ Pesaa niyu en ke langun ne kearen niyu ne ipemehey niyu ve ke elehà din diyà te menge ayuayu. Embiya ini se ed-ul-ulaan niyu ne egkevaluy ne ruen kekewesai niyu riyà te langit su iring te ruen intahù te keletidà niyu riyà te langit ne kenà egkereving, ne kenà egkeamin

ke kekewesai niyu su warà ebpenakew ne warà rumpew ne egketket.

³⁴ Su piya endei niyu idtahù ke kekewesai niyu ne ketà dema ke hinawa niyu.”

Warà Metueni Ke Hewii Etawa Uras te Kedlived Kayi te Dunya ni Hisus

³⁵ Ne mibpenempità si Hisus se egkahi te, “Sesebitan kew neraan ne iyan din meana ne andam kew te misan engkey ne egketemanan, ne kenà niyu ed-evuki ke sulù niyu,

³⁶ su iring kew te minge edsugsuhuen ne ed-tahad te kebpekeuma te ebpengemuney kandan ne riyà ebpuun te egkewingan ne midtelavuk din. Su embiya layun kew ebpenehana neraan, ne ebpekeuma ke ebpengemuney keniyu ne ebpenehetiat, ne mehaan kew ebpekebukà te lekeb.

³⁷ Meupiya nevenar se hinawa rut te minge edsugsuhuen ne neumaan dut te ebpengemuney kandan ne warà midlipereng su mid-andam neraan. Igkahi ku keniyu ini,” ke si Hisus, “se ini se ebpengemuney ne edsembian din ke belegkas din ne ebpepinuuwen din sikandan diyà te egkeenan ne ebpehendaran sikandan.

³⁸ Meupiya nevenar se hinawa rut te minge edsugsuhuen ne neumaan dut te ebpenge-muney kandan ne mid-andam neraan misan ebpekeuma sikandin te edluuk se hewii te merukilem etawa egkepkepawà en.

³⁹ Ugaid ne ini se idtahù niyu te hinawa,” ke si Hisus, “embiya ebpekeingat ke kemuney te valey ke keenu ebpekeuma ke tekawen ne ebpenehana

neraan sikandin su apey kenà ebpekelusud te valey rin ke ebpenakew.

⁴⁰ Ne engketà kew red dema, penehana kew neraan su ebpekeuma ke Impeanak te Menusiyà dut te kenà niyu ebpenerengen ne egketahuan te andew.”

Ke Sempità ni Hisus Mekeatag te Edsugsuhuen ne Ebpekemalen ne Meperumaruma te Idsuhù kandin wey ke Kenà Meperumaruma

(Mateo 24:45-51)

⁴¹ Guna su nerineg dan ini se midlalag ni Hisus ne migkahi si Pedro te, “Ini se impepevayà nu te sempità nu ne engkey, sikami se egkesuhat etawa abpeg ded ke ruma ne etew?”

⁴² Ne midtavak si Hisus ke Kerenan te sempita ded, ke sikandin te, “Ke edsugsuhuen ne egked-serihan wey metmetau su edtuman te idsuhù kandin, ne ebpekemalen en dut te ruma ne edsugsuhuen. Ne sikandin se ebehey te egkekaan dut te ruma ne edsugsuhuen ketà te kegkekaan dan.

⁴³ Meupiya nevenar se hinawa ketà te edsugsuhuen ne ebpekemalen ke ebpekeuma ke ebpengemuney kandin ne iyan din egkekita se midtuman din ke langun ne insarig kandin!

⁴⁴ Idtarem ku keniyu,” ke si Hisus, “ini se edsugsuhuen ne ebpekemalen ne midtuman te langun ne insarig kandin, ne sikandin en se ebpekekamal dut te langun ne kearen te ebpengemuney kandin.

⁴⁵ Ugaid ne embiya iyan netahù te hinawa kayi te edsugsuhuen ne ebpekemalen se, ‘A, kalu ke meuhet pà ebpekeuma ke ebpengemuney

kenami,' ke sikandin, ne ketà ne mibpemedasan din en ke ruma ne edsugsuhuen ne meama abpeg ke menge meritan ne migkaankaan dè be sikandin wey ebpinginum taman te egketevereg en,

⁴⁶ ne ketà ne netekew mekeuma ini se ebpenge-muney kandin te hewii ne warà din penerenga su warà din metueni ke endei egketahù ke andew te kedlived din. Ne ed-imetayan dut te ebpenge-muney kandin ne ebpeheramen sikandin dut te egketemanan te menge etew ne kenà meperumaruma te Lalag te Eleteala.

⁴⁷ “Ke edsugsuhuen ne netuenan din ke insarig kandin ne helevek,” ke si Hisus, “ugaid ne warà mebpenehana wey warà medtuman dut te insarig kandin ne ebpeketimaran te ebasas.

⁴⁸ Ugaid ne ke edsugsuhuen ne warà din metueni neraan ke engkey se ibpehelevek te ebpengemuney kandin ne ruen mid-ulaula rin ne dait ne ibedasi kandin, ne ebedasan sikandin ugaid ne kenà dà utew ebpeketimaran. Su ke etew,” ke si Hisus, “ne rekela se insarig kandin ne rekela dema se egkepenareng kandin. Ne embiya dekdekelà pà se insarig kandin ne iyan pè be kenà dekelà pà se egkepenareng kandin.”

Ke Kebperetiyaya ki Hisus ke Puunan te Kebpe-mekedsingey te Hinawa dut te Telteleanak (Mateo 10:34-36)

⁴⁹ Migkahi maa si Hisus te, “Iyan ku kinepengkayi te ampew te dunya su ed-ewit a te apuy ne iyan din meana ne egkukumen ku ke menge etew. Ne kiyug ku perem ne mehaan en egkeretemi.

⁵⁰ Dekelà pà se kemeresayan ne ibpevayà ku ne warà pà mekeuma kediey. Iring a te ebpekeutuk te langit taman kenà ku mepasad ini.

⁵¹ Maa, iyan niyu kunaan ke ini se kinepengkayi ku ne ed-ewit a te kebmelinew kayi te kelibutan? Kenà en iya! Su idtarem ku keniyu te kenà kebmelinew, su ini se kinepengkayi ku ne ruen kebpepekedsingey te hinawa dut te menge etew.

⁵² Igenat gunteani ne embiya ruen lelima ne telteleanak, ne ebpepekedsingey ke hinawa ran. Ne tetelu se egkunterà dut te deruwa, ne iring din ded dema ke deruwa ne egkunterà dut te tetelu mekeatag te keduma ran kediey.

⁵³ Ke amey ne egkunterà dut te anak din ne meama, ne ini se anak din ne egkunterà dut te amey rin. Ne ke iney ne egkunterà dut te anak din ne meritan, ne ini se anak ne egkunterà dut te iney rin. Ne ke enuhang ne meritan ne egkunterà dut te ambey rin, ne ini se ambey ne egkunterà dut te enuhang din ne meritan.”

*Ke Menge Etew ne Metau ne Ebpenipat te Hewii
Ugaid ne Uvag Kun Warà Dan Mesebuti Ke Tuus
Dut te Ned-ulaula Te Arà ne Hewii
(Mateo 16:2-3)*

⁵⁴ Ne migkahi si Hisus diyà te merakel ne menge etew te, “Embiya egkekita niyu te kivel diyà te edsenlepan ne arà dà ne egkahi kew te, ‘Mehaan en ed-uran.’ Ne ed-uran iya rema.

⁵⁵ Ne embiya egketuusan niyu te ebpependiyà ke keramag te diraya ne ke sikiyu te, ‘Meinit ini.’ Ne ed-andew iya rema.

⁵⁶ Sikiyu ne minge etew ne uvag kun warà sesabut niyu te egketemtemanan guntaani! Embiya edtengteng kew te tanà wey langit ne metau kew nevenar ne ebpenipat te hewii, ne meambe ke kenà niyu egkesebutan ke tuus kayi te egketemtemanan guntaan?”

Pekidtuntey kew rut te Edwagib Keniyu
(Mateo 5:25-26)

⁵⁷ Ne migkahi maa si Hisus te, “Meambe ke kenà niyu ebpegpegitungen ke engkey se edait ne ed-ul-ulaan?”

⁵⁸ Upama ke ruen edwagib kenikew ne edewiten ka riyà te kukuman, ne pekidtuntey ka nevenar kandin gewii te keniyon ka pà te ralan su apey kenà ka ibpelaus diyà te uwis. Su embiya ebpekeetuvang ka riyà te uwis ne ibehey ka riyà te minge pulis, ne ke minge pulis se ebilanggu keykew.

⁵⁹ Idtarem ku keniyu,” ke si Hisus, “kenà ka ebpekelihawang ketà taman te kenà nu egkevaran ke langun ne keselaan nu.”

13

¹ Ne ruen minge etew ne nekeuma ketà su mibpenudtul ki Hisus mekeatag te minge etew riyà te Geliliya ne mibpeimetayan ni Gubinedur Pilatu gewii te ebpelengesa ran diyà te Nekebpuru ne Valey te Eleteala.

² Ne migkahi si Hisus kandan te, “Geina te mibpeimetayan ini se minge etew te iring ketà, ne maa iyan niyu kunaan ke muna pà se keselaan dan dut te ruma ne minge etew te Geliliya?”

³ Kenà arà! Ugaid ne ini se igkahi ku keniyu te embiya kenà kew ebpemedsendit wey ed-engkeran niyu ke meraat ne ulaula ne ebpematey kew red dema iring kandan.

⁴ Ne menu arà se sepulù wey walu ne menge etew riyà te Siluwi,” ke si Hisus, “ne mibpematey ne nepilayan te metmetikang ne valey, maa iyan niyu kunaan ke muna pà se keselaan dan dut te ruma ne menge etew te Hirusalim?

⁵ Kenà arà! Ugaid ne igkahi ku keniyu te embiya kenà kew ebpemedsendit wey ed-engkeran niyu ke meraat ne ulaula ne ebpematey kew red dema iring kandan.”

Ke Kayu ne Ed-ingaranan te Igira ne Mibpenrewakan ni Hisus

⁶ Ne ruen maa ruma ne sempità ne imperineg ni Hisus kandan, ke sikandin te, “Duen senge etew ne meama ne ruen kayu rin ne ed-ingaranan te igira ne impemula riyà te pemulaan din. Senge hewii ne midlauy rin su ebpenareng en sikandin ke ruen bahas din, ugaid ne warà.

⁷ Ketà dà ne migkehiyan din ke meama ne ed-ihawan ketà te, ‘Egkemeni ini se senge puun ne kenà pà lavew ebahas? Su nekedtetelu en ne rahun se kebmememati ku te ebehas ne warà pà lavew bahas din. Pilaya nu en! Su ebpekeenget dà kayi te ruma pà ne pinemula.’

⁸ “Ne migkahi ini se meama ne ed-ihawan te, ‘Kenà te pà, Anggam, ebpileyen. Ebpemememati te pà te senge rahun, su ed-ihewanan ku pà ke ebpekelingut wey ebukbukan ku pà te ibpelambù.

⁹ Ne embiya ebahas ded kayi te edtundug ne rahun ne meupiya. Ugaid ne embiya kenà ne arà pà ne ibpepiley nu en.' ”

Ruen Egkunterà ki Hisus ne Edawey perem kandin te Ebpemawì dut te Hewii ne Id-imeley

¹⁰ Senge Hewii ne Id-imeley ne riyà si Hisus te Baley ne Ebpengedian te Hudiyanen te penduan dan su ebpenurù.

¹¹ Duen ketà meritan ne nevekut su mibpe-mekeiran te vusew. Nekedsepulù en wey walu ne rahun ini se kinekevekut din, ne kenà din en iya egkeketeng te misan deisek dà.

¹² Guna su nekita ni Hisus ini se meritan ne migkahi sikandin te, “Bayi, egkeulian ke en te raru nu.”

¹³ Ne midampen ni Hisus ke peka rin, ne arà dà ne netidtu en dut te meritan ke peka rin ne nekereyù nevenar sikandin te Eleteala!

¹⁴ Ne neepes ini se egkeunutan dut te valey ne ebpengedian te Hudiyanen te penduan dan su mibawì si Hisus te Hewii ne Id-imeley. Ke sikandin te, “Enem be ne hewii ke igelevek tew. Ne lusud be kayi ne pengkayi kew se ebpepemevawì, kenà te ini se Hewii ne Id-imeley.”

¹⁵ Migkahi si Hisus kandan te, “Sikiyu ne engkungkun ne edtuman te suhù te Eleteala! Menu, kenà uman senge etew keniyu ne ed-ekar te sapì din etawa kudà din ne edtuyuken din diyà te wayig su ibpeinum din misan Hewii ne Id-imeley?

16 Ne ini se meritan ne kevuwaran dut te keep-epuan tew rengan ne si Abraham ne neked-sepulù en wey walu ne rahun se kinevakù kandin ni Setanas ke ratù te pekaid. Kenà egkepakey ne kenà ed-ekaran sikandin dut te kinekevakù din misan Hewii ne Id-imeley.”

17 Langun dut te egkunterà ki Hisus ne nengzeyeyaan dut te migkahi ni Hisus kandan, ugaid ne ke ruma ne menge etew ne nesuatsuat su nekita ran ke mekegeyip ne mid-ulaula ni Hisus.

Insempità ni Hisus ke Edetuan te Eleteala te Pinekemerimet ne Lahas ne ed-ingaranan te Mustasa

(Mateo 13:31-32; Marcos 4:30-32)

18 Ne migkahi maa si Hisus te, “Engkey ma se edait ne ebpeiringan ta te Kedatù te Eleteala dut te menge etew? Engkey ma se meupiya ne upama ta?

19 Ini se kedtuvù te Kedatù te Eleteala te menge etew ne ebpekeiringan dut te merimet nevenar ne lahas ne ed-ingaranan te Mustasa ne impemula riyà te pengengewiran. Edtuvù ini ne ebaluy ne kayu, ne rutun ebpenesalag ke pepenuk te subpang din.”

Insempità ni Hisus ke Edetuan te Eleteala te Menge Etew dut te ibpepelevag te Pan

(Mateo 13:33)

20 Ne migkahi maa si Hisus te, “Engkey se id-upama ta te Edetuan te Eleteala rut te menge etew?

21 Ini se Edetuan te Eleteala te munge etew ne id-upama ta te ibpepelevag te pan ne migkuwa te meritan ne idsawug dut te senge asad ne tapung su apey ebpeketuvù ke mibawug ne tapung.”

Ke Sempità ni Hisus Mekeatag te Menge Etew ne Egkiyug ne Edlusud Dut te Melihet ne Gumawan ne Ebpendiyà te Menge Etew ne Edetuan te Eleteala

(Mateo 7:13-14; 21:23)

22 Nekeipus si Hisus ketà ne migenat en se ebpendiyà te Hirusalim, ne ketà te ked-ipanew rin ne mibpengawet-awet sikandin te munge inged su ebpenurù.

23 Duen senge etew ne mid-insà kandin te, “Mama, maa kenà be utew merakel ne etew se egkepeliyu te Eleteala?”

Midsempità si Hisus kandan se egkahi te,

24 “Pegelep kew nevenar te kedlusud niyu ketà te melihet ne gumawan te kenà pà egkelekevan, su idtarem ku keniyu ini,” ke si Hisus, “te merakel se egkesuat ne edlusud ugaid ne kenà dan en ebpekelusud.

25 Su ke kemuney te valey se ebpendiyà te gumawan su ebpintuan din ne riyà kew rà te liyu se edtawag te, ‘Mama, bukai key pà te lekeb.’

“Ugaid ne iyan din egkehiyen se, ‘Kenà ku egketuenan ke endei kew ebpuun.’

26 “Ne iyan niyu maa egkekahi se, ‘Kenà nu egketenuran te rengan ne mibpeer-erungutey ki pà se egkaan ne mibpenurù key pà nikuna diyà te inged dey?’

27 “Ugaid ne edtavak maa sikandin te, ‘Kenà ku iya egketuenan ke endei kew ebpuun. Awà kew kayi te kediey, sikiyu ne menge etew ne meraat se ulaula niyu!’ ke se kemuney te valey.

28 “Ne ebpekependerawit kew se ebpekengingitel kew su egkekita niyu riyà te lusud dut te menge etew ne Edetuan te Eleteala arà se keep-epuan niyu rengan, ne en si Abraham wey ke anak din ne si Isaac wey ke apù din ne si Jacob abpeg dema ke langun ne menge etew ne mibpelambas te Lalag te Eleteala, ugaid ne sikiyu ne kayi kew rà te luwal su kenà kew ebpekelusud ketà.

29 Ne merakel dema se menge etew ne egenat te epat ne pediyulu kayi te kelibutan ne ebpekeuma su ebpekepinuu te egkaan ketà te kevrunan dut te menge etew ne Edetuan te Eleteala.

30 Ugaid ne ruen menge etew guntaan ne mepeembavà se hinawa ran wey ebpesuhùsuhù dan te ruma ran, ugaid ne egkeuma arà se hewii ne sikandan ke mepurù se ketengdanan din. Ne ruen menge etew guntaan ne mepurù se ketengdanan din, ugaid ne egkeuma arà se hewii ne sikandan se pinekemevavà.”

Bayuk ni Hisus te kegkerurunù din dut te Menge Mehinged te Hirusalem

(Mateo 23:37-39)

31 Ketà te arà ne menge hewii ne ruen menge Peresiyu ne mid-ingguma ki Hisus ne migkahi ran te, “Levundus ke en diyà te ruma ne inged su ed-imetayan ka kun ni Hirudis.”

³² Ne migkahi si Hisus te, “Si Hirudis ayan se metau te edliyuk ne kehiya niyu kandin te, ‘Kenà a ed-awà kayi su guntaani wey keremà ne edlevundusan ku pà ini se helevek ku te ebpenegseg te vusew ne ebpemekaid te menge etew wey ebpemawì a te menge daru ran, ne ketà te iketelu ne hewii ne egkeipus ku ini.’

³³ Ugaid ne ed-ip-ipanew ad ma guntaan wey keremà abpeg te ikeruwa pà ne hewii su warà ebpekekaid kedì kayi su langun ne ebpelambas te Lalag te Eleteala ne riyà ed-imetayi te lusud te inged ne Hirusalim.”

³⁴ Ne ketà ne netenuran ni Hisus ke menge ulaula rut te menge etew te Hirusalim ne migkahi sikandin te,

“Ey, igkerurunù ku sikiyu ne menge mehinged te Hirusalim!

Su sikiyu ke mibpengimatey

te menge etew ne mibpelambas te Lalag te Eleteala,

wey mibpenrumbag niyu te batu

ke menge etew ne midsuhù te Eleteala kenihan te keniyu!

Kenà kepipira ku rà perem eburuna sikiyu

su edtugenuren ku sikiyu

ebpekeiring te upa ne edlekup te anak din,

ugaid ne kenà kew ebpelekup kediey!

³⁵ Na guntaan ne ed-ewaan en te Eleteala ke inged niyu.

Ne ini se igkahi ku keniyu,

igenat guntaani ne kenà a niyu en egkekita

taman te egkeuma arà se hewii

ne ebpekekahi kew te, 'Edeyuen tew ini se nekeuma, ne midsuhù te Eleteala ke Kerenan tew.' "

14

Ebpenipaten si Hisus dut te Menge Peresiyu ke Ebpemawì Sikandin te Hewii ne Id-imeley

¹ Seveka maa ne Hewii ne Id-imeley ne ruen senge etew ne egkeunutan te menge Peresiyu ne mid-inggat ki Hisus te egkaan diyà te valey rin. Ne ketà ne ebpenipaten si Hisus dut te menge etew ke ebpemawì sikandin te Hewii ne Id-imeley.

² Ne ruen ketà meama ne ebpekedaru su midlevag ke velad din wey paa rin.

³ Mid-insà si Hisus dut te menge meysterù te penduan wey ke menge Peresiyu te, "Kayi te penduan tew, ne menu idtuhut be kenitew se ebpemawì te Hewii ne Id-imeley?"

⁴ Ugaid ne langun dan ne mibpeenengeneng. Ne migeweran ni Hisus ke meama ne ebpekedaru ne arà dà ne neulian en, ne impeuli din en.

⁵ Ne migkahi en si Hisus kandin te, "Embiya ruen senge etew keniyu ne ruen anak din etawa sapì din ne neulug diyà te merallem ne kalut te Hewii ne Id-imeley, ne maa kenà niyu edegdehawan te ebpehaun su geina ne Hewii ne Id-imeley?"

⁶ Ne ketà ne warà dan meketavak.

Ke Penurù ni Hisus Keyta Embiya Edtelavuk ki te Kevurunan

⁷ Netuusan ni Hisus te ini se menge etew ne mid-inggat ketà te Peresiyu te egkaan diyà te valey rin ne mibpemili dan te menge ebpinuwan te egkeedatan, ne mibpenempitâ sikandin, ke sikandin te,

⁸ “Embiya egkeinggat kew riyà te kevrunan te egkewing, kenà kew ed-una ebpinuu rut te ebpinuwan te egkeedatan su kema ke ruen mepurù pà keykew ne ebpekeuma.

⁹ Ne ed-uvey keniyu ini se mibair te kevrunan se egkahi te, ‘Sikandin se pepinuuwa nu kenian.’ Ne ketà ne egkeyeyaan ka su riyà kew ibpepinuu te iniyuhan.

¹⁰ Ini se meupiya ne ed-ul-ulaan niyu embiya egkeinggat kew riyà te kevrunan, diyà kew pinuu te iniyuhan. Su embiya ve ed-uvey ke mibair te kevrunan ne egkehiyan kew te, ‘Kenà kew ma ruen dà pinuu su kayi kew pinuu te sineruwan ebpinuwan.’ Ne ketà ne egkeedatan kew rutun te merakel ne etew.

¹¹ Su ke etew ne ebpepurùpurù te hinawa rin ne ibavà te Eleteala, ugaid ke etew ne mepeembavà te hinawa rin ne ibpepurù sikandin te Eleteala.”

¹² Ne migkahi si Hisus dut te etew ne mibair te kevrunan te, “Ne sikuna rema, Mama, embiya ebair ka te kevrunan ne kenà iyan nu rà inggata ke menge sepekat nu wey ke menge suled nu, etawa ke menge etew riyà te uvey nu ne egkewasa. Su embiya ini se ed-ul-ulaan nu, ne ed-inggaten ka red nikandan ne ketà ne nekebayarey kew en.

¹³ Ugaid ne embiya ebair ka te kevrunan ne

iyana nu inggata ke munge ayuayu, ke munge etew ne sarir, ke munge pungkù wey ke munge pisek.

¹⁴ Ne embiya ini se ed-ul-ulaan nu ne dekelà se kegkehalew nu. Su kenà ke ma nikandan egkevayaran, ugaid ne Eleteala se ebales keykew ketà te akir din ne hewii te kegkevanew te munge etew ne metidtu se ulaula.”

Ke Sempità ni Hisus Mekeatag te Kevurunan te Kewingan ne Ibpeiring Din Dut te Kevurunan te Eleteala te Menge Etew ne Edetuan Din

(Mateo 22:1-10)

¹⁵ Duen senge etew ketà te uvey ni Hisus ne nekerineg te migkahi ni Hisus ne migkahi te, “Meupiya nevenar se hinawa rut te ebpeketelavuk ketà te kevrunan te Eleteala dut te munge etew ne Edetuan din.”

¹⁶ Ne ketà ne ruen insemptà ni Hisus kandin te, “Duen senge etew ne meama ne mibair te dekelà ne kevrunan ne merakel se mid-inggat din.

¹⁷ Guna su ini en ke bungkà te kevrunan din ne midsuhù din ke edsugsuhuen din diyà te munge etew ne mid-inggat din te ebpesabut kandan te, ‘Kuwa kew en su ebpekaan en.’

¹⁸ “Ugaid ne langun te mig-inggat din ne mibaal te sumbuwan. Ke se neuna kayi te edsugsuhuen te, ‘Kenà dà mebmeraas se hinawa nu su kenà a ebpekependiyà su ruen tanà ne mibpemasa ku ne ed-intengan ku pà.’

¹⁹ “Senge etew maa se migkahi te, ‘Kenà dà mebmeraas se hinawa nu su kenà a ebpekependiyà su ruen sepulù ne sapi ne mibpemasa ku ne ini pà ne igeram ku te edadu.’

20 “Ne senge etew pà lavew se migkahi te, ‘Behu e pà ne nekeesawa ne kenà a ebpeketelavuk.’

21 “Mid-uli ini se edsugsuhuen ne mibpenudtulan din ke ebpengemuney kandin dut te langun ne minge lalag te minge etew. Ne neepes ini se ebpengemuney kandin ne migkahi maa sikandin dut te edsugsuhuen din te, ‘Pekehaan ka se ebpendiyà te inged ne tuntula nu ke kelesada wey ke minge ralan ne pendumaa nu ke minge ayuayu, ke minge sarir, ke minge pisek wey ke minge pungkù.’

22 “Huna su mid-uli ini se edsugsuhuen ne migkahi sikandin dut te ebpengemuney kandin te, ‘Netuman ku en ke insuhù nu kedì ne ini ran en, ugaid ne warà pà mepengkeg ini se valey.’

23 “Ne migkahi pà ke ebpengemuney kandin te, ‘Tuntula nu ke merampal wey ke merimun ne minge ralan ne il-iluti nu te ebpepengkayi ke minge etew su apey egkepengkeg ini se valey ku.

24 Ne ini se igkahi ku keniyu, warà senge etew rà dut te neuna ne mid-inggat ku se ebpekeheram dut te elugan ku misan deisek dà.’ ”

*Ke Penurù ni Hisus Mekeatag Dut te Kerehanan te Keduma Kandin
(Mateo 10:37-38)*

25 Ne mid-ipanew maa si Hisus ne merakel nevenar ne etew ne miduma kandin. Ne midsineruwan ni Hisus sikandan se egkahi te,

26 “Embiya ruen etew ne egkiyug ne eduma kediey ugaid ne iyan pà dekelà se limù din dut te amey rin wey iney rin, esawa rin, minge anak

din, menge suled din, etawa misan ke hinawa rin, ne kenà benar sikandin ne edumdumaan ku.

²⁷ Su ke etew ne egkiyug ne eduma kediey ne iyan iya se lipati rin ke kandin ne kiyug ne tianga rin ke kandin ne pinebelavag ne kayu ne ed-ingaranan te Krus ne iyan din meana ne tumana rin ke menge suhù ku misan ibpatey rin pà se keduma rin kediey.

²⁸ “Upama ke ruen senge etew keniyu,” ke si Hisus, “ne egkesuat ne ebpeitindeg te met-metikang ne baley, ne ed-unaan din pà te ebpeg-pegitung ke pira se igkegastu rin su apey rin egketueni ke ebpekegaga sikandin etawa kenà.

²⁹ Su embiya kenà din ebpegitungen ke pira se igkegastu rin, ne kalu ke iyan din dà egketem-anan se matag igkevunsud ke menge pelaus. Ne egkekita rut te langun ne menge etew ini ne ed-un-undaan su warà din meimasad.

³⁰ Ne ebpeglelelahey ran te, ‘Iyan tumù ne warà mibulug sikandin ke kenà din bes egkepasad.’ ”

³¹ Ne migkahi maa si Hisus te, “Iring ded dema te ratù ne ebpekibunù te senge etew ne ratù, su ed-unaan din pà te ebpegitung ke ebpekegaga sikandin ne ebpekibunù dut te senge etew ne ratù ne ruen deruwa nepulù nengivu se sakup din, ugaid ne sepulù dà nengivu se kandin ne sakup.

³² Embiya egkeantap din te kenà ebpekeatu ke menge sakup din, ne ruen edsuhuen din te ebpendiyà te senge etew ne ratù te meriyù pà ini se kunterà din su ebpekidtuntey te warà pà mekebunù.

³³ Ne iring din ded dema,” ke si Hisus, “dut te minge etew ne eduma kediey, kenà kew benar ne edumdumaan ku embiya kenà niyu edtehaken ke langun ne igkenuhuni niyu te kedumaruma niyu kedì.”

Ke Sempità ni Hisus te Ini se Keduma Kandin ne Ebpekeiring te Timus

³⁴ Ne midsempità maa si Hisus te, “Meupiya ini se timus, su ebpekevehey te nanam dut te egkeenen tew ugaid ne embiya egkeawà en ke nanam te timus ne warà en dalan te kebmetimus din pà maa.

³⁵ Warà en iya pantag din su kenà egkehamit te misan ebunu ne ibpelambù te tanà, ne idtimbang dà lavew. Na,” ke si Hisus, “ini se migkahi ku ne itaan niyu ke telinga niyu.”

15

Ke Sempità ni Hisus Mekeatag te Bilibili ne Nelaag ne Netuen ded ne Impeiring Din Dut te Etew ne Mibpendsendit te Salà Din

(Mateo 18:12-14)

¹ Senge hewii ne merakel se minge etew ne ebpevayad te buwis wey minge etew ne mekesesalà dema ne mid-uvey ki Hisus su ebpemineg te penurù din.

² Nekita ini rut te minge Peresiyu wey minge meysterù te penduan ne mibpemivig dan se egkahi te, “Si Hisus ini ne ebpemekiduma kayi te minge etew ne mekesesalà ne ebpekidtuhen pà dema kandan.”

³ Ne ketà be ne mibpenempità si Hisus kandan te,

⁴ “Embiya ruen senge etew keniyu ne ruen mehatus ne bilibili rin ne seveka se nelaag, ne engkey se ed-ul-ulaan din? Ini imbe se ed-ul-ulaan din, ed-ewaan din imbe ke siyew nepulù wey siyew ne ebpenenabtab su ebpenuntulen din arà se seveka ne nelaag taman te egketuen din.

⁵ Ne embiya egketuen din ini ne egkehale-whalew nevenar sikandin, ne ketà ne ed-sepipiyen din,

⁶ ne ed-uli en. Embiya ebpekeuma riyà te valey rin ne ebpenenawag sikandin dut te menge ruma rin se egkahi te, ‘Kehalew kew su netuen ku red ini se nelaag ne bilibili ku.’

⁷ Ne igkahi ku keniyu,” ke si Hisus, “te iyan pà dekelà ne kehelawan diyà te langit embiya ruen senge etew ne mekesesalà ne ebpekendsendit ne ed-engked te meraat ne ulaula rin, tumin dè be kayi te siyew nepulù wey siyew ne menge etew ne kenè en mulà ebpemedsendit su metidtu kun.”

Ke Sempità ni Hisus Mekeatag te senge elad ne pirak ne netarin ne Ebpekeiring Dut te Etew ne Mibpedsendit te Salà Din

⁸ Ne midsempità maa si Hisus te, “Upama ruen senge etew ne meritan ne ruen sepulù din ne pirak ne elin-elin pelatà ne neterinan te senge elad. Engkey se ed-ul-ulaan din? Ini imbe se ed-ul-ulean din, edtemteman din ke sulù ne arà pà ne ebpenepung sikandin te valey su ebpemengaan din taman te egketuen din ded.

⁹ Ne embiya egketuen din ded ne ebpenenawag sikandin te minge ruma rin se egkahi te, 'Kehalew kew su netuen ku red ini se kureta ku ne netarin.'

¹⁰ Ne igkahi ku keniyu," ke si Hisus, "ne engketà ded be imbe ke kehelawan dut te minge suluhuen te Eleteala riyà te langit ke ruen senge etew ne mekesesalà ne ebpekendsdit ne ed-engked te meraat ne ulaula rin."

Ke Sempità ni Hisus Mekeatag te anak ne Nelaag ne Ebpekeiring Dut te Etew ne Mibpedsendit te Salà Din

¹¹ Ne midsempità pà maa si Hisus te, "Duen meama ne deruwa se anak din ne elin meama.

¹² Migkahi ini se ari riyà te amey rin te, 'Amà, behayi ad nikew te kediey ne umun kayi te minge aren nu.' Arà dà ne mibaad en dut te amey ke aren din dut te deruwa ne anak din.

¹³ Warà dà meuhet ne mibpasa en dut te ari ke kandin ne umun ne migkuwa rin ke langun ne kureta rin ne mid-awà en. Diyà mibpesinaru sikandin te medmeriyù ne inged ne rutun din be emina ke kureta rin te warà pantag din.

¹⁴ Guna su neeminan en sikandin ne migetuk se bitil ketà te inged, ne ini se kenakan ne warà egkepesineruwan din.

¹⁵ Ketà be ne mibuyù sikandin te helevek dut te etew ketà ne iyan imbehey kandin ne helevek ne edtuganur te bavuy riyà te taneb.

¹⁶ Tuus te kegkevital din ne egkeiveg en sikandin dut te savud te bavuy, ugaïd ne warà ma ebpekaan kandin.

17 “Guna su neuhet ne nekemuhudmuhud sikandin ne kehingginawa rin te, ‘Langun dut te menge etew ne egelevek ki Amà ne edsawad-sawad se egkekaan dan, ugaid ne siaken kayi ne ebpatay ad te bitil.

18 Iyan tumù se ed-uli e red diyà te ki Amà ne ini se egkehiyen ku, “Amà, dekelà se salà ku diyà te Eleteala wey kayi te sikuna ne amey ku.

19 Kenà ad edait ne anak a nu pà, ugaid ne peheleveka a nu rà iring dut te edsugsuhuen nu.”

20 Arà dà ne mid-uli en ini se kenakan diyà te amey rin.

“Ne riyà pà sikandin te meriyù ne nesandeng en dut te amey rin. Ne midaat nevenar se nanam dut te amey rin kandin ne mibpelelahuy en se edtalavuk kayi te anak din ne midrakep din ne ereki ini se anak din.

21 ‘Amà,’ ke se anak din, ‘dekelà en se salà ku riyà te Eleteala wey kayi te sikuna ne amey ku ne kenà ad edait ne anak a nu pà.’

22 “Ugaid ne midtawag dut te amey rin ke menge edsugsuhuen din se egkahi te, ‘Pekehaan kew ne ipengkayi niyu ke mèmeupiya ne velegkas ne iseluub niyu kandin’. Sisingi niyu sikandin wey telumpai niyu pà sikandin.

23 Engaya niyu ve arà se nati te sapi ne pinelambù ne sumbelia niyu su ebair ki te kevruranan.

24 ‘Su ini se anak ku ne iring iya te minatey en, ne guntaani ne neuyag maa. Su iring te nelaag en,

ne guntaani ne mid-ulì ded.’

Arà dà ne midrudsuan dan en ke kegkevurun dan.

²⁵ “Ne ini se kakey ne anak dut te lukes ne riyà te pengengewiran. Guna su ed-ulì en ne ebpelpelingguma en sikandin kayi te valey ne nekerineg sikandin te edlebpad wey edsayew.

²⁶ Ne midtawag din se senge etew ne edsugsuhuen dut te amey rin ne mid-insàan din te, ‘Engkey ayan se ed-ul-ulaan niyu kenian te valey?’

²⁷ Midtavak ke sugsuhen te, ‘Ke ari nu ne mid-ulì en, ne impesumbali dut te amey nu ke pinelambù ne nati su warà ded nekekaid dut te ari nu.’

²⁸ “Ugaid ne neepes ini se kakey ne kenà en ebpemenayik diyà te baley ran. Ketà ne mibpemenaug ke amey rin ne midneyneyuan din te ebpepemenayik.

²⁹ Ugaid ne iyan din migkahi kayi te amey rin te, ‘Tentenuri nu, Amà, te kenà pira rà ne rahun se kinehelhelevek ku keykew iring dut te edsugsuhuen nu, ne warà a keenu midsuer keykew. Ne misan iring ketà ne warà a nu behayi te misan kambing dà su apey a mekehalewhalew rut te minge sepekat ku.

³⁰ Ugaid ne guna su mid-ulì en ayan se anak nu ne mideraat te kearen nu su indumaruma rin te meritan ne midsumbali nu mulà ke pinelambù ne nati.’

³¹ “ ‘Mama,’ ke se amey rin, ‘warà ka mekevelag kediey ne langun te kearen ku ne keykew.

32 Ugaid ne iyan din kemeyidan ne egale-whalew ki,
 su ini se ari nu
 ne iring iya te minatey en,
 ne guntaani ne neuyag maa.
 Su iring te nelaag en,
 ne guntaani ne mid-ulì ded.' ”

16

Ke Sempità ni Hisus Mekeatag te Kenà Metidtu ne Ebpeheweren te Kekewesai

¹ Ne ruen ruma pà ne sempità ne migkahi ni Hisus dut te edumdumaan din. “Duen senge etew ne kewasa,” ke sikandin, “ne ruen midserihan din dut te kearen din. Ne ruen mibpenudtul kandin te ini se midserihan din ne ederaat dà dut te kekewesai rin.

² Nerineg din arà ne midtawag din arà se kedserihan din ne migkahi te, ‘Engkey ini se nerineg ku mekeatag kenikew? Isurat nu en ke langun ne kegkuwinta nu kayi te ini se helevek ne insarig ku kenikew su kenà ke en egkepakey ne kedserihan ku.’

³ “Ne kehingginawa rut te meama ne kedserihan te, ‘Ibpeawà e bes dut te mepurù ku. Engkey en be se ed-ul-ulaan ku? Su kenà a ebpekegaga ne egkekalut wey egkeyeyaan a ne ebpememuyù.

⁴ A, ini ves se ed-ul-ulaan ku,’ ke hingginawa rin, ‘su apey ruen egkepesineruwan ku ke ibpeawà ad nikandin kayi te helevek ku.’

⁵ “Ketà ne midtawag din te idsenge etew ke langun ne ruen utang din ketà te mepurù din.

Ke neuna ne mid-insaan din te, 'Pira pà ke utang nu rut te mepurù ku?'

6 "Ne midtavak ini se meama te, 'Mehatus ne latà te lana.'

"Ne migkahi ini se kedserihan te, 'Ini red ke listaan te utang nu, ne pinuu ka ne degdehawi nu te edsambì te lelima nepulù dà.'

7 "Ne mid-insaan din maa ke senge etew te, 'Pira pà ke utang nu?'

"Ne migkahi ini se meama te, 'Sengivu ne sakù te parey.'

"Migkahi maa ini se kedserihan te, 'Ini ke listaan te utang nu, ne iyan nu rà isurat se walu nehatus.'

8 "Guna su nerineg kayi te mepurù te kedserihan ne nekekahi sikandin te, 'Hey, metautau sikandin ne ebpenehana te keuyahan din keuremà!' "

Ne migkahi en maa si Hisus te, "Ke menge etew ne kayi rà te ampew te dunya ne kenà sakup te Eleteala ne metau ne ebpekiduma rut te ruma ran su apey ruen egkekuwa ran. Ugaid," ke si Hisus, "ke menge etew ne sakup te Eleteala ne kenà dan bes metau ne ebpenehana te akir din ne hewii riyà te langit.

9 Tembù be igkahi ku keniyu," ke si Hisus, "te gemita niyu ini se kekewesai niyu kayi te ampew te dunya te edtavang dut te menge ayuayu su embiya ebpatay ke en ne kenà nu en egemiten ke kekewesai nu ne edtelimaan ka te Eleteala riyà te langit.

10 "Su ke etew ne egkeserihan te reisek ne kearen," ke si Hisus, "ne egkeserihan dema te

rekelà ne kearen. Ne iring din ded dema ke etew ne edlimbung te misan deisek dà ne kearen ne wey pè be kenà medlimbung ke rekelà en ne kearen.

¹¹ Su embiya kenà ka egkeserihan ne ebpeheweren te kearen kayi te ampew te dunya ne kenà ke en iya ebpeheweren te Eleteala rut te tidtu ne kearen diyà te langit.

¹² Ne embiya kenà ka egkeserihan ne ebpeheweren te kearen ne kenà keykew, ne kenà ka ebeheyan te Eleteala te tidtu ne kearen nu riyà te langit.

¹³ “Warà edsugsuhuen,” ke si Hisus, “ne deruwa se edtehiuripen kandin. Su embiya deruwa se ebpengunguripen kandin, ne egkeepesan din ke seveka ne ed-edatan din ke seveka. Etawa ebperumdumaan din ke seveka, ne kenà din edsehipaen ke seveka. Ne iring din ded dema,” ke si Hisus, “embiya iyan dekelà te hinawa nu ne kureta, ne kenà ka ebpeketuman te kiyug te Eleteala.”

*Menge Ruma Pà ne Penurù ni Hisus
(Mateo 11:12-13; Marcos 10:11-12)*

¹⁴ Duen ketà menge Peresiyu ne iyan den dà dekelà te hinawa ne kureta ran. Nerineg dan dà ini se migkahi ni Hisus ne mid-undaunda ran dà.

¹⁵ Ne migkahi si Hisus kandan te, “Sikiyu ne engkungkun ne menge metidtu kew kayi te sineruwan te menge etew, ugaid ne netueanan te Eleteala ke netahù te hinawa niyu. Su ini se rekelà te hinawa te menge etew ne warà pantag din diyà te etuvangan te Eleteala.

16 “Ke penduan ni Moises,” ke si Hisus, “wey ke menge impesurat te Eleteala rut te menge etew ne mibpelambas te Lalag din, ini se impesabut dan taman dà te nekeuma en si Juan ke Ebpembunyag. Igenat dè be ketà te nekeuma si Juan ne impesabut en ke Meupiya ne Tudtul mekeatag te Kedatù te Eleteala te menge etew, ne edtehel ke menge etew te kedlusud dan ketà.

17 Ugaid ne ke penduan ni Moises ne kenà egkeawà, su iyan pà melemu ne egkeawà ini se langit wey tanà tumin dè be ke meawà te senge tahà dà dut te penduan ni Moises.

18 “Arà se meama ne ebpekid-engked te esawa rin ne edsaup maa ed-esawa,” ke si Hisus, “ne nekepengingniyug en sikandin diyà te etuvangan te Eleteala. Ne engketà ded maa ke meama ne mid-esawa kayi te meritan ne mibpekid-engked dut te esawa rin, ne nekepengingniyug en dema sikandin diyà te etuvangan te Eleteala.”

Ke Kewasa ne Meama wey si Lazaro

19 Ne migkahi pà maa si Hisus te, “Duen senge etew ne kewasa nevenar ne mibevelegkas te mepurù nevenar se elehà din, ne ini se kedubpàubpà din ne warà egkepemengà din.

20 Ne ruen dema senge etew ne ayuayu ne midingaranan ki Lazaro ne nelumbus se lawa rin te padel. Ne uman gewii ne id-ated sikandin te menge ruma rin diyà te pesuran te eheran ketà te kewasa ne meama.

21 Su ebpekeinam ke ruen samà dut te kewasa ne meama. Ne gewii rin te ed-id-irehà ketà ne ruen menge asu ne edilà te padel din.

²² “Ne neuma se hewii ne minatey si Lazaro, ne mibpeneheewit sikandin dut te menge suluhuen te Eleteala diyà te uvey ni Abraham diyà te langit. Ne minatey en dema ini se meama ne kewasa ne inleveng dan en sikandin.

²³ Ne nekependiyà sikandin te apuy ne rakà ne nerasey nevenar sikandin! Ne midlingakà sikandin ne nekita rin diyà te medmeriyà si Abraham. Ne nekita rin dema ketà si Lazaro diyà te uvey rin.

²⁴ Ne midtawag din en si Abraham se egkahi te, ‘Apù Abraham, ikeyru a nevenar nikuna! Ipepengkayi nu pà si Lazaro su apey rin egkepeti-hisi ini se bèbà ku te wayig su egkerasey ad nevenar kayi te apuy.’

²⁵ “Ugaid ne migkahi si Abraham te, ‘Menge anak, tentenuri nu te nekuwa nu en ke langun ne keupiyanan nu te gewii rut te biviyag ke pà, ugaid ne si Lazaro mulà ne neamin-amin din se keresayan. Ugaid ne guntaani ne si Lazaro ne meupiya en se egketemanan din kayi, ne sikuna en se egkerasay.

²⁶ Ne kenà ketà dà taman su ruen egkembusan te tanà kenian te elet tew, ne misan duen kayi ne egkiyug ne ed-apet kenian te keniyu ne kenà ebpekeapet. Engketà ded maa ke kenian te keniyu, kenà dan ebpekeapet kayi.’

²⁷ “Ne ketà ne migkahi pà maa ke kewasa te, ‘Embiya iring ketà, Apù Abraham, ne ebuyuen ku keykew te ipependiyà nu pà si Lazaro riyà te baley ni Amà,

²⁸ su ruen lelima ne ari ku ne elin meama. Ibpevaag nu sikandan apey kenà dan

ebpekepengkayi te ini se ubpaan ne keresayan.'

²⁹ "Migkahi si Abraham te, 'Duen diyà te kandan impesurat ki Moises te Eleteala wey ke impesurat te Eleteala rut te menge etew ne mibpelambas te lalag din, ne arà dè be se upiani ran pemihena.'

³⁰ "Ne migkahi en maa ke kewasa te, 'Kenà dan ebpemineg ketà, Apù Abraham, ugaid ne embiya ruen minatey ne egkevanew ne ed-ulì diyà te kandan ne arà pà ne ebpemedsendit dan.'

³¹ "Ne migkahi si Abraham te, 'Embiya kenà dan ebpemineg dut te impesurat te Eleteala ki Moises wey ke impesurat dut te menge etew ne mibpelambas te Lalag te Eleteala, ne iyan dan pè be pemineha ke ruen egkevanew ne ed-ulì diyà te kandan.' "

17

Ke Penurù ni Hisus Mekeatag te Kebpesahad te Salà te Menge Ruma ta

(Mateo 18:6-7, 21-22; Marcos 9:42)

¹ Ne ruen migkahi ni Hisus diyà te edumdu-maan din te, "Kenà egkepakey ne kenà egkeuma ini se kebpenggerami te menge etew, ugaid ne ke etew ne ebpenggeram te ruma rin su apey ebpekedsalà ne mekeyruwiru nevenar!

² Iyan pà tumù ne ebperiwetuwàn ke lieg din te mevehat ne batu ne id-antug diyà te rahat su apey kenà sikandin se puunaan te kebppekedsalà dut te mevavà ne etew ne edsarig kediey.

³ Tembù be uram kew!

"Embiya ruen дума nu ne nekedsalà kenikew," ke si Hisus, "ne kehiya nu kandin ne

ibpetidtu nu sikandin, ne embiya ebpekedsendit ne ed-engkeran din ke salà din ne pesehara nu.

⁴ Embiya ebpekedsalà sikandin kenikew te kepipitu te lusud te senge keandew ne kepipitu rema sikandin ebuyù kenikew te, 'Nekedsendit a te mid-ulaula ku, menu ke pesehara a nu,' ne pesahara nu rema sikandin."

Ke Penurù ni Hisus Mekeatag te Kebperetiyaya

⁵ Ne migkahi ke minge edumdumaan diyà te ki Hisus ke Kerenan te, "Umani nu ke kebperetiyaya rey."

⁶ Ne migkahi si Hisus te, "Embiya ruen kebperetiyaya niyu te Eleteala ne reisek misan iring dut te reisek ne lahas ne mustasa ne ebpekekahi ka kayi te ini se rekela ne kayu te, 'Awà ka kayi ne arat ka riyà te rahat,' ne arà dà ne ebpekeperumaruma keykew."

Ke Penurù ni Hisus Mekeatag te Ketengdanan tew ne Menge Edsugsuhuen Din

⁷ Migkahi maa si Hisus te, "Upama ke ruen senge etew keniyu ne ruen edsugsuhuen din te edadu etawa edtuganur te minge bilibili nu ne mid-ulì sikandin te meapun ne engkey, ebpekekahi ka te, 'Una ke en kaan su wey ad?'

⁸ Kenè en iya! Su iyan nu mulà egkekahi se, 'Sambì ka te belegkas nu ne elugan ke en su apey a mekekaan en. Ne wey ka kaan ke ebpekeipus ad.'

⁹ Ne menu, edeyuen nu ke edsugsuhuen nu su midtuman dut te insuhù nu? Kenà en iya!

¹⁰ Ne engketà kew red dema," ke si Hisus, "embiyà netuman niyu en ke langun ne ibpehelevelk

te Eleteala keniyu ne kahi kew rà te, ‘Menge edsugsuhuen kiyu rà te Eleteala, ne kenà edait ne edeyuen kiyu su midtuman tew rà ke insuhù din kenitew.’ ”

Neulian ni Hisus ke Sepulù ne menge Etew ne Kevuwaen ne muna pà te It-it

¹¹ Guna su ebpependiyan en si Hisus te Hirusalim ne riyà mebayà sikandin te eletan te pruvinsiya ne Semeriya wey Geliliya.

¹² Ketà te ebpelpelinggume en sikandin te senge inged ne ruen sepulù ne meama ne midtelavuk kandin ne ruen kevuwa ran muna te it-it. Ugaid ne geina te ruen kevuwa ran ne riyà dan mid-itindeg te malù dà meriyù ki Hisus

¹³ ne midtawag dan en se egkahi te, “Hisus, Meyterù, ikeyru key nikuna!”

¹⁴ Nekita rin sikandan ne migkahi en te, “Pendiya kew te menge terebpelengesa te Eleteala ne peintengi niyu ke lawa niyu te nengeulian en.” Ne mid-ipanew ran ne gewii te riyà dan en te ralan ne nengeulian dan en.

¹⁵ Ne senge etew kandan se nekekita te neulian sikandin ne midlived kayi te ki Hisus se egkulku-leyi en se edeyù te Eleteala.

¹⁶ Ne mid-uvey sikandin ki Hisus ne mid-lumpeng en sikandin kayi te sineruwan ni Hisus se ebpeselamat kandin. Ne ini se etew ne kenà Hudiyanen su riyà ebpuun te inged ne Semeriya.

¹⁷ Ne migkahi si Hisus te, “Maa kenà sepulù niyu beneng ke nengeulian? Endei en be ke siyew ne etew?”

18 Meambe ke sikuna rà ini se tegeSemeriya se midlived su ebpeselemat te Eleteala?”

19 Ne migkahi en si Hisus te, “Itindeg ke en, Mama, ne levundus ke en su ke sarig nu te Eleteala se nekeulì keykew.”

Ke Penurù ni Hisus Mekeatag te Kedatù te Eleteala te Menge Etew

(Mateo 24:23-28, 37-41)

20 Senge hewii maa ne ruen munge Peresiyu ne mid-insà ki Hisus te, “Keenu egkeuma arà se Kedatù te Eleteala te munge etew?”

Midtavak si Hisus kandan te, “Kenà niyu egkekita se kebpekeuma rut te Kedatù te Eleteala te menusiya.

21 Warà ebpekekahi te, ‘Ini en ke Kedatù din,’ etawa ebpekekahi te, ‘Ediyan en.’ Su ini se Kedatù te Eleteala te munge etew ne kenà egkekita su kayi red te hinawa niyu.”

22 Ne migkahi en si Hisus kayi te edumdumaan din te, “Duen gewii ne egkeuma ne rekelà se kiyug niyu te metuman ke hewii te edlived ke Impeanak te Menusiya, ugaid ne kenà pà egked-ulaula.

23 Duen egkahi keniyu te, ‘Ediyan en ke Ebperetuen te Eleteala te munge etew,’ etawa egkahi ran te, ‘Ini en.’ Ugaid ne kenà kew eduma kandan.

24 Su ketà te kedlived te Impeanak te Menusiya kayi te ampew te dunya ne iring kehaan din te kilat ne ebpeketaew te langun ne linengkevan igenat te pehiliran taman te binunsuran.

25 Ugaid te kenà pà ini egked-ulaula ne iyan iya se egkerasey pà sikandin wey ed-engkenà kandin ini se minge etew guntaani.

26 “Ketà te akir din ne hewii ke edlived sikandin kayi te ampew te dunya, ne ebpekeiring ke ed-ul-ulaan te minge etew rut te ed-ul-ulaan te minge etew rengan te gewii pà ni Noa.

27 Su rengan te hewii pà ni Noa, ne warà sanggel dan se ebpegevrurun su egkaakaan dan ne ebpeginum wey ebpees-eseweey taman te arà en ke hewii ne midlusud en ensi Noa ketà te rekela ne avang ne ed-ingaranan te arka. Ne arà ne nekeuma en ke dalem ne neherà dan en langun.

28 “Ebpekeiring ded dema rut te hewii ni Lut. Su warà sanggel dan se ebpegevrurun su egkaakaan dan ne ebpeginum, ebpepemasa wey ebpepemendahang, ebpepemula wey ebpe-mevaley.

29 Ugaid ne arà se hewii ne kinepeawà ki Lut ketà te inged din ne ed-ingaranan te Suduma ne imperadsang te Eleteala ini se regreg wey esupri ne riyà ebpuun te langit ne neherà dan langun.

30 “Iring ded be ketà se kehaan din ke edlived kayi ke Impeanak te Menusiyà su kenà ebpepenerengen te minge etew.

31 “Ketà ke egkeuma arà ne hewii,” ke si Hisus, “ne embiya ruen etew riyà te ruwangen te baley rin ne kenà din en lilingaya ke keleglehan din. Ne engketà ded dema ke riyà sikandin te pengengewiran, kenè en med-ulì diyà te valey su egkuwa te piya engkey en.

³² Tentenuri niyu ke engkey se netemanan dut te esawa ni Lut te midlilingey sikandin.

³³ Su ke etew ne egkenuhun te umur din ne ebpatay lavew, ugaid ke etew ne iyan din ibpatay se keduma rin kediey te kebpemesabut dut te Meupiya ne Tudtul ne ruen umur ne ibehay kandin ne warà edtemanana din.

³⁴ Ne ini se tendai nu nevenar, embiya merukilem se kedlived din kayi ne ruen ebpeulirey ne deruwa ne etew, ne ebpekeruma ke senge etew kandin ne egketahak ke seveka.

³⁵ Engketà ded dema ke meandew se kedlived din kayi, embiya duen deruwa ne meritan ne ebpeemungey te egaling, ne ebpekeruma ke senge etew kandin ne egketahak ke seveka. [

³⁶ Engketà ded dema ke ruen deruwa ne etew ne ebpeemungey riyà te pengengewiran, ebpekeruma ke senge etew kandin ne egketahak ke seveka.]”

³⁷ Ne ketà ne mid-insà ke munge edumdumaan ni Hisus kandin te, “Endei ve ini egketuman?” Ne midtavak din te tatap ne beseanan, ke sikandin te, “Piya endei se ruen minatey rin ne ketà eburun ke munge uwak.”

18

Ke Sempità ni Hisus Mekeatag te Balu ne Meritan wey Ke Egawed te Kukuman

¹ Duen maa insemptà ni Hisus dut te edumdumaan din su apey ran egketenuri se layun dan ebpengeningeni ne kenà dan egkevungas.

² Ke sikandin te, “Duen senge etew ne egawed te kukuman diyà te senge inged ne warà andek din te Eleteala etawa warà adat din te menge etew.

³ Ne ketà te inged ne ruen dema senge etew ne meritan ne valu ne layun ebpengkayi te kandin su ebuyù te tavang din. ‘Tevangi a nu,’ ke se meritan, ‘su apey kenà meahew te kunterà ku ini se kearen.’

⁴ “Ne neuhet nevenar ne warà sehipaa kayi te egawed te kukuman ini se meritan, ugaïd ne neperaan te kedlivedlived te meritan ne kehingginawa rin te, ‘Misan warà andek ku te Eleteala etawa warà adat ku te menge etew,

⁵ ne geina te edlingasa ini se meritan kediey ne idtindeg ku sikandin kayi te kunterà din su apey ed-engked en su embiya kenà ne egkepupusan ad te tigker.’ ”

⁶ Ne migkahi en maa si Hisus te, “Pegpegitunga niyu arà se midlalag dut te egawed te kukuman ne kenà metidtu ne midtindeg dut te meritan.

⁷ Ne menu kenà be edtindeg ke Eleteala dut te kandin ne menge etew embiya ebpengeningeni ran diyà te kandin te merukilem meandew? Maa edlanganlangan pè bè sikandin se edtavang kandan?

⁸ Igkahi ku keniyu,” ke si Hisus, “mehaan se kedtindeg din keniyu. Kenà egkevungas ke Eleteala ne edtavang dut te etew rin, ugaïd ne ketà te edlived kayi ke Impeanak te Menusiyà ne menu duen pè be egkeumaan din ne edsarig kandin?”

Ke Sempità ni Hisus Mekeatag te Senge Etew ne Peresiyu wey ke Ebpevayad te Buwis

⁹ Ne ruen impenempità ni Hisus ne ebpekesuhat dut te menge etew ne iyan dan kunaan ke menge metidtu ran ne edsudì dan ke langun ne menge ruma ne etew.

¹⁰ Ke si Hisus te, “Duen deruwa ne etew ne mibpendiyà te Nekebpuru ne Valey te Eleteala su ebpengeningeni. Senge etew ne Peresiyu ne ini se seveka ne ebpevayad te buwis.

¹¹ Guna su ketà dan en te lusud ne mid-itindeg ini se Peresiyu ne mibpengeningeni te hinawa rin, ke sikandin te, ‘Is Eleteala, ebpenelamat a kenikew ne Eleteala su kenà a iring keniyàn te ruma ne menge etew ne tenlimbungen, menge etew ne meraatey se ulaula ran, wey menge etew ne ebpengingniyug. Uya, ebpenelamat a te kenà a iring keniyàn te etew ne ebpevayad te buwis.

¹² Uman senge pedian ne ke reruwa a edlimpas se egkaan ne ebehey a kenikew te ikesepulù ne umun dut te langun ne egkevatunbatun ku.’

¹³ “Ugaid ne ini se etew ne ebpevayad te buwis ne mibpekeriyù sikandin ne midurungul ne mibpenempak din se kumeng din te kegkebmutu rin ne mibpengeningeni se egkahi te, ‘Is Eleteala, ikeyru a nevenar nikuna su mekesesalà a.’

¹⁴ “Igakahi ku keniyu,” ke si Hisus, “ketà te kineulì kayi te ebpevayad te buwis ne kenè en ebpenunduhèn te Eleteala ke salà din, ugaid ne kenà iring ketà te mepereyù ne Peresiyu. Su piya entei ne etew ne ebpepurùpurù te hinawa rin ne ibpevavà te eleteala, ugaid ne piya entei ne

etew ne mepeembavà te hinawa rin ne ibpepurù sikandin te Eleteala.”

*Mibpenubtuvaran ni Hisus ke Menge Vatà
(Mateo 19:13-15; Marcos 10:13-16)*

¹⁵ Na ruen minge etew ne mibpemava te anak dan diyà te ki Hisus su ibperampen dan kandin su ebpepenubtuvaran, ugaid ne midawey ran dut te minge edumdumaan din.

¹⁶ Guna su nekita ini ni Hisus ne midtawag din ke minge vatà ne migkehiyan din ke minge edumdumaan din te, “Kenà niyu dewaya sikandin! Ugaid ne ibpepengkayi niyu te kediey ke minge vatà su ke minge etew ne iring te minge vatà se kedsarig dan kediey ne iyan ebpekeamung te Edetuan te Eleteala.

¹⁷ Sebenarvenar ini se egkehiyen ku, ke etew ne kenà edtelimà te Kedetui kandin te Eleteala iring te kedtelimà kayi te reisek ne vatà ne kenà ebpekelusud sikandin dut te minge etew ne Edetuan te Eleteala.”

*Ke Kewasa ne Meama ne Egkiyug ne
Ebpekeangkun te Umur ne Warà Edtemanan
Din*

(Mateo 19:16-30; Marcos 10:17-31)

¹⁸ Duen hewii ne ruen mibpengkayi te ki Hisus ne senge etew ne egkeunutan te minge Hudiyannen ne mid-insà te, “Meyterù, langun ne ed-ul-ulaan nu ne meupiya! Engkey se ed-ul-ulaan ku su apey a mekekuwa te umur ne warà edtemanan din?”

¹⁹ Ne midtavak si Hisus te, “Meambe ke nekahi nu te meupiya ke langun ne ed-ul-ulaan ku?

Su seveka rà sa meupiya se ed-ul-ulaan din ne Eleteala rà.

²⁰ Ugaid ne embiya arà se id-insà nu mekeatag te umur ne warà edtemanan, ne netuenan nu en ke penduan te Eleteala ne egkahi te: 'Kenà ka ebpeingniyug, kenà ka ed-imatey, kenà ka ebpenakew, kenà ka edtarùtarù, ne edati nu ke amey nu wey ke iney nu.' "

²¹ Ne migkahi ke meama te, "Meyterù, igenat te batà e pà ne langun keniyen ne midumaan ku."

²² Nerineg dà ni Hisus ini ne migkahi en sikandin te, "Duen pà lavew kurang nu. Iyan be se uli ka ne pesaa nu ke langun ne kearen nu ne ipemehey nu ve ke elehà din diyà te menge ayuayu su apey ruen kekewesai nu riyà te langit ne muna pà dut te kearen nu kayi. Ne arà pà ne pengkayi ka te eduma kedì."

²³ Nerineg din dà ke lalag ni Hisus ne neuuru nevenar sikandin su kewasa nevenar.

²⁴ Nekita ni Hisus te neuuru ke meama ne migkahi sikandin te, "Merehen nevenar te kewasa ne etew se kebpesakup din dut te menge etew ne Edetuan te Eleteala.

²⁵ Iyan pà melemu ne ebpevayà diyà te vudsi te rahum ini se rekelà ne binatang ne kemilu tumin dè be ke kebpesakup te etew ne kewasa dut te menge etew ne Edetuan te Eleteala."

²⁶ Ke menge etew ne nekerineg kayi ne mid-insà te, "Embiya iring ketà se kerehen din te etew ne kewasa te kebpesakup din dut te menge etew ne Edetuan te Eleteala, ne engkey rè be buwa se ebpekeangkun te umur ne warà edtemanan din?"

²⁷ Ne migkahi si Hisus te, “Embiya etew rà ne kenà dan ebpekegaga te ed-angkun te umur ne warà edtemanan din ugaid ne Eleteala se ebpekegaga ne ebehey kandan su egkegaga te Eleteala ke langun.”

²⁸ Ne migkahi si Pedro te, “Netuenan nu te mid-ewaan dey ke langun taman dey su miduma key keykew.”

²⁹ Ne migkahi si Hisus kandan te, “Sebenarvenar ini se egkehiyen ku keniyu te misan entei ne etew se neawaan din ke ubpaan din, esawa rin, menge suled din, menge lukes din, wey menge anak din su atag te kebpesakup din dut te menge etew ne Edetuan te Eleteala,

³⁰ ne ebpetelimaan sikandin te Eleteala misan kayi pà sikandin te ampew te dunya te labi pà kerakel din dut te neewaan din, ne ketà te akir din ne hewii ne ebpekettelimà sikandin te umur ne warà edtemanan din.”

Impesabut ni Hisus te Iketelu en ke Kebpatey Rin

(Mateo 20:17-19; Marcos 10:32-34)

³¹ Ne ketà ne impesivey ni Hisus ke sepulù wey deruwa ne edumdumaan din ne migkahi te, “Netuenan niyu en ne ebpendiyà kiyu te Hirusalim ne ketà ne egketuman en langun ne impesurat te Eleteala dut te menge mibpelambas te Lalag din dengan mekeatag te sikandin ne Impeanak te Menusiyà.

³² Ne ibpalad sikandin diyà te menge etew ne kenà Hudiyanen ne ed-un-undaen sikandin, ebpegkeyaen sikandin, wey ebpengilevan sikandin.

33 Ebpenlembiten dan sikandin wey edimetayan. Ugaid ne ketà te iketelu ne hewii ne ebenawen ded te Eleteala.”

34 Ugaid ne ini se edumdumaan din ne warà dan mekesabut te misan deisek dà kayi te migkahi ni Hisus. Su in-eles kandan ke meana rin, ne warà dan metueni ke engkey se edlelehen din.

35 Guna su ebpelundani en ensi Hisus diyà te inged ne ed-ingaranan te Hiriku, ne ketà te kilid te ebpevayaan dan ne ruen meama ne pisek ne ebpinpinuu su ebpemuyù.

36 Guna su nerineg din te merakel ne etew se edsahad ne mid-insà sikandin te, “Engkey ini?”

37 Ne ruen midtarem kandin te, “Si Hisus ne riyà ebpuun te Neserit se edsahad.”

38 Guna su nerineg din ini ne midtawag en te, “Hisus, ke inenakan ni David dengan, igkeyru a nu nevenar!”

39 Ne neepes ke menge etew ne riyà te unaan ni Hisus ne midawey kandin ne migkahi te ebpeen-enengen sikandin, ugaid ne lemban en ne egkeilut se ebpemensag te, “Sikuna ne inenakan ni David dengan, igkeyru a nu nevenar!”

40 Guna su nerineg ni Hisus ne mid-itindeg pà sikandin ne midsuhù te ibpepikit ke pisek kayi te kandin. Nekeuvey ki Hisus ke meama ne pisek ne mid-insaan din te,

41 “Engkey ma se ebpetevangan nu kediey?”

Ne migkahi ke pisek te, “Meyterù, kiyug ku ne mekekita a red perem!”

⁴² Ne migkahi si Hisus te, “Su kenà duwaruwa ke kedsarig nu kediey, ne ebpekeulit en ke kebpekekita nu.”

⁴³ Arà dà iya ne nekekita en ini se meama, ne miduma en ki Hisus se edeyù te Eleteala. Ne ke menge etew ne nekekita kayi ne mideyù dan dema ke Eleteala.

19

Si Hisus wey ke Senge Etew ne Ebpevayad te Buwis ne Ed-ingaranan ki Sekiyu

¹ Nekeuma en ensi Hisus diyà te inged ne Hiriku ne ketà dan mibpevayà te luuk te inged te kedlaus dan en.

² Ne ruen ketà senge etew ne ed-ingaranan ki Sekiyu. Senge etew ini ne meama ne mepurù dut te menge etew ne ebpevayad te buwis ne kewasa nevenar.

³ Egkesuatan din te edtengteng si Hisus, ugaid ne kenà din egkekita su nelingutan si Hisus te merakel ne etew ne mevavà ne etew si Sekiyu.

⁴ Ketà be ne mibpelelahuy sikandin diyà te unaan te merakel ne etew ne mid-ambak diyà te kayu ne ed-ingaranan te sikumuru ne egkeseharan ni Hisus su apey rin mekita si Hisus.

⁵ Guna su nekeuma en si Hisus ketà te levut te kayu ne mid-embakan ni Sekiyu ne midlingakà ne migkahi te, “E Sekiyu, dahew ke en se edurus keniyen su ebpekeawet a diyà te baley nu guntaani.”

⁶ Arà dà ne midahurahu midurus si Sekiyu ne migalàhalà din si Hisus.

⁷ Nerineg kayi te merakel ne etew ini se migkahi ni Hisus ki Sekiyu ne mibpemeviyig dan se egkahi te, “Meambe ke miduma si Hisus diyà te valey te etew ne mekesesalà?”

⁸ Nekeuma ran diyà te valey ni Sekiyu ne mid-itindeg sikandin ne migkahi diyà te ki Hisus te, “Na, ibehey ku ini se tengà te kekewesai ku diyà te menge etew ne ayuayu. Ne embiya ruen etew ne nelimbungan ku ne ed-ulian ku te keepat egketakep ke nekuwa ku kandin.”

⁹ Ne migkahi si Hisus kandin te, “Sikiyu ne telteleanak kayi ne nekeliyu kew en te kedusa te Eleteala te salà niyu. Ne sikiyu ini ne tuney kew en ne keep-epuan ni Abraham su mibperetiyaya kew en.

¹⁰ Su iyan din impengkayi ke Impeanak te Menusiyà te ampew te dunya su ebpemengà te langun ne menge etew ne nekesuwey ketà te tidtu ne ibayà te Eleteala su apey ran ebpekeliyu rut te keberedusaan dan te Eleteala.”

Ke Menge Edsugsuhuen ne Midserihan te Kureta su Ebpeisehen ne Insempità ni Hisus dut te Menge Etew ne Egkiyug ne Eduma te Bayàbayà te Eleteala

(Mateo 25:14-30)

¹¹ Ne mibpenempità si Hisus dut te menge etew ne ebpemineg kandin. Su merani ran en diyà te inged ne Hirusalim ne iyan kunaan dut te menge etew ke embiya ebpekeuma ran diyà ne edrudsuen Edatù ke Eleteala te menge etew.

¹² Tembù be midsempità si Hisus kandan se egkahi te, “Duen senge etew ne berebansa ne mibpendiyà te meriyù ne inged su edsempayatan

te gelal te kegkeratù, ne ketà be te ked-ulì din ne edatù en kayì te inged din.

¹³ Ne ketà te warà pà mekehenat ne midtawag din te sepulù ne etew ne edsugsuhuen din ne uman senge etew kandan ne mibehayan din te kureta ne neked-iring ke kerakel din. Ne migkehiyan din sikandan te, 'Ini se kureta ne idsarig ku keniyu ne sikiyu en se ebpeiseg taman te kenà e pà ebpekeulì.'

¹⁴ "Ugaid ne ini se mehinged te inged din ne neepes kandin, ne guna su mid-ipanew sikandin ne ruen midsuhù dan te ebpesabut ketà te etew ne edsempayat te gelal kandin se egkahi te, 'Kenà key egkiyug ne sikandin se edatù kenami.'

¹⁵ "Ugaid ne misan iring ketà ne sikandin ded se midsempayatan te kegkeratù ne mid-ulì en. Nekeuma rà ne midtawag din en ke sepulù ne edsugsuhuen din ne midserihan din te kureta su ed-intengan din ke pira se kinepeiseg dan dut te kureta rin.

¹⁶ "Nekeuma ke neuna ne edsugsuhuen ne migkahi te, 'Datù, sepulù se neisahan din ke kureta ne insarig nu kedì.'

¹⁷ "Migkahi ini se meama ne behu pà ne edatù te, 'Arà be! Meupiya ka su mibpegelep ke ves iya rema! Geina te egkeserihan ka te deisek ne kureta ne iyan ku idsarig kenikew ne ebpekemalen ku sikuna te sepulù ne inged.'

¹⁸ "Nekeuma ke ikeruwa ne edsugsuhuen din ne migkahi te, 'Lelima, Datù, se neisehan din dut te kureta ne insarig nu kedì.'

¹⁹ "Ne migkahi ke datù te, 'Arà be! Ne lelima ne inged se ebpekemalan ku keykew.'

20 “Nekeuma ke iketelu ne edsugsuhuen ne migkahi te, ‘Ini red ke kureta ne insarig nu kedì. Midtegtehaman ku te edtenges ne intahù ku,

21 su neandek a su netuenan ku te mepasang ka ne etew. Ebpnareng ka te kebpekeiseg ke ruen idsarig nu te edsugsuhuen nu; ne engketà ded dema ke ruen ibpepemula nu kandan su ebpnerengen nu.’

22 “Ke se datù te, ‘Mereatey ke ves ne edsugsuhuen! Ayan dà se nengelalag nu ne neisuhat ku en sikew te kewagib. Netuenan nu ves te taman te nekahi ku ne idtehel ku, ne ebpnareng a te iseg ke ruen idsarig ku te ruma ku, ne engketà ded ke ruen ibpepemula ku te ruma ku, ebpnerengen ku red.

23 Meambe ke warà nu ipemeutang arà se kureta ku ne insarig ku keykew su apey ku metelimà ke kureta ku te ruen iseg din ke edlived a?’

24 “Ne migkahi en ke datù ketà te munge etew ne ebpngit-itindeg te, ‘Kua niyu arà se kureta kenihan te kandin ne ivehey niyu ketà te edsugsuhuen ne mibpeiseg te sepulù.’

25 “Ne migkahi ran te, ‘Ne ruen en ma kandin su sepulù ke iseg dut te kureta rin.’

26 “Ne migkahi ke datù te, ‘Igakahi ku keniyu te ke etew ne egkeserihan dut te insarig kandin ne ed-umanan pà. Ugaid ke etew ne kenà egkeserihan ne ed-ewien pà misan ke reisek ne insarig kandin.

27 Na ini se munge etew ne egkunterà kedì su kenà dan egkiyug ne edatù a kandan, ne

ipepengkayi niyu ne imetayi niyu kayi te etuvan-
gan ku.' ”

*Ke Kinelusud ni Hisus Diyà te Hirusalim ne
Mid-untud te Nati ne Kudà su Tuus ini te Datù
Sikandin Dut te Menge Hudiyanen*

(Mateo 21:1-11; Marcos 11:1-11; Juan 12:12-19)

²⁸ Nekeipus si Hisus se edlalag kayi ne mid-
ipanew ran en se ebpendiyà te Hirusalim.

²⁹ Nekeuvey ran diyà te deruwa ne inged ne
Bitpahi wey inged ne Bitanya diyà te buvungan
ne ed-ingaranan te Ulivuwen. Ne mibpeuna
sikandin te deruwa rut te edumdumaan din se
egkahi te,

³⁰ “Una kew en ketà te inged ne an te unaan
ta, ne ketà te ebpekeuma kew ne egkekita niyu
ke nati ne kudà ne in-iket ketà ne warà pà bulug
meunturì. Ekari niyu be ne ewita niyu en kayi.

³¹ Ne embiya ruen ed-insà keniyu te, ‘Meambe
ke ed-ekaran niyu ke nati ne kudà?’ ne iyan niyu
kehiya te, ‘Ke Kerenan dey se ebpegingawà te
egkeunturan din ne mehaan dà id-uli.’ ”

³² Nekeuma ini se midsuhù din ne nekita ran
ke nati te kudà ne iring iya rema ketà te migkahi
ni Hisus.

³³ Gewii ran te ed-ekar dut te nati ne migkahi
ke menge kemuney te, “Meambe ke ed-ekaran
niyu ayan se nati?”

³⁴ Ke sikandan te, “Si Hisus ke edlingekaan
dey se ebpeginawà kayi te egkeunturan din ne
mehaan dà id-uli.”

³⁵ Ne arà dà ne mid-ewit dan en ini se nati
ne kudà kayi te ki Hisus, ne midebpasan dan en

te kumbalà dan ke nati ne kudà ne arà pà ne pineerà dan si Hisus.

³⁶ Gewii rin te egkukudà ne midtulid ke menge etew te kumbalà dan te ebpepevayaan ki Hisus su tuus ini te adat te menge Hudiyanen te mepurù dan.

³⁷ Guna su nekeuvey en sikandin te Hirusalim ketà dapit te dalan ne idtupang ketà te buvungan ne Ulivuwen ne langun dut te menge etew ne midurumaruma kandin ne migkerag se egale-whalew te kedeyù dan te Eleteala su atag te langun ne nekita ran ne mekegeyip ne mid-ulaula ni Hisus.

³⁸ Ke sikandan te,
 “Menu ma ke ebpeuven te Eleteala ini se datù ne nekeuma su impepengkayi te Eleteala.

Ne melinew en ke kebpekiduma tew te Eleteala, ne edeyuen tew ke Eleteala diyà te langit!”

³⁹ Ketà te menge etew ne miduma ki Hisus ne ruen menge Peresiyu ne migkahi riyà te ki Hisus te, “Peengkera nu ayan se edumdumaan nu se edeyù keykew su ebpekesahad en utew!”

⁴⁰ “Igakahi ku keniyu,” ke si Hisus te, “em-biya ebpeeneng-eneng dan ne langun kenihan te menge batu ne iyan dan egkerag.”

Midsandeng ni Hisus ke Inged ne Hirusalim ne Ingkeyru Rin su Midsinehewan Din Ke Mehinged Ketà Su Netuenan Din Ke Egketemanan Dan Keuremà

⁴¹ Guna su ebpekeuvey en sikandin kayi te Hirusalim ne impelayap din ke mata rin kayi

te inged ne midsinehewan din su ingkeyru rin nevenar ke menge mehinged ketà.

⁴² Ke sikandin te, “Embiya perem netuenan niyu rà ke engkey se benar ne kebmetidtu su apey melinew se inged niyu, ugaid ne guntaani ne kenà niyu egketuenan.

⁴³ Duen gewii ne egkeumaan kew te menge kunterà ne edtengkalen kew nikandan wey edte-likupan kew ne warà en iya egensik.

⁴⁴ Edereetan dan ke menge valey niyu ne ebeluyan dan ne tapung ke inged niyu su warà seveka rà ne batu ne egketahak dut te netehuan din. Ne langun niyu ne egkeherà. Ini se egketemanan niyu su warà kew medsehipà te ini en ke hewii te kinepepengkayi te Eleteala kedì su apey kew ebpekeliyu.”

*Mibpenegseg ni Hisus ke Menge Ebpemenda-
hang Diyà te Nekebpuru ne Valey te Eleteala
(Mateo 21:12-17; Marcos 11:15-19; Juan 2:13-
22)*

⁴⁵ Nekeuma si Hisus diyà te Hirusalim ne midlusud sikandin diyà te Nekebpuru ne Valey te Eleteala ne mibpenegseg din en ke menge etew ne ebpemasa wey ke menge ebpemendahang ketà.

⁴⁶ Ne migkahi sikandin te, “Duen en ura impesurat ne Lalag te Eleteala ne egkahi te, ‘Ini se baley ku ne ed-ingaranan te baley ne ebpengeningeniyen.’ Ugaid ne sikiyu,” ke si Hisus, “ne mibaluy niyu en ini se baley ne ubpaan te menge tenlimbungen.”

⁴⁷ Igenat dè be ketà ne uman andew ne ebpenurù sikandin ketà te Nekebpuru ne Valey te Eleteala. Ugaid ne ini se menge mepurù te terebpelengesa te Eleteala, ke menge meysterù te penduan wey ke menge unuten dut te menge etew ne mibpemengà dan te ralan te kegkeimetayi ran ki Hisus.

⁴⁸ Ugaid ne warà dan mekevaluy su langun ne menge etew ne egkevenbenaran te penurù din.

20

Mid-insaan si Hisus Mekeatag te Kewagib Din dut te Mibpenegseg Din Ke Menge Ebpemendahang Diyà te Nekebpuru ne Valey te Eleteala (Mateo 21:23-27; Marcos 11:27-33)

¹ Senge hewii ne mibpenurù ni Hisus ke menge etew riyà te Nekebpuru ne Valey te Eleteala su ibpesabut din ke Meupiya ne Tudtul. Ne ketà ne mibayaan sikandin dut te menge mepurù te terebpelengesa te Eleteala, ke menge meysterù te penduan wey ke menge unuten te Hudiyanen.

² Ne mid-insaan dan si Hisus te, “Ini se mid-ulaula nu kayi te Nekebpuru ne Valey te Eleteala ne engkey se kewagib nu te ed-ulaula te iring kayi? Ne engkey se mibehey keykew te kewagib?”

³ Ne midtavak si Hisus te, “Duen dema id-insà ku keniyu ne tevaka a nu.

⁴ Entei ke mibehey ki Juan ke Ebpemunyag te kewagib te ebunyag, diyà be te Eleteala etawa kayi rà dè duen te menusiya?”

⁵ Ne mibpein-inseey ran en te ke sikandan te, “Engkey se idtavak tew? Su embiya egkehiyen tew se, ‘Riyà ebpuun te Eleteala,’ ne ed-insà maa sikandin te, ‘Meambe ke warà kew mibperetiyyaya ki Juan?’

⁶ Ugaid ne embiya egkahi ki te, ‘Kayi red ebpuun te menusiya,’ ne ebpenrumbahen ki rut te minge etew te batu su langun dan ne mibperetiyyaya te si Juan ne mibpelambas te Lalag te Eleteala.”

⁷ Ketà be ne iyan dan intavak ki Hisus te, “Kenà dey egketuenan ke endei ebpuun.”

⁸ Ne migkahi si Hisus kandan te, “Embiya iring ketà ne kenà ku rema egkehiyen ke enta se mibehey kedì te kewagib ku te ed-ulaula kayi.”

*Ke Sempità ni Hisus Mekeatag te Etew ne Pinekamal te Pemulaan
(Mateo 21:33-46; Marcos 12:1-12)*

⁹ Ne ruen sempità ne imperineg ni Hisus riyà te minge etew, ke sikandin te, “Duen senge etew ne ruen tanà din ne mibpemulaan din te wahed ne ed-ingaranan te paras. Ne ruen pinekamal din dut te impemula rin, ne arà pà ne mid-ipanew en se ebpendiyà te meriyù ne inged ne ketà pà ed-ubpà te meuhet.

¹⁰ Guna su midsabpet en ke pinemula rin, ne ruen senge etew ne edsugsuhuen din ne mid-suhù din su ibpekuwa ke kandin ne umun. Ugaid ne nekeuma ini se midsuhù din, ne mibedasan dut te pinekamal ne impeulì dan te warà en iya imbehey kandin.

11 Ne misan iring ketà, ne midsuhù en maa se senge etew. Ugaid ne nekeuma ini ne mibedasan dan ded maa, ne pinegkeyà dan ne impeuli dan te warà ded dema imbehey ran.

12 Nekita maa kayi te kemuney ini ne midsuhù pà lavew te iketelu ne edsugsuhuen din. Nekeuma maa ini ne midruug dut te pinekamal taman te nengepelian en, ne arà pà ne impeawà dan.

13 “Ne ketà ne migkahi ke kemuney te pemulaan te, ‘Engkey se ed-ul-ulaan ku? Iyan tumù ne iyan ku en edsuhuen ini se tuney en ne anak ku ne igkelimù ku nevenar. Su kenà egkepakey ne kenà dan ini ed-edatan.’

14 “Ugaid ne guna su nekeuma ini se anak din ne mibpeleglelahey ke menge pinekamal din te, ‘Ini en bes ke anak dut te kemuney kayi te tanà. Kuwa kew en su ed-imetayen tew su apey sikitew en se ebpekegkemuney kayi te tanà.’

15 Arà dà ne migeweran dan ne miguyud dan diyà te luwal dut te pemulaan ne mid-imetayan dan en.

“Na,” ke si Hisus, “geina te iring kayi se mid-ulaula ketà te menge etew ne pinekamal te pemulaan, ne engkey se ibped-ulaula kandan dut te kemuney?

16 Idtarem ku keniyu te ebayaan din arà se menge etew ne ebbingimetayan din, ne ebpeke-malan din te ruma pà ne menge etew.”

Nerineg dut te menge etew ini se migkahi ni Hisus ne ke sikandan te, “Ipekeriyù te Eleteala arà!”

¹⁷ Ne mibpeut-utengan ni Hisus te mata sikan-dan ne migkahi en te, “Na embiya iring ketà se pegitungan niyu ne engkey ve se ibpesabut kayi te impesurat te Eleteala rengan ne egkahi te, ‘Ke pelaus ne mid-eng-engkeran dut te menge etew ne ebpemevaley su kunaan dan ke warà rantek din ne iyan en iya ini nepemili ne segkad te valey.’ ”

¹⁸ Ne migkahi maa si Hisus te, “Ne geina te siaken ini se segkad ne egkerupet ke langun ne egkeulug ketà, ugaid ne egkepipinì ke langun ne egkepilayan din.”

Edlitahen perem si Hisus te Menge Paresiyu kayi te ked-insà dan Mekeatag te Kebayad te Buwis

(Mateo 22:15-22; Marcos 12:13-17)

¹⁹ Edsigkemen perem si Hisus dut te menge meysterù te penduan wey ke menge unuten te terebpelengesa su netuenan dan te sikandan ke nesuhat te sempità din dut te menge etew ne pinekamal te pemulaan. Ugaid ne neandek dan dut te merakel ne menge etew.

²⁰ Igenat dà ketà ne mibpenipat dan sikandin su ebpemengà dan te kegkesigkem dan ki Hisus. Ne ruen menge etew ne mibpenukayan dan ne ibpesirib ki Hisus ne ebpeinsaen ne engkungkun ne tidtu se insà dan. Ne embiya ruen lalag ni Hisus ne ebpekesurang te penduan ne ibpe-sigkem dan ne ibehey ran diyà te bayàbayà te gubinedur su ibpekukum en.

²¹ Migkahi ini se menge etew ne edsirib ki Hisus te, “Meyterù, netuenan dey te langun ne egkehiyen nu wey langun ne penurù nu ne metidtu nevenar. Ne warà ebpelebiyen nu ne etew, ugaid ne ebpenurù ka te benar dut te kiyug te Eleteala ne ed-ul-ulaan tew.

²² Tembù be ruen id-insà dey keykew. Maa ebpekerimpas kiyu ve dut te penduan tew embiya ebayad ki te buwis diyà te ratù tew te inged ne Ruma etawa kenà?”

²³ Ugaid ne netuenan en ni Hisus ke lakew te ked-insà dan su edselingkepen dan dà sikandin ne migkahi en sikandin te,

²⁴ “Peintenga a niyu kun te pelatà.” Ne mid-insà sikandin te, “Entei ki tuluran kayi? Ne enta ki ngaran kayi?”

²⁵ Ne midtavak dan te, “Tularan wey ngaran dut te ratù tew kayi te inged ne Ruma.”

Ne migkehiyen ni Hisus sikandan te, “Embiya iring ketà ne ivehey niyu diyà te datù ayan se bayad te buwis ne kandin, ne ivehey niyu riyà te Eleteala ke endei rema ke kandin.”

²⁶ Ne warè en iya neselingkep dan kandin ketà te lalag din diyà te etuvangan te merakel ne menge etew. Ketà ne mibpeeneng-eneng dan su negeyip dan dut te tavak din.

Mid-insà ke Menge Sedyusiyu Ki Hisus Mekeatag te Kegkevanew te Menge Minatey (Mateo 22:23-33; Marcos 12:18-27)

²⁷ Duen menge etew ne ed-ingaranan te Sedyusiyu ne mibpendiyà te ki Hisus. (Ini se menge Sedyusiyu ke menge etew ne warà mebperetiyaya te egkevanew pà te Eleteala ke

menge minatey.) Iyan dan impengkayi te ki Hisus ne ed-insà dan.

²⁸ “Meyterù,” ke sikandan, “ruen penduan ne insurat ni Moises dengan ne egkahi te, ‘Embiya ruen meama ne ebpathey ne neketahak te esawa rin ugaid ne warà anak dan, ne ebpemeluwen dut te suled din ne meama su apey ruen ded anak dut te minatey ne ebpekesumpat.’

²⁹ Su ruen dengan,” ke sikandan, “pitu ne meama ne telteleari ne mid-esawa en ke kakey, ugaid ne minatey te warà dan med-anak.

³⁰ Ne mibpemalu en dut te nesikupu rin arà se ipag dan, ne minatey red dema te warà dan med-anak.

³¹ Ne iring din ded dema ke iketelu. Ne engketà ded ke nesamà, langun dan te pitu ne etew se nekepemalu ketà te ipag dan, ugaid ne warà dan med-anak.

³² Netaman ne minatey en ini se meritan.

³³ Ne ini ve se id-insà dey keykew,” ke se menge Sedyusiyu, “embiya benar ne egkevanew red te Eleteala ke menge minatey keuremà, ne entei ve rapat kandan se tehiesawa ketà te meritan? Su langun dan te pitu ne telteleari ne nekedtundug se nekeesawa kandin.”

³⁴ Ne migkahi si Hisus kandan te, “Ini se menge etew kayi te ampew te dunya ne ebpees-eseweey.

³⁵ Ugaid ne ke menge etew ne ebirangan te Eleteala ne dait ne ebenawen ne ebpeubpaen diyà te langit, ne kenà en ebpees-eseweey.

³⁶ Iyan dan kenà kebpees-eseweey ne iring dan en te suluhuen te Eleteala ne kenè en ebpathey. Menge anak dan en te Eleteala su nevanew ran

en.

³⁷ Ne mekeatag ketà te egkevanew red te Eleteala ke minge minatey,” ke si Hisus, “mepayag en ini ketà te impesurat ni Moises dengan mekeatag te kinepekidlalag te Eleteala kandin diyà ebpuun te neregreg ne sagbet. Su ketà ne nekahi ni Moises te ini se Eleteala ‘ne iyan ded Eleteala ne ebpengerapen ni Abraham, si Isaac wey si Jacob,’ misan ketà ne hewii ne neuhet dan en ne minatey.

³⁸ Su ini ne ebpesabut te misan minatey ran en ne biviyag dan pà diyà te etuvangan te Eleteala su iyan dà ebpekepengarap te Eleteala ne biviyag, kenà ke minatey.”

³⁹ Ne ruen ketà minge meyerù te penduan ne migkahi ki Hisus te, “Benar ayan se migkahi nu, Meyerù.”

⁴⁰ Ne warà dan en medtikà ne ed-insà pà maa ki Hisus.

Impesabut ni Hisus te Sikandin Ke Impasad te Eleteala ne Ebperetuen te Langun

(Mateo 22:41-46; Marcos 12:35-37)

⁴¹ Ne migkahi si Hisus kandan te, “Meambe ke nekahi ran te ke Mesiyas arà se Impasad te Eleteala ringan ne Ebperetuen te langun ne inenakan sikandin ni David?

⁴² Su riyà te riberù ne ed-ingaranan te Salmo ne si David en iya se edlalag ketà te, ‘Migkahi ke Eleteala ketà te Kerenan ku te:

Kayi ka pinuu te rapat te egkekewanan ku

⁴³ taman te ebpenggiekan ku ke minge kunterà nu.’

44 Na,” ke si Hisus, “embiya ini ke nekahi ni David te arà se Impasad te Eleteala ne Ebperetuen te langun ne Kerenan din, ne mep-mepurù pà sikandin dut te inenakan dà ni David.”

Duen Imbaag ni Hisus Mekeatag te Ed-ul-ulaan Te Menge Meyterù te Penduan

(Mateo 23:1-36; Marcos 12:38-40)

45 Ebpemineg pà ke merakel ne etew ki Hisus ne migkahi en sikandin kayi te edumdumaan din te,

46 “Uram kew su apey kenà kew egkepene-heewit dut te menge meyterù te penduan ne ebpengip-ipaneu se ebevelegkas te lembung ne sida ne melayat su ebpeadat te menge etew diyà te menge pedian. Ne embiya riyà dan en te valey ne ebpedgian te penduan te menge Hudiyanen ne ebpemilì dan te meupiya ne ebpinnuwan diyà te sineruwan, etawa ke edtelavuk dan te kevruran ne riyà dan ebpinnu te insivey ne meupiya ne ebpinnuwan te egkeedatan.

47 Ne ebpeey-eyunan dan ke menge kearen dut te menge valu ne meritan, ne ebpeedleyedley ran te kebpengeningeni ran diyà te Eleteala su uvag kun se rekela se sarig dan te Eleteala. Ugaid ne keuremà ne labi pà ne mekeandek-andek ke ibadas ne kerusaan kandan te Eleteala!”

21

Ke Imbehey Te Valu ne Meritan Diyà te Eleteala (Marcos 12:41-44)

¹ Senge hewii ne riyà si Hisus te Nekebpuru ne Valey te Eleteala, ne nekita rin ke menge etew

ne kewasa ne id-ulug dan ini se ibehey ran te Eleteala ketà te edtegtehuan te kureta.

² Nekita rin dema ini se senge etew ne balu ne meritan ne ayuayu nevenar ne ed-ulug te deruwa ne tumbaha.

³ Nekita rin ini ne migkahi en sikandin kayi te menge ruma rin te, “Benar ini se egkehiyen ku keniyu, ini se valu ne meritan diyà te etuvangan te Eleteala ne iyan pà dekelà se imbehey rin dut te langun ne imbehey te menge kewasa.

⁴ Su ke ruma ne menge etew ne iyan dan imbehey ne sawad dà dut te kekewesai ran, ugaid ne ini se ayuayu ne valu ne imbehey rin en te Eleteala ke namànamà ne kureta rin ne edserihan te hinawa rin.”

Migkahi ni Hisus ke Kegkerundus Dut te Nekebpuru ne Valey te Eleteala

(Mateo 24:1-2; Marcos 13:1-2)

⁵ Duen menge edumdumaan ni Hisus ne mibpengasak mekeatag te kineup-upiani te ebaal dut te menge kebperasan ne batu kayi te Nekebpuru ne Valey te Eleteala. Ne langun kayi ne mepurù nevenar ne imbehey te menge etew riyà te Eleteala. Nerineg ni Hisus ne migkahi sikandin te,

⁶ “Langun kayi te edtengtengan niyu guntaani ne egkereetan. Su ruen gewii ne egkeuma ne ini se edtengtengan niyu guntaani ne egkerundus ne warà misan seveka rà ne batu ne egkesamà kayi te netehuan din su egkevurahey langun.”

Migkahi ni Hisus ke Keresayan wey Kebpeke-sakit ne Ebpekeuma kayi te Menge Etew

(Mateo 24:3-14; Marcos 13:3-13)

⁷ Ne mid-insaan dan si Hisus te, “Meyterù, keenu ve ini egketuman se kegkerundus dut te Nekebpuru ne Valey te Eleteala? Ne engkey se idtuus dey su apey rey egketueni te mehaan en ini egketuman?”

⁸ Ne migkahi si Hisus te, “Uram kew su apey kenà kew meekali dut te menge etew ne metau ne edliyuk. Su merakel se edlepew ne engkungkun ne siaken en ne egkahi ran te, ‘Siaken en ini ke Impasad te Eleteala ne Ebperetuen te langun!’ Ne egkahi ran te, ‘Ini en ke ketepusan ne hewii,’ ugaid ne kenà kew eduma kandan.

⁹ Ne embiya egkerineg niyu se ebpevunbunuey riyà te meriyù merani ne kenà kew meandek. Su ini pà iya ke egkeuna ne egked-ulaula, ugaid ne warà pà meuma ke hewii te kebpuusa kayi te dunya.”

¹⁰ Ne migkahi en si Hisus kandan te, “Ebpe-mekebunuey pà ke idsenge inged, ne engketà ded dema ke idsenge retuan.

¹¹ Ne edlinug te mevaher, ne ruen mep-mepasang ne bitil wey ruen sakit ne ed-eneb kayi te piya endei ne inged. Ne ruen egked-ulaula ne mekeandek nevenar wey ruen dekelà ne tuus ne egkekita niyu riyà te langit ne ebpekeinuinu wey ebpekeandek.

¹² “Ugaid ne kayi te kenà pà ini egketuman, ne edsigkemen kew ne edreseyen kew ran. Ne ibpepemenayik kew riyà te baley ne ebpegedian te menge Hudiyanen te penduan dan su

egkukumen kew ne ebilangguen kew en. Ne ebpeneheewiten kew riyà te menge harì wey riyà te egkeunutan te inged su atag dut te kedsarig niyu kediey.

¹³ Ugaid ne ini en imbe ke ralan te kebpekepesabut niyu kandan dut te Meupiya ne Tudtul mekeatag kediey.

¹⁴ Es-eseke niyu neraan ke hinawa niyu ne kenà kew egkeuru ke engkey se idtavak niyu kandan.

¹⁵ Su siaken dà se ebpekahi keniyu ne ebepayan ku sikiyu te ketampas te itungan su apey ke menge kunterà niyu ne kenà ebpeketavak ne kenà dan egkeliyu ke benar ne egkelalag niyu.

¹⁶ Ne misan ke lukes niyu, ke temperà niyu te bituka, ke menge suled niyu wey ke menge sepakat niyu ne ebpulid keniyu riyà te egawed te kukuman, ne ruen en ebpeimetayan kayi te sikiyu.

¹⁷ Egkunteraan kew dut te langun su atag te edumdumaan ku sikiyu.

¹⁸ Ugaid ne warà egkeawà misan seveka ne bulvul nu ne iyan din meana ne misan edimatayan kew ne kenà kew ran en egkesikep diyà te palad te Eleteala.

¹⁹ Itindehi niyu ve te mevaher ke sarig niyu kediey su kayi kew ve ebpekeangkun te umur ne kenà edtaman.”

Imbaag ni Hisus Ke Kegkereeti Rut Te Inged ne Hirusalim

(Mateo 24:15-21; Marcos 13:14-19)

²⁰ Ne migkahi en maa si Hisus te, “Embiya egkekita niyu en ini se inged ne Hirusalim

ne edtelikupan en te kunterà niyu ne sundaru ne kenà kew en duwaruwa te mehaan en se kegkereeti rin.

²¹ Na ke menge etew kayi te pruvinsiya te Hudiya ne mebpelahuy en diyà te buvungan. Ne ke menge etew kayi te Hirusalim ne mebpelahuy dema. Ne ke menge etew ne kayi te nekeerivey ne inged ne kenà dan en iya mebpengkayai te Hirusalim.

²² Su arà en ke hewii ne edusaan te Eleteala ke menge etew ne egkunterà kandin, ne langun te nekahi rin kayi te impesurat ne Lalag te Eleteala rengan ne egketuman en.

²³ Egkeyruwan ke menge meritan ne mehingey te arà ne hewii wey ke menge meritan ne edseruru. Su ruen kemeresayan ne ebpekedabak kayi ne inged, ne ed-isuhaten en te Eleteala te kegkeepes din ke menge Hudiyanen ne egkunterà kandin.

²⁴ Duen kayi te sikandan ebpenundangan, ne ruen ebpembiyahen ne ed-ewiten diyà te langun ne menge inged kayi te ampew te dunya. Ne ini se inged ne Hirusalim ne edtekutaken te menge etew ne kenà Hudiyanen taman te idtuhut pà kandan te Eleteala.”

*Tuus te Mehaan en ke Kedlived Dut te Impeanak te Menusiyà Kayi te Ampew te Dunya
(Mateo 24:29-31; Marcos 13:24-27)*

²⁵ Ne migkahi en maa si Hisus te, “Duen egkekita niyu riyà te andew, bulan, wey bituen ne menge tuus. Ne kayi te ampew te dunya ne egkekiyab se atey te menge etew rut te egkerineg

dan ke ebpekesahad ne egkenegkeneg ne rahat wey ke ebpeteltelukuney ne baleg.

²⁶ Ebpengevidtawan ke menge etew te andek dan su egkeuru ran ke engkey se egketemanan dan. Su langun te netehuan te edtenuran diyà te langit ne egkeparin.

²⁷ Ne ketà ne egkekita ran ke kedlived, te Impeanak te Menusiya, su eduma dut te sehulapun. Ne egkekita ran ke gehem din wey ke ed-andlag ne raman din.

²⁸ Embiya edrudsùrudsù en ini se migkahi ku te kegketuman din ne kenà kew kelugkai ugaid ne kehalew kew su mehaan kew en ebpekeliyu.”

Ke Sempità ni Hisus Mekeatag Te Kayu ne Igira ne In-upama Rin te Tuus te Mehaan en ke Kedatù te Eleteala te Menusiya

(Mateo 24:32-35; Marcos 13:28-31)

²⁹ Ne mibpenempità si Hisus kandan te, “Kenian niyu rè ma te kayu ne igira wey ruma pà ne menge kayu.

³⁰ Embiya egkekita niyu ne nekepasad en te edrewrew wey ebpeneringsing en, ne tuus te ed-andew en.

³¹ Ne iring din ded dema embiya egkekita niyu en se netuman en ke langun ne tuus ne intarem ku keniyu, ne egketuenan niyu te mehaan en ke Kedatù te Eleteala te menusiya.

³² “Tentenuri niyu ini se egkehiyen ku keniyu su ruen pà kayi te keniyu guntaani ebpekesaut pà ketà te kegketuman din ini.

³³ Su egkeawà ini se langit wey tanà, ugaid ne ini se migkahi ku ne kenà bulug ebperis.”

Ke Imbaag Ni Hisus Mekeatag Te Kebantey Rut te Hewii te Kegkukum te Eleteala te Menusiyà

³⁴ Ne migkahi en maa si Hisus te, “Uram kew ve su apey kenà kew kayi rà egketaman te kebpengevruran, ebpeningum te ebpeketeve-ereg, wey ke kegkeuru niyu te ked-ubpàubpà niyu. Su embiya kenà kew ed-uram ne egkesaut kew te hewii ne kegkukum te Eleteala te menusiya ne iring kew te rumat ne egketelebpi.

³⁵ Su iring te telivekasen se kehaan din te kebpekeuma ketà kayi te langun ne menusiya.

³⁶ Tembù be,” ke si Hisus, “pekevantey kew nevenar ne layun kew pengeningeni su apey kew ebehera te Eleteala te ked-etuvang niyu kayi te langun ne egketemanan. Pengeningeni kew su apey warà igkeyeyai niyu ketà te ked-itindeg niyu kayi te etuvangan ku, ke Impeanak te Menusiya.”

³⁷ Uman gewii ne mibpenurù si Hisus diyà te Nekebpuru ne Valey te Eleteala, ne uman merukilem ne mibpendiyà sikandin te buvungan ne ed-ingaranan te Ulivuwen su riyà ed-ubpà.

³⁸ Ne mibpaneypaney ke minge etew ne ebpendiyà te Nekebpuru ne Valey te Eleteala su ebpeming te penurù din.

22

*Mibentaan ke Menge Mepurù te Terebpe-
lengesa wey ke Menge Meyterù te Penduan te
Kedsigkem ki Hisus*

(Mateo 26:1-5; Marcos 14:1-2; Juan 11:45-53)

¹ Mehaan en egkeuma arà se hewii te kevrunan ne edtenuran dut te menge Hudiyanen ne ed-ingaranan te Pista te Kedsehari te Suluhuen.

² Ne ebpemengà ke menge mepurù te terebpelengesa wey ke menge meyerù te penduan te ralan te kedsigkem dan ki Hisus te kenà egketuenan te menge etew su egkeandek dan te menge etew.

Mibpendiyà si Hudas Iskeriyuti te Menge Mepurù te Terebpelengesa Su Ebpkidsabut ke Ebmenuwen Din te Ed-ulug si Hisus

(Mateo 26:14-16; Marcos 14:10-11)

³ Ne ketà ne mid-awuk en si Setanas ke datù te pekaid ki Hudas, ini se ed-ingaranan dema te Iskeriyuti ne senge etew sikandin dut te sepulù wey deruwa ne edumdumaan ni Hisus.

⁴ Ne midlihawang sikandin se ebpndiyà te menge mepurù te terebpelengesa wey ke menge kepitan dut te ebantey te Nekebpuru ne Valey te Eleteala su ebpkidsabut kandan ke memenu se kebpulid din ki Hisus.

⁵ Ne nengesuatsuat dan nevenar, ne impasad dan kandin te ebehayan te pirak.

⁶ Ne migkiyug en si Hudas ne in-awà dà ketà ne ebpemegaan din en ke ralan te kegkeulug din ki Hisus su apey mesigkem dan en te kenà egketuenan dut te menge etew.

Mibpenehana si Hisus Wey Ke Menge Edumdumaan Din Dut te Kedlavung te Pista te Kedsehari te Suluhuen

(Mateo 26:17-25; Marcos 14:12-21; Juan 13:21-30)

⁷ Neuma en ke hewii rut te kevrungan dan te Pista te Kegkaan dan te Pan ne Warà Insawug ne Ibpelevag. Ne ini se neuna ne hewii ne idsumbali te menge Hudiyanen te ibpelengesa ran ne nati ne bilibili ne egkeenen dan te kedtenuri ran dut te hewii rengan te kedsehari te menge apù dan dut te suluhuen te Eleteala.

⁸ Ne midsuhuen ni Hisus si Pedro wey si Juan ne migkehiyan din sikandan te, “Una kew en be ne pegatur kew en te Kedlavung tew te Pista te Kedsehari te Suluhuen.”

⁹ Ne mid-insà dan ki Hisus te, “Endei rey ve ini ebpegetura?”

¹⁰ Ne migkahi si Hisus te, “Embiya ebpekeuma kew en diyà te inged ne ruen meama ne ed-utuk te kelalew ne ruen wayig din ne edsinuhung keniyu. Tundug kew en be kandin, ne embiya ebpekeuma kew riyà te ed-ubpaan din,

¹¹ ne kehiyi niyu ve ke kemuney te valey te, ‘Ibpeinsà rut te meyterù tew te: Endei ne ruhu ke edlevungan ku wey ke menge edumdumaan ku dut te Pista te Kedsehari te Suluhuen?’

¹² Ne ketà ne ibpekita rin keniyu ke meluag ne ruhu diyà te ikeruwa ne pangkat ne saag ne pegediran en, ne ketà kew be pegatur te idlavung tew.”

¹³ Mid-ipanew ran ne nekeuma ran ketà te inged ne langun dut te ingkahi kandan ni Hisus ne arà en iya rema se nekita ran. Ne ketà dan en mibpegatur te idlavung dan te Pista te Kedsehari te Suluhuen.

Ke Ketepusan dà ne Kinepekiduma ni Hisus te

Egkaan Dut Te Menge Edumdumaan

(Mateo 26:26-30; Marcos 14:22-26; 1 Kurintu 11:23-25)

¹⁴ Guna su arà en ke kedlavung dan ne mibpinuu si Hisus wey ke menge edumdumaan din ne ed-ingaranan te apustulis su egkaan.

¹⁵ Ne migkahi si Hisus te, “Dekelà te hinawa ku se egkeseveka kiyu se egkaan te ini ne Pista te Kedsehari te Suluhuen te kenà e pà ebpatay.

¹⁶ Su ini se idtarem ku keniyu te egkepasad ini ne kenà ad maa egkaan te Pista te Kedsehari te Suluhuen taman te egketuman en ke tidtu ne pista ketà te menge etew ne Edetuan te Eleteala keuremà.”

¹⁷ Ne ketà ne migkuwa ni Hisus ke ed-inumen ne impeselamat din te Eleteala ne migkahi sikandin te, “Pesemsemeey kew ve se ed-inum kayi.

¹⁸ Su idtarem ku keniyu te kenà ad maa ed-inum kayi te ed-inumen ini taman te kenà egkeuma ke hewii keuremà te Kedetui te Eleteala.”

¹⁹ Ne migkuwa rin ke egkeenen dan ne pan ne impeselamat din te Eleteala, ne mibpenevìtevi din ne imbehey rin diyà te menge edumdumaan din se egkahi te, “Ini ke lawa ku ne ibeliwas keniyu. Ul-ulaa niyu ini su apey a niyu egkepeg-pegitung.”

²⁰ Guna su nekeipus dan se edlavung ne migkuwa maa ni Hisus ke ed-inumen se egkahi te, “Ini se lengesa ku ne ebpeketudà ne ibavas te langun ne menge etew, su tuus ini te egketuman en ke impasad te Eleteala rengan te

ebpekepelihaun en ke langun ne menge etew te keberedusaan dan.

²¹ “Ugaid ne kegketueni niyu te sikandin ini se ed-ulug kediey ne kayi red te sikitew ini ne mibpinuu.

²² Su ed-imetayan ke Impeanak te Menusiyà su rengan ne intandà te Eleteala ini, ugaid ne mekeyruwuru arà se etew ne ed-ulug kandin.”

²³ Ne ketà ne mibpein-inseeey ke menge edumdumaan din ke endei rapit buwa kandan se ed-ulaula kayi te migkahi rin.

Migpelelewaneey Ke Menge Edumdumaan ni Hisus ke Engkey se Mepurù Kandan

²⁴ Ne mibpelelewaneey ke menge edumdumaan ni Hisus ke engkey kandan se mepurù te langun.

²⁵ Migkahi si Hisus kandan te, “Kayi te ampew te dunya ini se menge pengulu te inged ne metehel ne edsuhù te menge sakup dan, ne ini se menge unuten ne egkiyug ne egelalan te sikandan ke Ebpesineruwan te Menge Etew.

²⁶ Ugaid ne kenà kew ed-iring ketà, su embiya ruen seveka keniyu ne egkiyug ne ebmepurù ne iyan din kemeyidan ne mebpeembavà te hinawa rin iring te ineriyen en. Ne embiya ruen egkiyug ne egkeunutan ne medlila te hinawa rin te edsugsuhuen te menge ruma rin.

²⁷ Maa entei se mepurù,” ke si Hisus, “ke etew ne edsendaran su egkaan etawa ke etew ne edsendaran kandin? Idtarem ku keniyu te arà se midsendaran. Ugaid ne misan siaken se

edlingekaan niyu ne gewii ku te kayi te keniyu ne iring te siaken se edsugsuhuen niyu.”

²⁸ Ne migkahi si Hisus te, “Langun te kemerehenan ku ne mid-unung kew kedì.

²⁹ Mibehayan a te Amey ku ne Eleteala te kewagib te edatù, ne engketà ded ebehayan ku rema sikiyu te kewagib te kedatù.

³⁰ Keuremà te Kedatù ku ne ketà kew ebpinuu te uvey ku su edseveka kiyu egkaan wey edinum. Ne ebpepinuuwan ku sikiyu se edatù dut te sepulù wey deruwa ne bansa ne inenakan ni Israyil.”

Impayag neraan ni Hisus ke Kebparew ni Pedro te Teleduma Ran

(Mateo 26:31-35; Marcos 14:27-31; Juan 13:36-38)

³¹ Migkahi si Hisus kayi te ki Simon Pedro te, “E, Simon, duen idtarem ku keykew. Mid-tuhutan te Eleteala si Setanas ke datù te pekaid su ebpenggeraman kew ke embiya ebpekedsalà kew. Ini se kebpenggeram din ne iring te ed-ukapan din ke sarig nu.

³² Ugaid ne impengeningeni ku en sikuna, Simon, su apey kenà egkeawà ke sarig nu kediey. Ibparew a nikuna, ugaid embiya ebpekeulit en ke sarig nu kediey ne behera nu ke sarig te menge ruma nu.”

³³ Ne migkahi si Pedro te, “Kenà a ebpitass kenikew, Kerenan, misan egkevilanggù ka ne ketà ad dema. Embiya ebpathey ka ne ebpekid-unung a kenikew.”

³⁴ Ne migkahi si Hisus te, “Tentenuri nu ini, Pedro, te kenà pà ed-ukarà ke manuk te ini en ne kerukileman, ne ketetelu a nu en ibparew te kenà a nu ruma.”

Migkehiyan en ni Hisus ke minge Edumdumaan Din te Ebpeewiten en te Kureta, Kempiru wey Sundang te Ked-ipanew Ran

³⁵ Ne migkahi maa si Hisus kandan te, “Ketà te kinesuhù ku keniyu rut te kengkeniyà ne indawey ku keniyu se ed-ewit te kureta, kempiru etawa telumpà, ne maa ruen be nepemengà niyu?”

Ne migkahi ran te, “Warà.”

³⁶ Ne migkahi si Hisus te, “Ugaid ne guntaani ne embiya ruen kureta etawa kempiru niyu ne ewita niyu en te ked-ipanew niyu. Ne ke etew ne warà sundang din ne pesaa rin en ke kumbalà din ne mebpemasa te seveka.

³⁷ Su igkahi ku keniyu ne arà se impesurat ne Lalag te Eleteala mekeatag kediey ne iyan iya se metuman en. Su ruen nekahi ketà mekeatag kediey te, ‘Inragkes sikandin te minge etew ne belisalà’ ne ke kegketuman din ini ne mehaan en egkeuma.”

³⁸ Ne migkahi ke minge edumdumaan din te, “Intengi nu ma, Meyterù, su duen en deruwa ne sundang dey.”

“Sesangen en ayan,” ke si Hisus.

Mibpengeningeni si Hisus Diyà te Buvungan ne Ed-ingaranan te Ed-ulivuwen

(Mateo 26:36-46; Marcos 14:32-42)

³⁹ Midlihawang en si Hisus ketà te valey ne midlevungan dan ne mibpendiyà maa sikandin te buvungan ne ed-ingaranan te Ulivuwen su arà ke andang ne ebpesineruwan din. Ne miduma kandin ke menge edumdumaan din.

⁴⁰ Nekeuma ran ketà ne migkehiyan din sikandan te, “Pengenigeni kew su apey kenà kew mepeneheewit dut te ebpenggeram keniyu.”

⁴¹ Mid-ewaan ni Hisus sikandan te egkeuma red te edtimbag, ne mibpenimbuel sikandin se ebpengenigeni te Eleteala.

⁴² Ke sikandin te, “Amà, netuenan ku te egkegaga nu ke langun! Ne embiya egkiyug ke rà ne iawà nu ini se keresayan ku, ugaid ne misan be engketà ke kiyug ku ne ipelevundus nu se keykew ne kiyug.”

⁴³ Gewii rin te ebpengenigeni ne ruen suluhuen te Eleteala ne riyà ebpuun te langit ne mibpengkayi te kandin su ebaher te hinawa rin.

⁴⁴ Ne gaina te nepenù en si Hisus te kemutuwan ne mid-ilut pà se kebpengenigeni rin te Eleteala, ne ketà ne edtehaktak diyà te tanà ke rimuseng din ne iring en te lengesa.

⁴⁵ Mid-itindeg sikandin ketà te ebpengenigeniyan din ne midliveran din ke menge edumdumaan din, ne neumaan din ne nekelipereng dan su neewaan dan te baher dut te kemutuwan dan.

⁴⁶ Migkahi en si Hisus kandan te, “Meambe ke edlipereng kew? Enew kew ne pengeningeni kew te Eleteala su apey kew kenà mepeneheewit dut te ebpenggeram keniyu.”

Ke Kedsigkem Ki Hisus

(Mateo 26:47-56; Marcos 14:43-50; Juan 18:3-11)

⁴⁷ Gewii te edlalag pà si Hisus ne nekeuma en se merakel ne etew. Ne si Hudas ke senge etew rut te sepulù wey deruwa ne edumdumaan din ne iyan en iya ebpengunaan kandan. Mid-uwey rin si Hisus su ed-erekan din.

⁴⁸ Ugaid ne migkahi si Hisus kandin te, “Maa, Hudas, ini embe se ked-arek nu kayi te Impeanak te Menusiyà se ked-ulug nu en kandin kenihan te menge ruma nu?”

⁴⁹ Nekita rà kayi te menge edumdumaan ni Hisus se iring bes kayi ne migkahi ran te, “Menu, Meyterù, edtibas key en su sundang ded ini?”

⁵⁰ Ne senge etew kandan se mid-ulavut din se sundang din ne midtibas din en ke edsugsuhuen dut te pinekebmepurù te terebpelengesa ne nesamping en ke kewanan ne telinga rin.

⁵¹ Ne ketà ne migkahi si Hisus te, “Suhati nu en!” Ne in-ulit ni Hisus ke telinga rut te edsugsuhuen ne neulian en.

⁵² Ne migkehiyan ni Hisus ke menge etew ne edsigkem kandin, ini se menge mepurù te terebpelengesa, ke menge kepitan te ebantey rut te Nekebpuru ne Valey te Eleteala, wey ke menge egkeunutan te menge Hudiyänen, ke sikandin te, “Maa, tulisan a ne ebmetereman niyu te sundang wey behuval te kedsigkem kediey?”

⁵³ Su uman gewii ne diyan a te Nekebpuru ne Valey te Eleteala se ebpenurù, ne warà e ma nikiyu sigkema ketà. Ugaid ne keniyu en ini ne hewii te kedsigkem kediey, ne ebpepayag

en ke kevaher ni Setanas ke datù te pekaid se ebayàbayà keniyu.”

*Imparew ni Pedro te Teleduma Ran ki Hisus
(Mateo 26:57-58, 69-75; Marcos 14:53-54, 66-72; Juan 18:12-18, 25-27)*

⁵⁴ Ne ketà ne midsigkem dan si Hisus ne mibpeneheewit dan en diyà te baley te pinekemepurù dut te menge terebpelengesa. Ne midtundugtundug en dema si Pedro.

⁵⁵ Nekeuma ran ne ketà te lama ne ruen midtetemeg te apuy ne mibpinuu ran se ed-inarang. Ne mibpekíd-amur en si Pedro kandan.

⁵⁶ Ne ruen ketà senge etew ne raha ne ed-sugsuhuen ne nekekita ki Pedro te nesilaan te rayag dut te apuy. Midtengtengan din si Pedro ne migkahi en te, “Ini ne meama ne ruma red ketà te midsigkem dan.”

⁵⁷ Ugaid ne mibparew si Pedro se egkahi te, “E, Bayi, kenà ku egketuenan ke entei sikandin.”

⁵⁸ Neiseg-iseg ne ruen en maa senge etew ne nekekita ki Pedro ne migkahi te, “Benar iya ne ruma ke red ketà te nesigkem.”

Ne migkahi si Pedro te, “E Mama, kenà.”

⁵⁹ Ne neiseg-iseg maan ne ruen maa senge etew ne nekekita ki Pedro ne migkahi te, “Benar iya ne ruma red sikandin ketà te nesigkem su riyà ebpuun sikandin te Geliliya.”

⁶⁰ Ne migkahi si Pedro te, “E, Mama, kenà ku egkesebutan ayan se egkehiyen nu.” Arà dà ne gewii te edlalag pà si Pedro ne mid-ukarà en ke manuk.

⁶¹ Ketà ne midlilingey ni Hisus si Pedro. Ne arà pà ne netenuran ni Pedro ke migkahi ni Hisus

kandin te, “Kenà pà ed-ukarà ke manuk guntaani te ini en ne kerukileman ne ketetelu a nu en ibparew te kenà a nu ruma.”

⁶² Ne midlihawang si Pedro ne midrahukrahuk en te kedsinehew rin.

*Mid-undaunda wey Mibedasan si Hisus
(Mateo 26:67-68; Marcos 14:65)*

⁶³ Ne mid-undaunda en wey mibedasan si Hisus dut te menge etew ne mibantey kandin.

⁶⁴ Ne mibegkesan dan ke mata rin ne migkahi ran te, “Entuka nu ke enta se mibadas keykew.”

⁶⁵ Ne merakel pà se kinepegkeyà dan ki Hisus.

*Mid-ewit Dan si Hisus Diyà te Kukuman
(Mateo 26:59-66; Marcos 14:55-64; Juan 18:19-24)*

⁶⁶ Guna su mesmeselem pà ne langun dut te egkeunutan te menge Hudiyanen, ke menge mepurù te terebpelengesa, wey ke menge meysterù te penduan ne impeetuvang dan en si Hisus su sikandan ke egkukum.

⁶⁷ “Embiya sikuna ke Anak te Eleteala,” ke sikandan, “ne Impasad din ne Ebperetuen din ne kehiya nu kenami.”

Ne migkahi si Hisus te, “Misan egkehiyen ku keniyu ne kenà kew ebperetiyaya kediey.

⁶⁸ Ne misan duen id-insà ku keniyu ne kenà kew rema edtavak.

⁶⁹ Ugaid ne igkahi ku keniyu te mehaan en egketuman ke hewii ne ebpekepinuu en ke Impeanak te Menusiyà diyà te rapit te egkekewanan te Eleteala ne warà repeng te gehem din.”

⁷⁰ Ne langun dan ne migkahi te, “Embiya ves arà se kahi nu, ne maa sikuna en iya ini ke Anak te Eleteala ne Impasad din ne Ebperetuen din?”

Ne midtavak si Hisus te, “Uya, siaken en iya.”

⁷¹ Ne migkahi ran te, “Kenà ki en ebpemengà te ruma pà ne titihus su nerineg tew en ayan se lalag din ne mibpevayà te bèbà din.”

23

Mid-ewit Dan Si Hisus Diyà te ki Pilatu ke Gubinedur ne Rumanu

(Mateo 27:1-2, 11-14; Marcos 15:1-5; Juan 18:28-38)

¹ Ketà ne langun ne menge etew ne mibpengukum ki Hisus se mid-ewit kandin diyà te gubinedur ne si Pilatu su apey rin mepasad en ke kukuman.

² Nekeuma ran ne imperineg dan ki Pilatu ke id-isuhat dan kandin se egkahi te, “Nesepenan dey ini se meama ne ebpesuwey rut te menge etew kayi te inged tew su impeengked din ke menge etew ne ebayad te buwis diyà te mepurù tew ne si Cesar. Ne migkahi rin te sikandin kun ke midtendù te Eleteala ne ebperetuen.”

³ Ne mid-insaan ni Pilatu si Hisus te, “Menu sikuna en iya ke ratù te menge Hudiyanen?”

Ne midtavak si Hisus te, “Uya, ayan iya se migkahi nu.”

⁴ Ne migkahi si Pilatu riyà te menge mepurù te terebpelengesa wey ke merakel ne menge etew ne nevurun ketà, ke sikandin te, “Warà netuen ku ne salà ne id-isuhat ku kayi te etew ini.”

⁵ Ugaid ne nasi dan en ne mibpemensag se egkahi te, “Ini se menge penurù din se puunan te ebpeetuwen din ke menge etew ketà te mepurù tew. Midrudsù se kebpenurù din diyà te lusud te Geliliya ne neeneb din ke menge inged diyà te lusud te Hudiya taman te ini en te Hirusalim.”

Mid-ewit Dan si Hisus Diyà te ki Hirudis

⁶ Nerineg ni Pilatu ini ne mid-insà sikandin te, “Meambe, etew ves ini te Geliliya?”

⁷ “Uya,” ke sikandan, “etew ayan te Geliliya.” Guna su netuenan ni Pilatu te riyà bes ne etew si Hisus te Geliliya ne inged ne egkemalan ni Hirudis, ne impependiyà din si Hisus te ki Hirudis. Su seretà din ketà ne kayi rema si Hirudis te Hirusalim.

⁸ Nekita ni Hirudis si Hisus ne nesuatsuat sikandin su neuhet en ne ed-ing-ingitaen din si Hisus. Su uman din dà egkerineg ke mekegeyip ne ed-ul-ulaan ni Hisus, ne ed-inteng dema perem sikandin.

⁹ Ketà be ne mibpenginsaan ni Hirudis si Hisus, ugaid ne warà midtavak si Hisus.

¹⁰ Nekeipus sikandin ne mid-uvey ke menge mepurù te terebpelengesa wey ke menge meysterù te penduan ne mid-uluhan dan nevenar si Hisus te kewagib.

¹¹ Ne mid-undaunda ni Hirudis wey ke menge sundaru rin si Hisus ne pinegkeyà dan. Ne pinelelembung dan te velegkas te datù su uvag kun ne ratù ne impelived dan en maa riyà te ki Pilatu.

¹² Ne arà ne andew ne neked-upiyaney en si Pilatu wey si Hirudis su pehaney ne telegkunterà dan.

Nepasad ke Kukuman Dan te Ed-imetayan si Hisus

(Mateo 27:15-26; Marcos 15:6-15; Juan 18:39-19:16)

¹³ Guna su kayi en maa si Hisus te ki Pilatu ne miburun ni Pilatu ke menge mepurù te terebpelengesa, ke menge egkeunutan wey ke merakel ne etew.

¹⁴ Ne migkehiyan din sikandan te, “Mid-ewit niyu ini se etew kayi te kedì ne egkehiyen niyu ne ebpeatu sikandin kayi te menge etew rut te mepurù tew. Ugaid ne mid-insaan ku en sikandin kayi te etuvangan niyu ne warà netuen ku ne salà din iring dut te idwagib niyu.

¹⁵ Engketà ded dema si Hirudis, warà dema netuen din su tembù impelived din ded kayi te kenitew. Warà salà kayi te etew ini ne rait ne id-imetayi kandin.

¹⁶ Ugaid ne ibpelambit ku rà sikandin ne ibpelihawang ku en.” (

¹⁷ Iyan kinekahi ni Pilatu kayi su ruen betasan din te embiya egkeuma ke kevruran te Pista te Kedsehari te Suluhuen ne ruen ibpelihawang din ne senge etew ne bilanggù ne ebuyuen te menge etew.)

¹⁸ Nerineg dut te menge etew ini se migkahi ni Pilatu ne nasì dan ne mibpemensag se egkahi te, “Peimatayi nu ayan ne etew! Ne ipelihawang nu kayi te kenami si Barabas!”

19 (Si Barabas ini ne nevilanggù su mid-amung sikandin te ebpekidkunterà te gubirnu ne ruen nepatey rin.)

20 Duen kiyug ni Pilatu te iyan ibpelihawang ne si Hisus ne ketà ne mid-insà maa sikandin dut te menge etew.

21 Ugaid ne mibpememensag se egkahi te, “Ipelansang nu! Ipelansang nu riyà te ebpebelevahen ne kayu!”

22 Ne migkahi en maa si Pilatu te iketelu en te, “Meambe? Engkey se meraat ne mid-ulaula rin? Su warà netuen ku ne salà din ne dait ne id-imetayi kandin. Ibpelambit ku rà sikandin ne ibpelihawang ku en.”

23 Ugaid ne mid-ilut dan pà se ebpememensag se egkahi te ebpeimetayan sikandin, ne warè en mekeehen si Pilatu.

24 Geina te mibpulung dan mibpememensag ne imbehey en ni Pilatu ke kiyug dan.

25 Impelihawang en ni Pilatu si Barabas, ini se etew ne nevilanggù su mid-amung te ebpekidkunterà te gubirnu wey ruen nepatey rin. Ugaid ne si Hisus ne impalad en ni Pilatu diyà te kandan te misan ebmenumenuwen dan.

Inlansang si Hisus Diyà te Pinebelavag ne Kayu (Mateo 27:32-44; Marcos 15:21-32; Juan 19:17-27)

26 Ne ketà ne mibpeneheewit dan en si Hisus diyà te ed-imetayan dan kandin. Ne gewii ran te ed-ipanew ne ruen etew ne nesinuhung dan ne iyan pà ebpekeuma ne riyà ebpuun te taneb, ne mibpehes dan te ebpetiang ke pinebelavag ne kayu ne edtiangen ni Hisus. Etew ini ne

ed-ingaranan ki Simon riyà ebpuun te inged ne Sirin.

²⁷ Ne denda ne minge etew se miduma ki Hisus abpeg ke minge meritan ne ebpeninehew su ebpenderawit dan en kandin.

²⁸ Ne midlilingey si Hisus kandan ne migkahi en te, “Sikiyu ne minge meritan kayi te Hirusalim, kenà a niyu sinehewi, ugaid ne iyan niyu sinehewi ke egketemanan niyu wey ke minge anak niyu.

²⁹ Su ruen hewii ne egkeuma,” ke si Hisus, “ne egkahi ke minge etew te, ‘Meupiya ke meritan ne kenà ed-anak, ke meritan ne warà med-anak, wey ke meritan ne wara edseruruwen din!’

³⁰ Egkeuma arà se hewii ne egkehian te minge etew ayan se buvungan te, ‘Ketempahi key en ne buvungan!’ wey egkahi ran kenian te minge tuhar te, ‘Kevunbuni key en ne tuhar.’

³¹ Su,” ke si Hisus, “embiya ini se ibped-ulaula ran kedì te iring te kayu ne meilew pà su warà salà ku, ne tuwas pà imbe ke ibped-ulaula ran keniyu te sikiyu ne iring te kayu ne nehangu.”

³² Ne ruen dema mid-ewit dan ne deruwa ne etew ne tulisan su ibperuma ki Hisus te ed-imetayan.

³³ Nekeuma ran ketà te rapit ne ed-ingaranan te “Tulan te ulu” ne inlansang dan en si Hisus diyà te pinebelavag ne kayu ne inlansang ded dema ini se deruwa ne tulisan, seveka kayi te egkekewanan ni Hisus ne seveka kayi te egkehiwang din.

³⁴ Gewii ran te edlansang kandin ne mibpenge-ningeni si Hisus te, “Amà, pesehara nu sikan-
dan su warà dan metueni ini se ed-ul-ulaan dan.”
Ne ketà ne ini se menge sundaru ne midlansang
kandin ne mibunutbunutan dan se velegkas ni
Hisus ke entei se ebpekegkemuney kandan.

³⁵ Ke denda ne etew ne mid-itindeg ketà
se edtengteng, ne ini se menge egkeunutan
te Hudiyanen ne mid-undaunda ki Hisus, ke
sikandan te, “Nekepelihaun sikandin te menge
ruma rin. Ne intengan tew ve ke igkepelihaun
din ke hinawa rin embiya benar ne sikandin en
ke midtendù te Eleteala ne ebperetuen ne ed-
ingaranan te Mesiyas.”

³⁶ Ne mid-amung ke menge sundaru mid-
undaunda kandin. Mid-uvey ran si Hisus ne
pineinum dan te daan en ne tebà.

³⁷ Ne migkahi ran te, “Embiya sikuna en ke
ratù dut te menge Hudiyanen ne ibpeliyu nu ke
hinawa nu.”

³⁸ Ne ruen surat ne riyà dan intahù te divavew
te ulu rin ne egkahi te, “Ini ke Ratù te menge
Hudiyanen.”

³⁹ Ne senge etew rut te imbitin ne tulisan
ketà se mid-undunda ki Hisus se egkahi te,
“Menu, kenà sikuna ke Impasad te Eleteala ne
Ebperetuen? Ipeliyu nu ke hinawa nu wey
sikami rema.”

⁴⁰ Ugaid ne midawey sikandin dut te ruma rin
se egkahi te, “Engkey ka ini? Maa, kenà ke ves
egkeandek te Eleteala te langun tew ini te tetelu
ne ebpedulung en te kepepatey?

⁴¹ Dait ta ini te deruwa se ed-imetayen su id-uli dà keyta ke kereatey te ulaula ta. Ugaid ne ini se etew ne egkeimetayan te warè en iya meraat ne ulaula rin.”

⁴² Ne migkahi sikandin kayi te ki Hisus te, “E, Hisus, tentenuri a nu rà ketà te Edetuan nu keuremà.”

⁴³ Ne migkahi si Hisus kandin te, “Igakahi ku kenikew te ini en ne andew ne ebpekeruma ka kedì riyà te langit.”

Ke Kinepatey ni Hisus

(Mateo 27:45-56; Marcos 15:33-41; Juan 19:28-30)

⁴⁴ Neudtu en ini ke andew ne midtekew mib-merusirem ketà te langun ne inged taman te edluuk en ebpenaug ke andew su midlekep.

⁴⁵ Ne riyà te Nekebpuru ne Valey te Eleteala ne newaswas kayi te luuk ini se mekepal ne saput ne impehelet dut te insivey ne ruhu te Eleteala.

⁴⁶ Ne ketà ne migkulayì si Hisus se egkahi te, “Amà, ebpeheweran ku kenikew ke gimukud ku.” Nelalag din dà ini ne nependusuan en sikandin te hinawa.

⁴⁷ Nekita rut te kepitán te munge sundaru ne ini se ned-ulaula ne nekereyù sikandin te Eleteala se egkahi te, “Benar ves iya ne metidtu ini ne etew.”

⁴⁸ Ne langun kayi te munge etew ne nevrurun ketà su edtengteng, ne nekekita kayi te ned-ulaula ne mid-uli dan se ebpenempak te kumeng dan su dekelà se kemutuwan dan.

⁴⁹ Langun ne edkekilala ni Hisus abpeg ke munge meritan ne miduma kandin igenat te

Geliliya ne mid-it-itindeg diyà te malù meriyù se edtengteng kayi te langun ne ned-ulaula.

Ke Kineleveng ki Hisus

(Mateo 27:57-61; Marcos 15:42-47; Juan 19:38-42)

⁵⁰⁻⁵¹ Duen senge etew ketà ne ed-ingaranan ki Jose ne riyà ebpuun te inged ne Eremetiya lusud te Hudiya. Meupiya ne etew sikandin wey metidtu se ulaula rin. Senge etew sikandin dut te menge Hudiyanen ne edtahad dut te kebpekeuma te Edetuan te Eleteala kayi te ampew te dunya. Senge etew rema sikandin dut te menge egkeunutan te Hudiyanen te Perekukum, ugaid ne warà meeyuni sikandin dut te kineimasad en ki Hisus.

⁵² Mibpendiyà si Jose ini te ki Pilatu su ebuyuen din ke lawa ni Hisus ne inlulut dema ni Pilatu.

⁵³ Ne mibperus en ni Jose ke lawa ni Hisus ne mibukusan din en te meputi ne saput. Ne inleveng din en ketà te imbangbang ne leveng diyà te dempilas ne warà pà melevengi te minatey.

⁵⁴ Meapun en ini te Diyemaat ne edsanlep ke andew ne ini se rudsuan te Hewii ran te Id-imeley.

⁵⁵ Ke menge meritan ne miduma ki Hisus igenat diyà te Geliliya ne miduma ki Jose te edleveng, ne nekita ran ke midlevengan wey ke kinetahù en ki Hisus diyà te leveng din.

⁵⁶ Ne mid-uli dan en ne mibpenehana ran ke meemut ne menge rawun wey periyemut su idsapu te lawa ni Hisus.

Ne ketà te midrudsù ke Hewii te Id-imeley ran ne mid-imeley ran en su edtuman dan dut te insuhù te penduan dan.

24

*Ke Kinekevanew ni Hisus
(Mateo 28:1-10; Marcos 16:1-8; Juan 20:1-10)*

¹ Mesmeselem pà te hewii ne Akad ne mibpendiyà ke minge meritan te leveng ni Hisus ne imbangbang diyà te dempilas ne mid-ewit dan ke minge meemut ne idsapu ne mibpenehana ran.

² Nekeuma ran ne nekita ran te nelilid en ke watu ketà.

³ Mid-awuk dan ne mibpenlangulangu ran, ugaid ne warà dan mekita ke lawa ni Hisus.

⁴ Gewii ran te ed-it-itindeg ketà se neliveg, ne neketekew en nekeitindeg se deruwa ne meama ne ebpeneringsing se velegkas dan.

⁵ Ne nekelumpeng ke minge meritan te kegke-andek dan. Ne migkahi ini se deruwa ne meama te, "Meambe ke ebpemengaan niyu kayi te edlevengan te minatey arà se etew ne biviyag?"

⁶ Warà en sikandin kayi su nevanew en. Tentenuri niyu rè ma ke migkahi rin keniya rut te riyà kew pà te Geliliya.

⁷ Su migkahi rin te ibpalad ke Impeanak te Menusiyà diyà te kebayaàbayaà te minge etew ne mekesesalà ne idlansang dan sikandin, ugaid ne ketà te iketelu ne hewii ne egkevanew en."

⁸ Ne arà pà ne netenuran dan ke migkahi ni Hisus.

⁹ Mid-ulì dan ne mibpenudtulan dan ke sepulù wey seveka ne edumdumaan ni Hisus wey ke minge ruma pà ketà.

¹⁰ Ini ke minge meritan ne mibpenudtul te lalag te suluhuen: Si Maria ne riyà ebpuun te Magdala, si Juana, si Maria ne iney ni Santiago, wey ruen pà minge ruma ran. Sikandan be ini ke mibpenudtul dut te minge edumdumaan ni Hisus ne ed-ingaranan te Apustulis.

¹¹ Ugaid ne warà mibperetiyaya ke minge edumdumaan ni Hisus dut te tudtul te minge meritan su iyan dan kunaan ke minge kesembaran dà.

¹² Ugaid ne mid-itindeg si Pedro ne mibpelelahuy en se ebpendiyà te leveng. Nekeuma ne midsiniling din en ne iyan din nekita ke meputi ne saput ne imbukus dan ne netahak ketà. Ne mid-ulì sikandin ne neinuinu nevenar sikandin ke engkey se ned-ulala.

Mibpekitakita si Hisus Diyà te Ralan Dut te Deruwa ne Etew ne Ebpendiyà te Inged ne Emaus (Marcos 16:12-13)

¹³ Arà ne hewii ne ruen deruwa ne etew rut te midumaruma ki Hisus ne ebpendiyà te inged ne ed-ingaranan te Emaus. Ini se inged ne Emaus ne iyan din keriyù te Hirusalim ne minge sepulù wey seveka ne kilometro.

¹⁴ Ketà te ked-ipanew ran ne iyan dan egkepempengasak ne mekeatag te langun dut te ned-ulaula ni Hisus.

¹⁵ Gewii ran te ebpengasak ne midlambag si Hisus kandan ne mibpekiduma en.

16 Nekita ran sikandin ugaid ne warà mebpeki-lala sikandin kandan.

17 Migkahi si Hisus kayi te kandan te, “Engkey ini se egkepengasak niyu te ed-ip-ipanew?”

Mid-itindeg dan se paras te egkemutuwan.

18 Midtavak ini se senge etew ne ed-ingaranan ki Keliyupas te, “Maa iyan ka mid-ubpà kayi te Hirusalim ne warà pà metau kayi te ned-ulaula ketà?”

19 “Maa,” ke si Hisus, “engkey se ned-ulaula ketà?”

Ne midtavak dan te, “Engkey ve iya? Iyan arà ne mekeatag ki Hisus ne riyà ebpuun te Nesarit. Su si Hisus ini ne benar ne mibpelambas te Lalag te Eleteala diyà te etuvangan din wey kayi rema te etuvangan te menge etew. Duen gehem din te kebpenurù din wey kayi rema te langun te mid-ulaula rin ne mekegeyip.

20 Ugaid ne ini se menge mepurù tew te terebpelengesa wey ke menge egkeunutan tew ne impemenayik dan diyà te gubinedur su impekukum ne mid-imasad dan te ebpeimetayan, ne inlansang dan en sikandin diyà te pinebelavag ne kayu.

21 Ne iyan netahù te hinawa rey ne sikandin en iyan ke midsuhù te Eleteala ne ebpeliyu te langun ne inenakan ni Israyil. Ugaid ne ini en ke iketelu ne hewii te kineimetayi ran kandin.

22 Ne ruen dema ned-ulaula te menge meritan ne ruma ta ne igkeinuinu rey. Su geina ne mibpemanepaney ran diyà te leveng din,

23 ugaid ne warà dan mekita ke lawa rin ketà. Ne midlived dan kayi te kenami ne mibpenudtul

dan te ruen deruwa ne suluhuen te Eleteala ne mibpekita kun kandan ne migkahi kandan te neuyag en si Hisus.

²⁴ Ne ruen minge duma rey ne midsuvar mibpendiyà te leveng ne iring ded iya ketà se nekita ran te migkahi rut te minge meritan, ugaid ne warà dan mekita ke lawa ni Hisus.”

²⁵ Ne migkahi en si Hisus kandan te, “Warà bes itungan niyu! Meambe ke warà kew mebperetiyaya rut te langun ne impesurat te minge mibpelambas te Lalag te Eleteala rengan?

²⁶ Su migkahi ke minge mibpelambas te Lalag te Eleteala ne egkerasey pà ini se Impasad te Eleteala ne arà pà ne Ebperetuen din te langun ne imbehey kandin.”

²⁷ Ketà ne midseysey en ni Hisus kandan ke meana rut te langun ne impesurat te mibpelambas te Lalag te Eleteala rengan mekeatag kandin. Kayi rin imperudsù te impesurat ki Moises taman en dut te mewri ne mibpelambas te Lalag te Eleteala.

²⁸ Guna su ebpelundani ran en dut te inged ne edtemanan dan, ne iring te edlevundus pà si Hisus.

²⁹ Ugaid ne mibangen dan sikandin se egkahi te, “Kayi kiyu pà su meapun en, ne edsanlep en ayan se andew.” Ne arà dà ne mibpekiduma en si Hisus kandan.

³⁰ Neiseg-iseg ketà ne mibpinuu ran se egkaan, ne migkuwa ni hisus ke egkeenen dan ne pan ne impeselamat din te Eleteala ne mibpenevìtevi din ne imbehey rin en kandan.

³¹ Ketà dan pè be mekilala si Hisus su arà pà ne iring te nevukaan ke mata ran. Ugaid ne miduma rà sikandin te peraan dan.

³² Ne mibpelelahey en ini se deruwa ne etew te, “Tembù bes neinesa ki te ebpemineg kandin te edseysey te menge impesurat te Eleteala te mibpelambas te lalag din gewii te kebpepengasak tew te ed-ipanew.”

³³ Arà dà ne mid-itindeg dan ne mid-uli dan en diyà te Hirusalim. Ne iyan dan neumaan ketà ke sepulù wey seveka ne edumdumaan ni Hisus wey ruma pà ne nevurun.

³⁴ Iyan dan egkepenudtul se, “Benar iya ne nevanew si Hisus ne mibpekita en ki Simon.”

³⁵ Ne ketà ne mibpenudtul en kandan ini se deruwa ne etew ne riyà ebpuun te Emaus ke engkey se ned-ulaula ran diyà te ralan te kinepekiduma ran ki Hisus. Ne mibpenudtul dan dema ke engkey se kinepekekilala ran en ki Hisus ketà te kebpenevitevi din en dut te egkeenen dan ne pan.

*Mibpekitakita si Hisus Dut te Menge Edumdu-
maan din*

(Mateo 28:16-20; Marcos 16:14-18; Juan 20:19-23; Nenged-ulaula 1:6-8)

³⁶ Gewii te ebpenudtul dan kayi ne netetau ran te kayi en mekeitindeg si Hisus te teliwarà dan. Ne migkahi en te, “Na, mebmelintad ke hinawa niyu!”

³⁷ Nekita ran dà si Hisus ne neandek dan nevenar su iyan dan kunaan ke gimukud din se nekita ran.

38 Ugaid ne migkahi sikandin kandan te, “Meambe ke egkeandek kew maa kedì? Meambe ke duwaruwa se hinawa niyu kedì?”

39 Intengi niyu ma ini se palad ku wey paa ku su siaken ded iyan ini! Geweri a niyu ma su apey niyu egketueni te kenà a gimukud. Su embiya gimukud,” ke si Hisus, “ne warà sapù din wey tulan din, ugaid ne egkekita niyu ma te ruen kediey.”

40 Nekahi rin dà ini ne impekita rin en ke palad din wey paa rin.

41 Ne ruen pà lavew keduwaruwa te hinawa ran te si Hisus ini se nekita ran ugaid ne nengehalew ran wey nengeinuinu. Ne ketà ne mid-insà si Hisus kandan te, “Menu ruen ded egkekaan tew kayi?”

42 Ne mibehayan dan sikandin te in-anag ne serà.

43 Ne migkuwa rin ke serà ne migkaan din kayi te sineruwan dan.

44 Ne migkahi si Hisus kandan te, “Pehaney te kayi e pà te keniyu ne ini iya ke migkahi ku keniyu: Langun te impesurat mekeatag kediey ketà te penduan ni Moises wey ke impesurat te minge mibpelambas te Lalag te Eleteala wey arà se insurat ketà te riberù ne ed-ingaranan te Salmu ne langun din ne metuman iya kayi te kedì. Na guntaani ne netuman en arà kayi te netemanan ku.”

45 Ne arà pà ne mibukaan din ke itungan dan su apey ran ebpekesabut dut te impesurat ne Lalag te Eleteala.

⁴⁶ Ne migkahi en kandan te, “Ini se impesurat dut te mibpelambas te Lalag te Eleteala rengan ne: Ebpekepeveyà pà te kegkerasey arà se Impasad te Eleteala ne Ebperetuen ne ed-ingaranan te Mesiya, ugaid ne ketà te iketelu ne hewii ne ebenawen ded.

⁴⁷ Ne kayi te kebpatay rin wey kayi te kebanew te Eleteala kandin,” ke se impesurat ne Lalag te Eleteala, “ne kayi ve imbe ne ruen kebpesahad te Eleteala te keberedusaan dut te minge etew ne ebpedsendit ne ed-engkenà te meraat ne ulaula ran. Ini se ieneb niyu te ebpesabut diyà te langun ne minge inged kayi te ampew te dunya. Kayi niyu irudsù te Hirusalim.

⁴⁸ Su geina te nemetmetaan niyu en,” ke si Hisus, “te netuman en ini kayi te kedi, ne sikiyu en ke editihus.

⁴⁹ Duen ibpepengkayi ku te keniyu ke Kedese-nan ne Ebpetuntul te menusiya ne impasad keniyu te Amey ku rengan. Engketà be ne kenà kew pà awà kayi te inged ne Hirusalim taman te edlumun en keniyu ke gehem din ne riyà ebpuun te langit.”

*Nevatun si Hisus Diyà te Langit
(Marcos 16:19-20; Nenged-ulaula 1:9-11)*

⁵⁰ Ne ketà ne mibpeneheewit din sikandan diyà te liyu te inged ne Hirusalim uvey te inged ne Biteniya. Nekeuma ran ne ingkayew rin ke belad din ne impenuvadtuvad kandan.

⁵¹ Gewii rin te ibpenuvadtuvad din sikandan ne mid-ewaan din en sikandan ne mibatun en diyà te langit.

⁵² Ne mibpengarap dan kandin, ne memehalew ran nevenar te mid-ulì dan diyà te Hirusalim.

⁵³ Ne merukilem meandew ne riyà dan te Nekebpuru ne Valey te Eleteala se edeyù te Eleteala.

clxxxii

Manobo, Ilianen
Manobo, Ilianen: Ke meupiya ne tudtul mekeatag ki
Hisu Kristu New Testament

copyright © 1989 Wycliffe Bible Translators, Inc.

Language: Manobo, Ilianen

Contributor: Wycliffe Bible Translators, Inc.

All rights reserved.

2025-05-13

PDF generated using Haiola and XeLaTeX on 13 May 2025 from source
files dated 13 May 2025

8fce2a78-a796-51ec-acdb-22430c0b7b13